

**GPS**

**علاقات**

**ساره النجار**

## GPS علاقات

المؤلف: ساره النجار

تدقيق لغوي: محمد مصطفى

تنسيق وإخراج داخلي: لخضر بن الزهرة

تصميم الغلاف: عبد الرحمن الصواف

رسومات داخلية: سهيلة خالد

رقم الإيداع: 2019 / 27866

الترقيم الدولي: 3-9-85607-977/978

الطبعة الثانية: 2020

رئيس مجلس الإدارة: أ. د. محمود محمد السعيد

المدير العام: هالة البشيشي



بريد إلكتروني: [info@alhalapublishing.com](mailto:info@alhalapublishing.com)

تليفون : 01110161117

العنوان: 26 ش 261 المعادي الجديدة

صفحة الفيسبوك: مركز الهالة الثقافي

<https://www.facebook.com/alhalapublishing>

جميع حقوق الطبع والنشر محفوظة للدار، ولا يحق لأي شخص أو مؤسسة أو جهة إعادة إصدار هذا الكتاب، أو جزء منه، أو نقله بأي شكل من الأشكال، أو وسيلة من وسائل نقل المعلومات، ولا يجوز تداوله إلكترونياً نسخاً أو تسجيلاً أو تخزيناً، دون إذن خطي من الدار.

جميع الآراء الواردة في هذا الكتاب تعبر عن رأي كاتبها، ولا تعبر بالضرورة عن رأي دار النشر.

# GPS

## علاقات

ساره النجار



## إهداء

إلى كل من وقع في الحب حتى لا يبقى وحيداً


وإلى كل من وقع في الحب وظل وحيداً

وإلى كل من لم يقع في الحب بعد

إليك أنت



## الحب زي السواقه



أول مرة أطلع فيها بعربيتي لوحدي كان مشوار اضطراري، كنت لازم أوصل صديقتي المريضة للمستشفى، وكنت متوترة جداً، أصل محدش علمني السواقة والمرة الوحيدة اللي طلعتها مع حد يعلمني السواقة كان كل اللي اتعلمته من قواعد؛ إني لو دست على دواسة البنزين العربية تمشي، ولو دست على الفرامل العربية تقف، فقط لا غير.

المهم طلعتنا، صاحبتني على الكرسي اللي جنبي بتتوجع، وأنا بحاول أحافظ على هدوئي قدر المستطاع، وفجأة لقيتها بتقوللي: «إنتي ما بتديش إشارات ليه؟» بكل بلاهة سألتها: «يعني إيه؟». قالتلي وهي مش قادرة تتكلم أصلاً: «يعني الناس ازاي تعرف إنتي داخلة يمين ولا شمال فيعملوا حسابهم بدل ما يخبطوكي؟» والإجابة كانت: «صوت صرصور الحقل».

المهم وصلنا بأمان الله المستشفى وهي بقت أحسن، وجه الوقت إني أرجعها بيتها، واحنا راجعين لقيتها بتسألني: سارة هو إنتي لو مجهدة وطاقتك بتخلص خالص، ينفع تقومي تدلعي اللي حواليك؟

قلت لها: آه، هو المسكن اشتغل ولا إيه؟!

لقت ميرنا بتقول: جاوبي يا فيلسوفة عصرك.

وكان ردي: أكيد لأ يا ميرنا.

ميرنا: طب إنتي البنزين عندك بيخلص، اقفلي التكييف وافتحي الشبابيك لحد ما تحطي بنزين يا حلوة.

قلت لها: معلش، أنا أصلي معرفش قواعد السواقة على فكرة.

ميرنا: يا ستي بكرة تعرفي، ولا حتى متعرفيش، هو في حد من اللي  
سايقين حواليكى دول عارف هو سايق ازاي!

السواقة زي الحب بالظبط محدش عارف قواعدها، لكن كلنا  
بنسوق، وكلنا بنحب.

معرفش ليه كل مرة كنت بقعد قدام الدريكسيون كنت بستغرب  
جملة صديقتي الله يرحمها: الحب زي السواقة.

النهارده بعد كل الكتب اللي قريتها والكورسات وورش الإرشاد  
السلوكي اللي حضرتها اكتشفت إن كلام صديقتي صح: «الحب زي  
السواقة».

الحب زي السواقة؛ فعشان علاقتك تبقى آمنة لازم من الأول  
عريبتك تبقى فيها وسائل أمان؛ إيرباج وفرامل، وعشان العلاقة ما  
تعطلش لازم تحط لها وقود أول بأول، وعشان تتجنب إنك تتنذي لازم  
تختار طريق منور ممهد تمشيه.

الحب زي السواقة عشان ما ينفعش واحد تايه في الدنيا مش  
عارف هو رايح فين يقع في الحب، وعشان ما ينفعش حد ماشي عكس  
اتجاهك يبقى رفيق الرحلة، وعشان إنت اللي سايق والقرار قرارك يا  
برنس.

الحب زي السواقة عشان لازم يبقى قلبك ع الحبيب، وعينك ع  
الطريق، الحب زي السواقة عشان لازم GPS.

ياللا اضبط قعدتك في الكرسي، عدل مستوى مراياتك، واربط  
حزام أمانك وتعالى نبدأ الرحلة، ونسأل الله السلامة.



## قدامك سكة سفر



أول ما البني آدم مننا بيتولد، المولى عز وجل يبسلمه عربيته، اللي هي نفسه؛ نفسه المعجزة، نفسه المليانة إمكانيات وطاقات وقدرات هائلة، عشان يعيش عمره كله يحاول يكتشفها وبعد ما يكتشفها يستفيد منها ويفيد بيها.

العربية دي لها عجلة قيادة عشان هو اللي يسوقها، ما هو أصله مخير يمشي الطريق اللي هو عايزه، بس كل طريق له آخر، وطالما اختار هو الطريق يبقى ما يلومش إلا نفسه على المكان اللي هيوصله في الآخر.

العربية دي لها علامة بنشوفها كلنا أول ما نبص على العربية، العلامة دي بتقول لنا ماركة العربية دي إيه، وكل ماركة لها بلد منشأ، عشان كده كل عربية لها مواصفات خاصة بيها لوحدتها، ولها قوة موتور مختلفة عن الثانية، وكل عربية لها معدل استهلاك للوقود ولها قيمة سعرية غير العربيات الثانية. العلامة دي هي الأم، الأم هي هوية العربية، اللي منها بتعرف إنت مين، إنت عربية مرسيدس ولا فيات ولا تكتوك.

الطريقة اللي كانت بتعاملك بيها، الكلام اللي بتقولها عن نفسك، انعكاس صورتك في عيونها، درجة قبولها لاختلافك؛ كل ده هو اللي شكل هويتك وبقيت في الأوراق الرسمية يا مرسيدس يا تكتوك.

العربية كمان لها إطارات، وعلى حسب قوة تحمل الإطارات دي لوعثناء الطريق، للحصى، لدرجات الحرارة ولمطبات الحياة بتكون درجة أمان العربية.

الإطارات هي المسؤولة عن إنها يا تخلي عربيتك بتجري ع الأسفلت بكل سلاسة يا تلاقي العربية بتحدف منك أو بتقف بيك، أو حتى تتقلب

لو الإطارات دي لا قدر الله انفجرت وساعتها بتعرض حياتك كلها للخطر. الإطارات دي هي الأب.

لكن ساعات العلامة تكون بتقولك إنك عربية كارو، وأنت عارف في قرارة نفسك إن المولى خلقك رانج رووفر، فتضطر تشتغل إنت على عربيتك بنفسك لحد ما تبقى رانج رووفر. الأمر صحيح صعب لكن محتاج منك شجاعة وإيمان بنفسك.

طب حلو أوي. عربيتي معايا أهو، أنزل الشارع بقى أمشي في دروب العلاقات براحتي، فين المشكلة؟

مفيش مشكلة إنت بس لازم تطلع رخصة يا معلم، وقبل ما تطلع رخصة لازم تتعلم ازاى تسوق، وتدخل امتحان لازم تنجح فيه، الرخصة دي بمثابة اعتراف إنك مؤهل تدير عجلة القيادة وتتعامل مع العربيات والمارة في الشارع.

المشكلة اللي بجد إن كل اللي بيسوقوا معاهم رخصة، لكن مش كل اللي بيحب أو متجاوز معاه رخصة الدخول في علاقات ولا الوقوع في الحب.

إحنا ما اتعلمناش يعني إيه علاقات، وما أخذناش أي دروس في الحب، وكل اللي نعرفه عن العلاقة بين الرجل والمرأة اكتسبناه من خلال متابعتنا لأبونا وأمنا؛ يعني لو هما علاقتهم ببعض ما كنتش جيدة وماكانوش على وفاق فمينفعش نعتمد عليهم كمثال أعلى في العلاقات، وهنبقى مضطرين نأخذ إحنا دروس خصوصية في الحب.

المشكلة الأكبر بقى إن الدروس اللي أهالينا تلقوها عن العلاقات أقل بكثير من اللي إحنا بنتلقاه وبنمارسه في عصرنا الحالي؛ هما يمكن

يكونون اتعلمو، وعلمونا ازاي نجيب درجات عالية في حصص الإملاء، ازاي نبقى أبناء مطيعة بتسمع الكلام لكن محدش علمهم ولا علمنا يعني إيه علاقة أصلاً.

دلوقتي مع وجود السوشيال ميديا، والاختلاط، وانتشار النوادي والسينمات والأماكن الترفيهية اللي سهلت علينا التواصل، بالإضافة للعدد الرهيب من الكتب اللي بتتكلم عن العلاقات، ومع وجود الكم الهائل ده من أخصائي التنمية البشرية والمدربين والمعالجين النفسيين اللي بقوا يقدروا ينشروا الوعي من خلال الميديا أو ورش العمل فمحدث بقى له حجة، وبقى فرض عين على كل بني آدم قبل ما يدخل علاقة يفهم نفسه ويفهم شريكه ويفهم يعني إيه حب أصلاً.

لكن لسه فيه ناس كتير بتسأل: نتوقع إيه من العلاقة ولا نتصرف ازاي مع الطرف الثاني؟ ازاي نقبل اختلاف الشريك؟ ازاي نختاره أصلاً من الأول؟ لأ ده بقى السؤال الأكثر شهرة ازاي أعرفني أنا أصلاً؟

للأسف حوادث العلاقات كترت أوي، ومعظمنا أكيد وقع مرة ع الأقل مع الشخص الغلط، أو قابل الشخص المناسب لكن خبط فيه، أو اتخبط هو منه لما تعامل معاه بالشكل الغلط، أو قابل الشخص الصح، لكن كان هو نفسه لسه خارج من حادثة أو تايه في السكة الغلط.

عشان كده قبل ما تقعد ورا عجلة القيادة وتقرر تسوق عربيتك وتبدأ رحلة علاقاتك لازم تكون مؤهل، لازم تكون بتتمتع بقدر من الإدراك والبصيرة ول لازم تكون عندك كفاءة تخليك تطلع رخصة علاقات، ول لازم تكون عربيتك فيها من وسائل الأمان اللي يحميك ويحافظ على سلامتكم: زي حزام أمان هو قيمك وقناعاتك وأخلاقك اللي بتتسلح بيها في بداية

رحلتك في الحياة، ووسائل هوائية هي كرامتك وتقديرك لذاتك وحرصك على سلامتك النفسية وقت الصدام. زي مانع انزلاق يمنع عربيتك تنحدر بيك في منحى خطر إنت عارف إن آخرته الندامة. زي فرامل تساعدك تكبح جماح غضبك وتهورك.

لازم كمان تتأكد قبل ما تطلع على طريق العلاقات إن عربيتك فيها وقود يمشيك؛ قول عربيتك:

بنزين 80: اللي هو علم وعمل.

أو 90: علم وعمل وصحاب.

أو 95: علم وعمل وصحاب وشغف وهدف في الحياة.

كل واحد حسب مقدرته.

وخلي بالك في الأول وإنت سايق في دروب العلاقات هتندسى تحط بنزين، وفجأة هتلاقي اللمبة الحمراء نورت، لكن شوية بشوية هتتعلم تراقب مؤشر طاقتك وتحط بنزين أول بأول، وماتستنش لما الخزان يفضى، عشان لو بنزينك خلص هتحتاس، ولو مفيش محطة وقود قريب هتقف ومش هتقدر تكمل العلاقة.

لازم كمان تختار الطريق الممهّد الأمن عشن تمشي عليه، الأمان مش الأسرع، في المرات الأولى اللي هتمشي فيها في الطرق مش هتبقى فاكر أماكن المطبات اللي تجبرك تهدي سرعتك وتكبح جماح انفعالك، لكن شوية بشوية هتتعلم تبص ع العربيات اللي قدامك وتستفيد من تجاربهم وتهدي لما تلاقيهم بيهدو.

ولما يبقى فيه ازدحام مروري في حياتك اتعلم تهدي سرعتك وتمور عربيتك عشان ماتحرقش بنزين ع الفاضي، وتقل الشبابيك اللي مدخلالك صوت الدوشة برا، وتعلي نغمات المزيكا بتاعتك عشان تفصل.

وفي علاقات ماينفعش تمشيها أصلاً؛ زي طريق مايسعش غير عربيتين، ماينفعش تبقى عزول بينهم، أصلك هتزنق وهيدعو عليك.

وزي علاقة مشاركك الطريق فيها سواق نقل نرجسي هيفضل زانقك ومش سامحك تاخذ راحتك على الطريق، وفيه علاقة تجبرك تمشي عكس اتجاهك وقناعاتك، وفيه علاقات بتبدأها وانت مش عارف إنها مغلقة لوجود إصلاحات عشان كان عليها حادثة، والعربية اللي مفروض تمشي معاك الرحلة اتدغدغت ولازم تروح صيانة قبل ما ترجع تمشي تاني، وفيه علاقات هيقابلك فيها واحد من قطاع الطرق بيتزك ويؤذيك ومش بعيد يسرق عربيتك كمان.

مهم كمان تبقى فاهم إن ماينفعش تسوق وانت مجهد أو لسه خارج من علاقة ومخبوط، وإوعي تعدي السرعة عشان المولى حاطط لنا ردار؛ لو العلاقة في نفق التعارف ماتمشيش على سرعة المخطوبين، ولو إنت طلعت كبري الخطوبة ماتسوقش على سرعة طريق المتجوزين. اللمسة والحضن دول مش طريق تعارف ولا خطوبة، واخدلي بالك! الردار بيسجل!

ولو إنت وعدت حد تمشي معاه وجنبه عشان طريقكو واحد ماتركزش مع عربية تالته موديلها أحدث وشكلها أحلى، عشان ماتضعش من رفيقك، ويضيع هو منك بعد ما اتعودتو على بعض وبقيتو ونس


بعض في الرحلة، وقبل ما تبدأ الرحلة ماتنساش دعاء السفر واستودع الخالق قلبك.

اللافتة الأولى





## رخصتك للوقوع في الحب



- 
- صباح الخير.
- صباح النور يا فندم.
- عايز أطلع رخصة سواقه من فضلك؟
- نعم؟
- آه آسف. قصدي رخصة للوقوع ف الحب.
- اطلع عند مدام نشوى، الدور السابع.
- إيه ده! هي مش كانت نادية اللي ف الرابع!
- يا فندم إنت هنا في إدارة تراخيص قلوب الجيزة.
- يصعد سلم خشبي على جانبه صور معلقة لقيس وليلى، وعبلة  
وعنتر، وروميو وجوليت، وبيلا وسارماغو، وديانا ودودي... في نهايته  
غرفة باهها موارد مطلي بالأخضر...
- يدفع الباب بحماس...
- حضرتك مدام نشوى؟
- صباح الفل أولاً، أنا لقاء. نشوى اللي قدامك أهي.
- مدام نشوى عايز أعرف إيه الأوراق المطلوبة لاستخراج  
رخصة وقوع في الحب؟
- هاي، صباح الجمال، اتفضل الورقة اللي فيها الأوراق المطلوبة  
أهي. اقراها على مهلك، ونفذ المطلوب فيها، وارجع لي.

...

## المستندات المطلوبة لاستخراج رخصة وقوع في الحب:

### صورة شخصية حقيقية لنفسك:

مش محتاج تروح أستوديو تصوير، كل اللي عليك تعمله إنك تبص لنفسك في المرآة اللي في الأوضة اللي جنبينا نص ساعة، وتسال روحك: «بتحبها؟» مش صورتك اللي هي انعكاسك في المرآة، لأ، نفسك الحقيقية، بتحبها؟ بتحبه؟

بتحب البني آدم اللي قدامك في المرآة ده؟ البني آدم اللي إنت عليه دلوقتي؟ بشوية الكيلو جرامات الزيادة اللي معكنين عليك، بشعرك المقصف، بآثار الحبوب اللي في وشك اللي عمال تدور لها على علاج فعال؟ بتحب نفسك زي ما هي كده، بصفة العند اللي ناس كتير بتشتكي منك بسببها، بتقدير المقبول اللي جبته السنة اللي فاتت؟ بتحبها زي ما هي كده بتقصيرها في عبادات ربنا، وانشغالها عن صلة رحمك الفترة اللي فاتت؟

نفسك دي إنت قابلها زي ما هي؟ عارف ومقتنع إنك بشر بيتخن ويخس وينجح ويفشل ويعصي ويتوب؟ مصدق كل ده جواك وعندك قبول تجاه كل صفاتك اللي مخلياك البني آدم اللي إنت عليه دلوقتي؟

والقبول مش معناه الاستسلام للكامل كيلوجرام الزيادة، ولا التباهي بالتقصير في حق الخالق، لكن معناه إن ده أنا، وقابلني زي ما أنا، وبحبني وهحبني في كل أوضاعي، وهحافظ على صحي النفسية والبدنية والعقلية في كل أيامي اللي جاية.

---

إني أحب نفسي وأقبلها زي ما هي معناه إني هسعى أخس عشان أحافظ على صحي وركبي ومستوى هرمون السعادة في دمي بالرياضة والأكل الصحي.

إني أحب نفسي ف هسامحني على لعبي وتهاوني في دراستي السنة اللي فاتت، ومش هفضل أقول أنا فاشل وما أستاهلش القسط اللي أبويا دفعهولي، أحب نفسي معناه هشجعني وهنسى اللي فات وهبص للي جاي.

إني أحب نفسي يعني لما يبدأ الصوت اللي جوايا؛ اللي دوره ينتقدني ويحكم ويقسى عليا يطلع هسكتة، هقوله يا تكلمني كأنك بتكلم صديق؛ بطريقة لطيفة وإيجابية، يا تخرس خالص.

إني أحب نفسي معناه إني أسامح نفسي على تقصيري في حق الخالق، عشان أنا مدرك إني بشر والبشر خطأ، وإن هو الإله العظيم الأعظم اللي خالقنا ومعاه كتالوجنا وعارف إننا بنغلط وهنغلط. إني أحبني يعني أتوب وأرجعه، وأوعده ما أرجعش تاني لتقصيري، وكل ما يحصل والأقي نفسي أذنبت أتوب.

إني أحب نفسي يعني أسامح اللي أذوني، بعد ما أمنع أذيتهم ليا، عشان أنا أستاهل قلبي وبالي يبقو رايقين، ميبقاش فهم شوائب كره ولا رواسب غضب تمتص مني ومن طاقتي ومن استمتاعي بالحياة.

إني أحب نفسي يعني مفيش أغلى وأولى وكمان أولاً بتاعت أنغام غيري أنا، أنا على رأس قائمتي ومش أنانية، لأن الأناني هو اللي بيأخذ احتياجاته من الآخرين من غير ما يديهم حاجة، لكن أنا هحب نفسي؛

فهاخذ ثقتي بنفسي من نفسي وهاخذ شعوري بالاستحقاق من نفسي.

إني أحب نفسي يعني ما أقبلش صاحب عمل يهبيّي أو يقلل مني،  
عشان خايف ما ألاقيش شغل تاني، هو مش رب نعمتك، المولى هو  
اللي بيرزقك طالما بتسعى.

إني أحب نفسي يعني ما أسمحش أبويا يفرض عليا دراسة مش  
بحبها ولا أمني تفرض عليا قريها عشان أرتبط بيه، هرفض بكل رحمة  
ومن غير صدام. هرفض لحد آخر نفس وده مش عقوق، العقوق إنك  
تجرحهم وتهملهم لما يبقوا محتاجين اهتمامك.

إني أحب نفسي يعني ما أقبلش حد يحسسني بالذنب ويفضل  
يأنب فيا بعد ما أعتذر وأصلح غلطي.

إني أحب نفسي يعني أبطل ألبس قناع وأعمل حاجة مبجحهاش  
عشان أرضيهم، أحبها يعني ما أمتعش نفسي عن حاجة المولى أباحها  
أحسن يقولوا عليا كذا، أحبني يعني أبطل كل اللي بيئذيني، أحبها يعني  
أسعى لمعرفتها، أجرب عشان أكتشف نفسي وأعرفها وأعرف الرسالة  
اللي ربنا خلقني عشانها.

– مدام نشوى أنا رحب بصيت في المراية ورجعت وخلص طلعت  
صورة شخصية حقيقية.

– جميل أوي، كده إنت لما بقيت بتحب نفسك بقيت مؤهل لحب  
شخص تاني، ياللا شوف باقي الأوراق المطلوبة.

## شهادات تفيد خلوك من الحالات الآتية:

\* لسه مش عارف إنت مين ولا عايز إيه من الدنيا، مش عارف شغفك ولا عارف إيه رسالتك في الدنيا، مش عارف صفاتك الشخصية، مش عارف هتكمل في البلد ولا هتسافر.

عشان لو وقعت في الحب وإنت لسه مش عارف إنت مين، وعايز إيه، وبعد ما مشيت رحلتك واكتشفت نفسك، سلكت طريق عكس اللي كنت ماشي فيه تمامًا؛ ف إنت كده بتسبب ارتباك لشريكك وبتحطه في موقف لا يحسد عليه.

\* لسه خارج من علاقة عاطفية ولم تتعافى بعد، مفهوم طبعًا إنك محتاج لحد يبقى معاك، يقف جنبك ويطبطب عليك ويقولك إنك لسه محبوب، لكن صدقني الاختيار ساعتها هيكون غلط؛ لأن أول حد هيمدلك إيده هتفتكر نفسك بتجبه، ده غير إنك هتكون بتختار نفس النمط من الأحبة، وهتستغرب بعد وقت إن حبيبك الجديد هو نفس القديم، خد وقتك من تسع شهور لسنة على الأقل، عشان تتعافى وتبقى مستعد تقابل حبيب جديد.

طب بنعرف ازاي إننا خلاص خفيينا من الحبيب القديم؟

بتعرف لما الحبيب القديم مابقتش ذكره تثير فيك أي شعور بالغضب أو الاستياء ولا حتى الحنين، بتعرف لما تلاقي نفسك بطلت تتابع أخباره وبقي فعلاً مش فارق معاك، وصدقني لما تتعافى هتتعرف، ساعتها قلبك هيقولك.

\* وفاة أحد الآباء أو انفصاله عنك أو سفره أو هجره ليك؛ لأن ده هيخليك شخص غير متزن، رايح بسرعة يدور على حد يملأ مكان الأب

أو الأم اللي رحلوا، عشان إنت حاسس بالوحدة، وساعتها اختيارك مش هيبقى صح لأنك بتدور على أي شخص يعوضك عن فقد اللي راحوا.

\* تحقيقًا لرغبة أحد الأبوين لو هو مريض وبيقولك: «عاوز أفرح بيك قبل ما أموت». ماتتجوزش عشان تفرح حد، أبوك اللي على فراش الموت ده روحه مش هتكون سعيدة لو إنت بقيت عايش حياة تعيسة، افهم إن رغبته دي نابعة من خوفه عليك، كل اللي هو عايزه أنه يتأكد إنه سايبك آمن، ساعتها ما عليك إلا إنك تطمئه، توريه إنك قوي بنفسك وشغلك وقرابيك وصحابك، قوي بتربيته ليك وبقربك من المولى.

### أوراق يجب أن توقع بالموافقة عليها:

\* أقر أنا أن أعامل حبيبي أو شريك حياتي كما أعامل أعز أصدقائي، وأن أعامله برقة واحترام وود، وإذا حدث وطلبت منه أمرًا، أن أسبق طلبي بكلمة من فضلك وأتبعها بالشكر، وأقر أنه غير مسؤول عن تحضير فطوري أو حقيبة سفري وإن كان هناك اتفاق ضمني بيننا أن أقوم أنا ببعض المهام ويقوم هو بـبعض أخرى، فعلى كل منا أن يشكر شريكه على قيامه بواجباته.

\* أقر أن أحترم أسرة الحبيب وتاريخه وماضيه وكل علاقاته السابقة واجب، وأن أحترم عمله وأصدقائه وهواياته حتى لو لم ترق لي لأنها أبسط حقوقه، وأقر أن أحترم مساحة الحبيب الشخصية، وأن أترك له الفرصة أن يكون بمفرده أو بصحبة آخرين غيري إذا أراد، وأن أتفهم أن رغبة شريكي في أن يختلي بنفسه أحيانًا هو أمر لا علاقة له بي على الإطلاق.

«طبعاً إنت أكيد اخترته عشان تتشارك معاه حياتك ويشاركك هو حياته، وأكيد المشاركة مبهجة وبتعزز علاقتكم، لكن كمان احترام المساحة الشخصية للحبيب من أكثر أسباب نجاح العلاقة؛ لأن الراجل اللي بيسيب حبيبته تعمل حاجة هي بتحبها حتى لو هو مش بيضهم فيها ولا ناوي، بيوصل لها رسالة (أنا بدعمك حتى لو أنا مش جزء من اللي بتعمليه). والست اللي بتبقى مبسوطة وجوزها خارج يلعب بلاي استيشن أو يقعد ع القهوة مع أصحابه بتوصل له رسالة (إنه أنا يسعدني تقضي وقت حلو حتى لو أنا مش جزء من الوقت ده).»

\* أقر بأني أتفهم أن شغف البدايات وما يصاحبه من تحليق وفوران للمشاعر يختلف تمامًا عن علاقة مستقرة آمنة يكون فيها المرء نفسه، وأن نشوة الوقوع في الحب واضطراب ضربات القلب لا تبقى للأبد بل يحل محلها شعور آخر بالرضا والسعادة والطمأنينة.

لكن ده ما يمنعش إن العلاقة محتاجة من وقت للتاني أشياء مثيرة تقتل الملل والروتين، لازم نخترع حاجات على مر الزمان نوري بيها بعض اهتمامنا، ونشعل بيها جذوة اللقاء الأول.

\* أقر أن أستيقظ من نومي كل صباح وأنا أنظر لشريكي على أن الظفر بقلبه هو أكبر إنجاز حققته، وأن أختار أن أروي العلاقة يوميًا بمياه الاهتمام والإخلاص، وإن سارت الأمور على نحو سيء فيجب أن أسعى لإصلاحها، وألتزم ألا يكون التخلص منها هو أسهل قرار.


\* أقر أن أقبل اختلاف طباع الحبيب وقناعاته، وأن أتفهم أن العلاقات الناجحة لا يشترط أن تكون قواعد أصحابها وقيمهم

وأهدافهم واحدة؛ لأنه لو كان شريكي هو أنا في كل تفصيلا فسيصبح ذلك مملاً لأبعد حد، إذ كيف يقع المرء في غرام نفسه.

– خلاص وقعت يا أستاذة نشوى أعمل إيه بقى؟

– اختم يا للا من عند أستاذة حبيبة اللي ف المكتب اللي جنبي، وألف ألف مبروك يا أستاذ.


### اللافتة الثانية:



إذا فرضنا أن وقوعنا في الحب  
مصادفة، فإن بقاءنا داخله قرار،  
ومع سبق الإصرار!



## هومين اللي سايق؟



«إنت تحب زي ما أنت عايز، لكن تتجوززي ما أنا عايز».

في كل مرة بسمع فيها الحوار ده؛ بسمعه حوار بين العقل والقلب، مش بين الله يرحمه عزت أبو عوف وكريم عبد العزيز في فيلم: «أضحك الصورة تطلع حلوة».

العقل بيقول للقلب إنت تحب زي ما أنت عايز، لكن تتجوززي ما أنا عايز، وكأنه مش دايمًا اللي بنحبه ينفع نتجوزه. طب أنا ازاي أعرف إن الشخص اللي بحبه ده ينفع أتجوزه ولا لأ؟ طب لو طلع ماينفعلش أعمل إيه ف كل الحب اللي جوايا ده؟ طب هو أنا أصلاً أعرف ازاي إن العلاقة اللي أنا فيها دي حب؟ مش أي حاجة تانية؟

• الحب على عكس الانجذاب الجسدي بيبدأ صغير وشوية بشوية بيكبر، الحب بيبدأ بإحساس إنك مطمئن ومرتاح في وجود الشخص، بتحسه صديق قريب منك، لكن الانجذاب الجسدي بيبدأ كبير من الأول خالص، بتلاقي نفسك مشدود أوي وبسرعة ومن غير أي أسباب منطقية.

• الحب الحقيقي فيه أمان وهدوء أكثر من غيره وسهر وعذاب ولخبطة وتوتر.

• الحب الحقيقي بيبقى في النور قدام الناس، بيبقى نفسي أهلي وكل صحابي يعرفوه، وأمشي إيدي ف إيده، مش سنين في السر وماحدث عرف.

• الحب اللي بجد على عكس التعلق معناه إنك ماتسمحش لحد يؤذيك، ماتبقاش في علاقة موتراك ومخلياك على طول مش إنت وتقول أصل أنا بحبه، لا ده مش حب، سمييه أي إسم ثاني لكن ماتسميهوش

حب؛ لأنّ عشان تعرف تحب أي حد لازم تكون بتحب نفسك الأول  
وبتخاف على راحتك النفسية، وعارف إنت مين، عارف إيه اللي تقدر  
عليه وإيه اللي ماتقدرش تستحمله.

عمرك ما تقدر تتعرف على شخص تاني وتندمج معاه ويحصل  
بينكم انسجام إلا لو إنت أصلاً عارف إيه الرسالة اللي ربنا خلقك  
علشانها، عارف أصلاً إيه هي مهمتك ع الأرض.

يبقى عشان تكون متأكد إن اللي إنت فيه ده اسمه حب لازم تبقى  
ابتديت تتعرف على نفسك وتفهم إنت مخلوق لإيه.

السؤال بقى اللي أكيد كل قارئ يبسأله لنفسه دلوقتي:

«أنا أتعرف ازاي على نفسي؟»

بتتعرف على نفسنا بتلات وسائل:

### أولاً: القراءة:

اقرا كتير؛ اقرا تاريخ، علم نفس، علوم بشرية، قصص وروايات؛  
علم ديكور، اقرا سيرة ذاتية لأنّ نوع الكتب اللي بتحبها بيوريك كتير عن  
شخصيتك.

### ثانياً: التجربة:

جرب تعزف، خد كورسات رسم، العب كورة، احضر ورش إرشاد  
نفسى وسلوك. التجارب بتطورك وبتوريك إنت مين.

## ثالثاً: العلاقات:

اعمل علاقات؛ اخرج مع قرايبك، كون صداقات مع زميلك، اشترك في جروبات على أرض الواقع مش مواقع التواصل الاجتماعي.  
الكر والفر، الخصام والتنازلات، البعد والقرب اللي بيحصلو ف العلاقات بيعرفوك نفسك.

وخلال رحلتك وإن بتكتشف نفسك هتقابل ناس كثير هتفتكر نفسك بتحيم، لحد ما توصل لنفسك الحقيقية، وساعتها بس لما تعرفها وتتصالح عليها وع الدنيا هتوصل للحبيب اللي يستحقك وتستحقه.

مشكلتنا الحقيقية إننا بنخاف نتعرف على نفسنا وبنهرب منها، بإننا نتعرف على حد ثاني أسهل، نحب أي حد غيرنا، لكن الشجاع يجد اللي ما بيخافش يعرف نفسه، وعشان كده الحب للشجاعان على رأي عمنا نزار.

زمان كان فيه أسطورة إغريقية بتقول: «إن الرجل والمرأة كانا في الأصل كائناً واحداً» مش راجل وست زي دلوقتي، لكن مخلوق تالت مشوفنا هوش؛ كائن بأربعة أياد وأربع أرجل.

وإن الكائن ده في يوم غلط أو يمكن الآلهة خافت من قوته، فغضبت عليه فقسمته نصفين، النصفين دول بقى اسمهم راجل وست، بعدين حكمت على كل واحد منهم يقضي حياته كلها بيدور على نصفه الصحيح الضايع منه، لحد ما يلاقيه فتلتحم تعاريجهم، حاجة كده زي البازل، يعشقوا سوا؛ عاشق ومعشوق، عشان يرجعو من ثاني واحد صحيح زي ما كانوا قبل كده.

وإن الآلهة دي نكاية في الكائن اللي غلط ده، واستكملاً لغضبيها عليه بتعميه عن النصف الصحيح فيفضل يدور طوال العمر ويتعب لحد ما يلاقيه.

ناس كتير فاهمة أن هو ده الحب الحقيقي (توأم الروح)، النص الصحيح؛ نصفين لدايرة اتقابلوا عشان يكمل كل واحد منهم الثاني، فتكتمل فراغات روحه بوجود الآخر.

بس مش هو ده الحب؛ لأن ببساطة أنت أصلاً شخص كامل، من الأول وإنك كامل، مخلوق في أحسن تقويم...

إنت مش نصف، ومش محتاج حد يكملك.

لو مستني حد يلتصق بك عشان يكملك، فده معناه إنك نص دايرة مستني نصف الدائرة الثاني اللي في علم الهندسة لازم يبقى ليه نفس نصف قطرك عشان تعملو دايرة كاملة؛ مقولة على نفسها.

تخيل كد معايا لو فيه دايرة وحب نص فيها إنه يكبر وينمو، مستحيل ساعتها تفضل دايرة، لكن هتبقى شكل تاني خالص، شكل مشوه.

ولو العلاقة دي شاء الله وانتهت هترجع شخص ناقص، نص بيدور وهو مهزوز على نص تاني يكمله، يملأ فراغات روحه.

لكن الحقيقة اللي لازم تعرفها إنك دايرة كاملة، وأن محدش هيملا فراغاتك غيرك إنت، إنت مش نصف ضايع، إنت بني آدم عنده تاريخ وقناعات وقيم وهوايات بتقابل الطرف الثاني اللي هو كمان عنده تاريخ وقيم وقناعات مختلفة، بتقابلوا فتنتجوا دايرة تقع في النص بينكم،

مساحة جديدة خالص مشتركة؛ دائرة تبقى فيها حياتكم الجديدة،  
دائرة هي الرابطة بينك وبين حبيبك؛ زي جزيرة تبقى هي الونس.

الجزيرة الجديدة دي تبقى هي السكن والدعم، إضافة ليك  
ولشريكك، ولوالعلاقة دي انتهت هتزل وهتحن ليها، بس مش هتتهار،  
مش هتموت لأنك من الأساس شخص كامل.

لكن لو بتقول لنفسك بحبه وهموت من غيره يبقى تأكد إن ده  
مش حب؛ الحب على عكس ما اتعودنا نسمع في الأغاني، ونشوف في  
الأفلام ونقرأ في الروايات؛ مش اتنين هيموتوا من غير بعض وكل واحد  
فهم محتاج الثاني في حياته، لا أبداً.

الحبيب مش شخص إنت محتاجه عشان تبقى سعيد، ولا متكل  
عليه وتتهار نفسياً من غيره، ولا الشخص اللي وجوده بس هو اللي  
بيحسسك بالأمان والطمأنينة والقبول، لأنك بالفعل بتاخذ كل ده من  
نفسك، لكن...

الحبيب هو شخص أثبت لك إنك مستقر نفسياً وقوي ومستقل  
بذاتك.

الحبيب يعني شخص وجوده يقويك مش غيابه يقتلك، الحبيب  
يعني شخص تقدر تعيش من غيره، بس إنت اللي عايزه بكامل إرادتك  
ومقرر تنبسط بوجوده معاك، والحبيب برضه مش شخص تستغنى بيه  
عن العالم، لكن يساعدك تستغنى بنفسك عن العالم.

الحب مش خناقة بين العقل والقلب؛ لأن لو واحد فهم مش  
مرتاح كده مابقاش حب. الحب اتنين عايزين يكملوا مع بعض، وسعداء  
بوجود بعض.

السؤال اللي هتلاقي نفسك بتسأله دلوقتي: «طب أمان أنا بحب  
ليه وقاعد معاه ف العلاقة ليه؟».

الإجابة: بمنتهى البساطة عشان إنت عايز تكون معاه، مش  
محتاج ولا مضطر، بس عايز.

### اللافتة الثالثة:





## مسكينة، القطرفاتها



– خدعوك فقالوا: الجواز مشروع فاشل، واللي فاتهم القطر  
نقدوا بجلدهم.

– إيه ده بجد؟

– آه بجد؛ مش عشان الجواز مش قطر، لأن مبدئيًا الجواز  
قطر فعلاً، ومش عشان فيه ناس ممكن تلحقه وناس بيقتوها، لكن  
عشان هو وسيلة انتقال. الجواز وسيلة؛ عشان أكيد محدش هدفه  
يركب القطر لكن بيركبه عشان يوصل لمكان هو عاوز يروحه، المكان  
اللي يروحه ده هو الهدف.

بالقياس الزواج وسيلة للتعرف، فقط وسيلة، لكن الهدف إني  
عاوز أعرفك وتعرفني، وأحبك وتهتم بيا، تشاركني حياتي وأشاركك  
العالم بتاعك وبما إن ديننا وتقاليدنا ما تسمحلناش نعيش مع حد برا  
إطار الجواز فبنتجوز.

الجواز إطار لصورة، ينفع يبقى إطار الصورة هو الهدف؟ في حد  
بيشتري برواز صورة ويسيبه فاضي؟

لأ، طبعًا، إنت لما تشتري برواز عشان تحط جواه صورة، مش مهم  
بقي الطريقة التي اشتريته بيها؛ حب ولا صالونات ولا مهم دفعت فيه  
كام؛ من مهر لمؤخر لكوشة وزفة، كل ده مش مهم، المهم هو الصورة  
اللي تهبطها جواه؛ صورة لاتنين بيضحكوا ومبتهجين، ولا صورة لاتنين  
بيمثلوا الضحكة عشان الصورة تطلع حلوة قدام الناس.

وبالقياس، فالجواز وسيلة؛ عشان نعرف ونقرب من بعض ونحب  
بعض، لكن مش هو في حد ذاته الهدف. احنا بقى في مجتمعاتنا المصرية  
بنعمل إيه؟

بنخلي الجواز هدف، وبنطلع ونقدم أحسن حاجة عندنا خلال فترة الخطوبة، ده إذا مقضيناهاش كلها بنلف ع الكنب والستائر والحلل ونختار الكوشة.

بنضيع أهم فترة في حياتنا بجهز للعش الذهبي، مع إن المفروض إن دي أكثر فترة نتعرف فيها على بعض، نختبر بعض، نتفق سوا هنعيش ازاي.

فترة الخطوبة اتعملت بالأساس عشان نختبر بعض ونكتشف عيوب بعض ونشوف لو هنقدر عليها ولا لأ، مش عشان نحب في بعض ونغمض عيوننا ونفوت ونعدي، لو جيت على نفسك وفوتها دلوقتي مش هتقدر تفوت قدام، واللييلة مش هتعدي.

### عشان كده عندي شوية نصايح مهمة لفترة الخطوبة:

- فترة الخطوبة لازم ماتبقاش قصيرة؛ علماء كتير اقترحو إنها ماتبقاش أقل من أربع فصول، إعرف حبيبك زي ما فيروز قالت بالصيف والشتا، سنة كاملة بالتمام والكمال.

- لازم خلال الفترة دي نبقى نفسنا، وعلى طبيعتنا؛ عشان لو لبسنا القناع كلنا هنبقى متضررين قدام في المستقبل لأنه كده كده هيبجي يوم والقناع هيقع، بس بعد ما يكون بقى فيه بيت وأطفال وحياة.

- فترة التعارف اختبار سواقة، يا تعديه يا تضطر تعيده، ومفيش أي انتقاص من قيمتك كشخص لما تدخل تمتحن أكثر من مرة غير إنك لسه مش مستعد تسوق، ماترددش إنك تمشي من العلاقة لو مش مرتاح إنك تفسخ خطوبة أسهل مليون مرة من إنك تهد بيت.

• في فترة الخطوبة لازم نعمل لشريكنا اختبارات نحاول نعرف منها هو لابس قناع ولا لأ، الاختبارات دي بتوقع القناع.

أمثلة:

– حاولي تثيري غيرته مثلاً، وشوفيه لما بيغير بيعبر عن ده ازاي! بيغضب ويزعق، ولا بيلفت انتباهك بالراحة.

– حاول تختبر ردود أفعالها، لو اتأخرت عليها مثلاً بتعمل إيه؟ بتقمص وتلغي الخروجة ولا بتكلم بهدوء.

• في فترة الخطوبة طلع أسوأ ما في شريكك وشوف هتقدر تستحمله وقتها ولا لأ.

لو شفتيه وهو عصبي وبيزعق، ولقيتيه مش وحش والله.

لو شفتها وهي نكدية وضاربة بوز، وكنت قادر تقبلها وقتها.

يبقى على بركة الله.

• في فترة الخطوبة اتكلموا واتفقوا على كل حاجة:

☞ هل عنده مشكلة تفضلي تشتغلي وتفضلي تروحي درس الزومبا، وتفضلي تزوري صاحبتك اللي هو مش بيستلطفها أوي؟

☞ مين اللي هيصرف على البيت؟ هو ولا إنتو سوا؟

☞ لو فيه حاجة اختلفنا في القرار بشأنها هنعمل إيه؟ كلام مين اللي هيمشي؟

☞ لو فيه فائض فلوس هنعوشه ونستثمر فيه ولا هنتفصح ونسافر؟

﴿ طب هنري أولادنا زي أهالينا ماربونا ولا هنتعلم أساليب التربية الإيجابية؟ ﴾

﴿ إيه المساحة الشخصية لكل واحد فينا وإيه حدوده؛ هل لازم أبقى عارف كلمة مرور تليفونك؟ هل ماينفعلش تطلع مصيف من غيري؟  
- ماتتجوزيش اللي بيزعق فيكي ومهينك وإنتي خطيبته عشان هيمد إيدو عليكي بعد الجواز.

- ماتتجوزش اللي بتقفل السكة في وشك كل لما تختلفوا، عشان هتسيبك البيت وتمشي بعد الجواز.

- ماتتجوزيش اللي بيخليكي تحاسبي على البطاطس بتاعتك وإنتوا مخطوبين لو هابقي عندك مشكلة إنك تصر في على نفسك وإنتي مراته.

- ماتتجوزش اللي طبعها تتناول على الساييس والجرسون والشغالة وهي خطيبتك عشان هتتناول عليك بعد الجواز إنت شخصيا.


- ماتتجوزيش اللي مايبحبش باباكي ومامتك عشان هيشتمك بهم بعد الجواز، ولا اللي معترض على صاحباتك وشغلك عشان هيمنعك عنهم بعد الجواز.

اسألوا كل اللي دخلوا محاكم الأسرة هيقولولكم كل حاجة كانت واضحة زي الشمس، وحتى اللي مايبقاش واضح، بتبقى له علامات، بس احنا اللي بنغلوش على صوت العقل، وبنطنش مشاعرنا وبنضحك على روحنا ونقول بكرة غيره، وللأسف محدش بيغير حد، زي ما المثل الإنجليزي مايقول: «What u see is what you get»

اللي إنت شايفه قدامك دلوقتي هو ده اللي تعمل حسابك هيكمل معاك، واللي يقول عارف كل ده بس بحبه، لا ده مش حب يا معلم؛ أي علاقة إنت شايف إنها مؤذية ليك وإنت مكمل فيها مش حب، وهتفوق في يوم وتعرف إنه ماكنش حب بس بعد ما تنضج وتخف، أصل كل واحد راضي يبقى في علاقة مؤذية محتاج يخف.


الجواز مش وحش ولا مشروع فاشل؛ الجواز ممكن يبقى جنة ربنا ع الأرض لو اتعاملنا معاه على إنه وسيلة، وسيلة لأننا نكون سعدا ونسعد اللي معانا، ومفيش حد بيّفوته القطر، لكن فيه حد بيّفوت عليه القطر.

### اللافتة الرابعة:



ليس تعيسًا ولا مسكينًا من فاته القطار،  
التعيس من لا يمتلك شجاعة مغادرة  
قطار لا يتحرك، والمسكين بحق  
من لا يستطيع القفز خارج قطار يحترق!

## البطارية نايمة



## في فيلم (The Bridges of Madison County):

البطلة فرانشييسكا ربة منزل عايشة حياة رتيبة، حاسه بالوحدة وسط عيلتها، بيبان ده في واحد من المشاهد اللي في أول الفيلم، هي وعيلتها بيتعيشوا سوا، محدش بيتكلم معاها محدش بيورها أي امتنان ولا تقدير على تعبها، بعدين جوزها وأولادها بيجهزوا علشان مسافرين في نزهة أربعة أيام من غيرها، سيناريو الفيلم بيورينا هي ازاي مستنية تبقى لوحدها بفارغ الصبر، بعد ما يسافروا بتلاقي فجأة قدام بيتها عربية بتركن بينزل منها مصور فوتوجرافي لمجلة شهيرة اسمه روبرت ضل طريقه، ويسألها ازاي يوصل للكوبري اللي مفروض يلتقط فيه صور، بتطلع توصله للجسر اللي بيدور عليه، بيصورها كام صورة تلقائية من غير ما تأخذ بالها، بتبتسم وبيبان أوي خجلها من مظهرها المهمل، لما بيرجعها لبيتها بتعزمه على كوباية شاي، بيتكلمو سوا عن شغله وعن سفرياتة، ييسمعوا موسيقى ويرقصوا سوا وبنلاقهم بيقربو من بعض.

بظهور روبرت في حياتها بتبدأ تهتم بنفسها؛ بتشتري فستان جديد، ما بنتفاجئش لما نلاقها وقعت في غرامه، بتحصل بينهم علاقة جسدية، وكل ده في أربع أيام بس، ذروة الفيلم بتيجي لما بيكون عليها تختار تهرب معاه بدعوى الحب ولا تفضل مع عيلتها.

## في رواية قواعد العشق الأربعون:

البطلة إيلا عندها مشاكل مع عيلتها؛ مفيش تواصل بينها وبين جوزها اللي عندها قناعة إنه بيخونها، لكن مش قادرة تواجهه، صدام

مستمر مع بنتها المراهقة اللي عايزة تنتقل تعيش مع حبيبها المراهق،  
بتهرب إيلا من مشاكلها بأنها تقضي وقتها كله بتطبخ أو بصحبة كليها.

بتجيلها فرصة تشتغل مع دار نشر، بتتواصل مع كاتب الرواية  
- اللي هي مسؤولة عن مراجعتها، واللي اسمه عزيز- بالإيميل، بتبرها  
أفكاره عن الحياة والحب والخالق، اللي بتخلها تعيد التفكير في نفسها  
وحياتها.

فجأة بتلاقي نفسها بتحبه، بيسافر لها ويتقابلوا، وفي أول لقاء  
بيحصل بينهم انجذاب جسدي بتسيب عيلتها وتسافر معاه إسطنبول،  
وتقف جنبه في مرضه لحد ما يموت.

### في فيلم (the mountain between us):

ألكس وبن بيتقابلوا صدفه في مطار، بيستقلوا طيارة في ظروف  
جوية صعبة سوا، الطيارة بتقع وبيقضوا وقت عصيب وسط الثلوج  
والمخاطر تايهين مش لاقيين مخرج، في وسط التوتر الرهيب ده، وهما  
شايفين الموت بيقرب منهم وفرصهم ف النجاة قليلة جداً، بيبندوا  
يحكوا عن نفسهم لبعض، الموت اللي محاطهم من كل ناحية بيدفعهم  
في اتجاه بعض، بنتفاجأ أنهم حبو بعض، وهوبا علاقة جسدية برضوا،  
بيتم إنقاذهم وبعدها بيكتشفوا إنهم مش قادرين يكملو في الحياة من  
غير بعض ولا يعتبروا اللي حصل بينهم كأنه ما حصلش.

## القصاص الثلاثه دول اللي بيجمع بين الأبطال مش حب

### مش حب، لأ

عربية فرانشييسكا كانت عطلانة مابتدورس، ولو القدر كان حظ في طريقها أي حد غير روبرت يصورها ويسمعها، يساعد عربيته تدور، يديها وصله من بطاريتها كانت هتحبه برضه؛ لأنها جعانة حب وشغف وحميمية، محتاجة حد تفتح عيونها كل يوم الصبح علشانه، تعيش أيامها علشان هو فيها.

ولو عزيز ده كان أي حد ثاني؛ صدقي بقى ولا عتريس، كانت إيلا هتتوهم أنها بتحبه برضه، هي ماحبتش عزيز، هي حبت وجود حب وتغيير في حياتها، حد عربيته زي عربيته، نفس الموديل، حد شهبها قريب منها، عارفة تتكلم معاه عن عربيته وحياتها اللي مش عارفة تدورها، حد يتواصل معاه ويهتم برأيها، يوريها إن عربيته حلوة لكن محتاجة شوية اهتمام. حد من خلاله تكتشف ذاتها، وتعرف إمكانيات في عربيته محدش قال لها عليها قبل كده.

ألكس وبن محبوش بعض، لكن جمعهم تمسكهم بالحياة، موقف عصيب مايبحصلش في العمر غير مرة قربهم من بعض، عربيته غارزين في الرمل وسط الصحرا الواسعة، يبصارعو الموت.

ولأن الناس في الشدائد بتقرب من بعض أكثر فقربوا، أيام الامتحانات مثلاً أو في وفاة قريب بنبقى أضعف وبنمتن للآخرين اللي بيدعمونا ويقفوا معانا أكثر من أي وقت، وساعات بترجم الامتنان إلى حب.

لو كانت فرانثيسكا هربت مع روبرت، ولو كان عزيز عاش وقت أطول شوية مع إيلا، ولو ألكس وبن شفناهم في جزء تاني من الفيلم، كنا اتأكدنا أنه مش حب.

## الحب عشان نتأكد منه

لازم نجابو على الثلاثة أسئلة دول:

### السؤال الأول:

هل أنا شخص مرتاح في حياته ومبسوط؟ عربيته شغالة وماشية زي الفل؟ يعني مش محتاج حد يبسطه، ولا حد يديله وصلة بالبطارية. هل أنا بني آدم عارف نفسه وشغفه وبيسعى يحقق أهدافه؟ قابل شخص تاني متجانس معاه يمشي معاه رحلته، مش يدورله العربية العطلانة.

إجابة السؤال ده بتقول:

الحب ده صحي ولا هو احتياج لوجود حبيب والسلام! لو أنا لسه مش عارف نفسي ولا بحبها ولا عارف أنا إيه رسالتي اللي ربنا خلقتني عشانها، يبقى ازاي هحب حد تاني وهقدر أعرفه.

### السؤال الثاني:

هل أنا أخذت فرصة ووقت أعرف الشخص ده بجد؛ بماضيه واهتماماته وصفاته الشخصية، عيوبه قبل مميزاته؟ متأكد إن سرعة عربيته تواكب سرعة عربيتي، وبحبه زي ما هو مش لأنه مهتم بيا

---

والسلام؟ ولا الموضوع حصل بسرعة، ومن أول نظرة وأنا مكبوب على وشي، وشايف الشخص ماشي عكس اتجاهي وطريقه مش طريقي ومش مناسب لرحلتي وبرضو مكمل؟

إجابة السؤال ده بتقول:

ده حب ولا تعلق. لو أنا عيوني مغمضين، وشايفه ملاك مافيهوش عيوب يبقى مش حب. لو أنا مش مرتاح في العلاقة ومكمل عشان معنديش الشجاعة أمشي، يبقى مش حب برضو.

### السؤال الثالث:

هل الشخص ده يببادلني نفس المشاعر، وأنا الحبيب الوحيد اللي في حياته، ويسعى يكمل رحلته معايا ولا لأ؟

إجابة السؤال ده بتقول:

هل الحب ده متبادل ولا من طرف واحد؟ يعني لو أنا معجب بيه وهو لأ يبقى مابقاش حب، ولو بيعبني بس أصل الظروف أقوى منه ومعندوش استعداد يعمل أي حاجة عشان العلاقة يبقى مش حب، ولو بيعبني أنا بس لسه مش قادر ينسى حبه القديم يبقى مش حب.

لما التلات أسئلة اللي فوق دول تبقى إجابتهم آه.

يبقى ده فعلا حب.

في شارعنا القديم عند بيت أبويا كان عندنا جيران؛ راجل ومراته في سن الخمسين تقريبًا، وماكنش عندهم أولاد وماكنش حد أبدًا يعرف مين فيهم السبب، وعمري ما شفتم ماشيين في الشارع غير ماسكين إيد بعض، ويوم الخميس كان كوبايتين الشاي واللب وقعدتهم في البلكونة


بالساعات بيتكلمو بألف حدوتة حب، ماتت الزوجة وحزن الزوج لكن  
كمل ف الحياة بنفس البسمة وكوبايتين الشاي بقو كوباية واحدة،  
مامتش من غيرها، لكن عاش بيها، وفضلوا للهارده هما في عيوني رمز  
الحب.

### اللافتة الخامسة:





## يا بوليس، يا شاوئيش



سها صاحبتى بنت جمالها أسر، مثقفة متخرجة من جامعة كبيرة، أنيقة جداً، من عائلة كبيرة، مخزن أسرار صحابها بمعنى إن هي الحكيمة اللي فيهم، متجوزة راجل أكبر منها بعشر سنين، من أسرة بسيطة جداً، راجل عصامي بنى نفسه بنفسه مثقف مهتم جداً بمظهره، ناجح وعنده كاريزما.

بعد خمسة وأربعين يوم جواز وهي في أول أيام حملها، كانت سها مضروبة ومتطلقة؛ اتطلقت لمدة نص ساعة وبعدين جوزها قالها إنه ردها وتوسل لهما: «أرجوكي يا سها ماتوصلنيش أمد إيدي عليكى تانى». وسط ذهولها وانهبهاها وتعاطفها مع دموعه قالت: «حاضر».

الحقيقة إن دي كانت أول مرة سها تشوف رجل بيضرب مراته، وكانت أول مرة تنضرب في حياتها، لكن مش آخر مرة تنضرب أو تتطلق.

تكرر الأمر بعد كده كثير، وسها مكملة في الجواز، مش بتحكي لحد عن اللي بيحصل لكن بتحاول تتفادى كل غلطة عملتها وكل كلمة قالتها ممكن تكون استفزت جوزها زي ما كان هو مفهمها، طبعاً ما هي اللي بتستفزه وطبعاً فعلها هو السبب في رد فعله العنيف ده، وفي أحسن الحالات لما كان بيعترف بغلطته كان بيقول إن مسؤولية اللي حصل مشتركة.

سها بقى كانت بتعمل إيه؛ في المراحل الأولى كانت بتعيط وتقعده على جنب مستنياه يصالحها ويعتذر ويوعده إن ده مش هيحصل، بس في الحقيقة ده ماكنش بيحصل، كان بيفضل هو مخاصمها بالأيام وأحياناً بالشهور.

في خلال الشهور دي كانت هي بتعمل كل اللي عليها من مهام منزلية عشان هو يحس بالذنب وبغلطته ويرجع نادم ع اللي كان، بس جوزها ماكنش بيندم ع اللي كان، ساعتها قررت سها توصل المرحلة اللي بعدها وتبطل تقوم بشغل البيت يمكن يحس إنه محتاج لها ولدورها في حياته، بس ده كان بيخلي جوزها يتعصب أكثر ويمد إيده بشكل أعنف.

المرحلة اللي بعدها بقى اختارت إنها تتكلم مع حد عشان يحاول يتدخل يمكن يقدر ينصحه أو يفهمه تبعات سلوكه ووقع اختيارها على أخته الكبيرة مرة ومامته مرة، كانت بتقولهم على اللي بيحصل عشان ينصحوه ما هي النصيحة لما تيجي منهم أكيد هيسمعها، لكن الحقيقة جوزها ماكنش بيتغير، هي كانت بتتئذي وتكتئب وتاخذ مهدئات بس من ناحيته ما فيش أي تغيير بيحصل.

وفضلت سها تنضرب وفضلت كل مرة تقول لنفسها: «أكيد أنا اللي عملت حاجة تثير أعصابه، منا عارفة من الأول إنه عصبي، مامته قالتلي في أول مرة دخلت فيه بيتنا (ابني طيب وحنين أوي، لكن عصبي جداً، ولما بيتعصب مايشوفش قدامه، فرامله سايبة)».

أكيد وانت بتقرا دلوقتي اتعصبت، وقلت تستاهل، هي اللي عملت كده في نفسها، ما هي عارفة من الأول أهو، ولازم كانت تبقى فاهمة إن محدش هيتغير، وإن مفيش حد حنين وطيب بس مؤذي.

أقولك حاجتين:

الأولى: إن سها زهبا زي ناس كتير فاكرين إن الحب بيغير، وإن صبرنا على الحبيب وتسامحنا ووجودنا جنبه في حياته هيغيره للأحسن وده مش حقيقي بالمرّة؛ ناس كتير اتورطت وعاشت تعيسة بأئسة لما قربت من حد وهي ناوية تغير فيه اللي مش عاجبها.

الثانية: إن جوز سها اتغير وبطل يمد إيده عليها، مستغرب أنت دلوقتي وتبسأل نفسك طب ازاى! أقولك أنا جوز سها راح غير الفرامل وركب فرامل جديدة، طبعاً لسان حالك بيقول: «إيه ده بمنتهى السهولة كده! طب ما كان م الأول».

طب اسمع الأول باقي القصة: سها وجوزها سافروا برا لبلد متحضر، وفضلت العلاقة زي ما هي؛ بيضربها ويخاصم أو يعتذر أو يلومها، أو يوعدها بعدم تكرار الأمر، أو يبكي ويطلب منها تصبر عليه لأنه ابتدى يشوف أخصائي نفسي – بعد ما هي عرضت عليه كتير وابتدت هي أصلاً تشوف هي كمان حد بعد ما أصيبت بأعراض اكتئاب واضحة جراء الصدمات المتكررة اللي اتعرضت لها – أو يهاجمها ساعات ويرجع يتهمها إنها هي اللي بتستفزه، أو...أو...

وسها فضلت مكلمة، بس السؤال هنا بقى هو: «هل سها أخذت أي رد فعل حقيقي عشان توقف جوزها عن فعله؟». إنت ممكن تشوف إنها خدت، كلمت أهلها، اتكلمت معاه كتير، عرضت عليه يروح للأخصائي، تسامحت وكلمت يمكن ده يحزن قلبه عليها ويبقى رصيد ينضاف لرصيدها عنده.

لكن الحقيقة إن رد الفعل الحقيقي اللي سها أخذته كان يوم ما كلمت أهلها وحكت لهم اللي حصل لأنها متأكدة إن أهلها مستحيل يوافقوا على ده، عملت ده بعد ما بالفعل اتصلت بالأمن وبمؤسسات تعاقب على العنف ضد المرأة في البلد اللي هما عايشين فيها، عملت ده فساعتها جوزها بقى قدامه حل من اتنين يا يصلح الفرامل بتاعته، يا العربية تتقلب بيه ويفقد رأس ماله وشغله ويتسجن ويتفضح وسط المجتمع المتحضر اللي هو عايش فيه.

إنت أكيد دلوقتي بتقول: «بر افوسها قدرت تغير جوزها».

بس سها مغيرتش جوزها على فكرة، كل اللي عملته إنها غيرت رد فعلها تجاه فعله بشكل يخليه مضطر يغير هو فعله.

سها عاشت عشر سنين من عمرها بتحاول وتبشحد كل طاقتها لتغير شريكها مرة بإنها تقوم بدور الضحية المسكينة يمكن تصعب عليه، ومرات قليلة بإنها تتمرد وتبطل تغسل هدومه وتطبخله يمكن تقوم سلوكه المريض، ومرات بأنها تشتكي لحد من أهله وتعري حته من روحها قدامهم، واستدعاء المواقف المؤلمة دي كان بيضرها هي ويخلي إحساسها بالوجع يتجدد، وكان بيرجعها تحس مكان كل قلم خدته على وشها من جديد.

كل مرة كانت بتتوسل ليه إن ده مايحصلش تاني وهي بتوريه التأثير النفسي اللي بيحصل عليها، كانت بتفتكر ساعتها إحساسها بالحرج والخزي لما حد من زمايلها في شغلها كان يسألها إيه اللي في وشك ده وتألف حكاية عن اللي حصل.

سها عاشت نصف العشر سنين جواز مقتنعة إن الألم هيختفي من حياتها لما تقنع جوزها إنه لازم يصلح الفرامل السايبة أو غيرها لأن عربيتها اتخبطت كثير ومابقتش مستحيلة، وعاشت النص الثاني بتحاول تبذل كل مجهود عشان تغير هي بنفسها وبلاستعانة بالي حوالها الفرامل دي.

لكن الحقيقة إن جوزها اتغير لما هي اتغيرت، لما غيرت رد فعلها وقررت إن سلامة عربيتها أهم، وإن دورها تحافظ على أمنها وأمانها جوا عربيتها اللي هي حياتها، مش تصلح عربيته هو، جوزها اتغير لما ركزت على نفسها وكرامتها وصحتها النفسية والعقلية.

لما نزلت بنفسها بلغت الأمن إن فيه راجل سايق من غير فرامل ويبخبطها كل شوية، ساعتها بس منعه من السواقة وأخدو منه الرخصة لحد ما يغير فرامله، وساعتها غير هو الفرامل بتاعت عربيته. مش دورك تصلح عربيات الآخرين، لكن دورك تركز في عربيتك وتحمها من أخطاء اللي حواليك.

### اللافتة السادسة:



# أنا ألف الكرة الأرضية ولا إني أنزل النفق



إنت راكن عربيتك الجديدة قدام الفيلا بتاعت خالك؛ اللي العيلة كلها معزومة عنده على الفطار النهارده، وإنت قاعد مسترخي في الجينية وشايف كل شوية حد من قرابيك اللي مشفتهمش من زمان داخل من باب الفيلا المفتوح فبتقوم تسلم، ومن حين لآخر بتسمع صوت إنذار عربيتك.

فتبص مرة تلاقى خالتك حاطة طبق البسبوسة اللي هي عاملاه بإيديها على كبوت العربية على ما تدور على موبيلها في شنطة إيدها وتتأكد إنها منسيتوش في الأوبر، فتترسم على وشك بسمة وتقوم تشيل معاها.

شوية وتلاقي جوز أختك حاطط آخر العنقود على شنطة العربية، وبيربط له رباط الجزمة، يلمحك؛ فينادي: «خالو أهووو». فتقوم تحضنه وإنت عارف إنه خلاص وقت الاسترخاء بقدوم القرد انتهى.

تخيل معايا بقى لو إنت قاعد نفس القعدة في الجينية ولما سمعت صوت الإنذار بصيت لقيت شخص غريب بيحاول يفتح باب عربيتك ساعها هتتخض، هتتوتر، مستوى الأدرينالين في دمك هيعلا لأن ده إنذار بالخطر، شخص غريب يحاول اقتحام سيارتك.

ده اللي بيحصل على أرض الواقع على مستوى العقل الواعي، تعال بقى نشوف ما وراء كواليس العقل اللاواعي (الباطن): لما خالتك حطت طبق البسبوسة على الكبوت، ولما جوز أختك رفع ابنه ع الشنطة ف الإنذار اشتغل فأنت التفت؛ بصيت بعيونك اللي بعنت إشارات لمحك الواعي؛ اللي استقبل صورة العمة وجوز أختك وآخر العنقود وقارنهم بالصور المخزنة جواه، وطلع باستنتاجات.

استنتاج رقم 1: أنا عارف الناس دي، وتعاملت معاهم قبل كده.  
 استنتاج رقم 2: الخبرات السابقة بتقول إن التعامل معاهم مفيش فيه أي تهديد ولا أي داعي للشعور بالخطر.  
 استنتاج رقم 3: صورة خالتي وابن أختي مرتبطة في ذهني بذكريات محببة.

أول ما توصل للاستنتاج الثالث ده بتلاقي المخ يببع إشارات لعضلات وجهك وذراعيك فترسم البسمة وتقوم فاتح دراعاتك لحضن خالتك وابن أختك. كل ده حصل في اللاوعي وفي أقل من ثانية، في حين كل اللي عقلك الواعي فهمه:

– خالتي جت.

– أهو القرد الصغير شرف.

بعدين كل المشاعر اللي حسيتها وكل ذكريات يوم العزومة ده بتتسجل تاني في المخ؛ عشان المرة الجاية اللي تشوف فيها خالتك وابن أختك، يقوم عقلك اللاواعي يسترجعها كمعلومات تخليك تصدر رد فعل، يا يكون بينم عن السعادة يا التوتر لرؤيتهم، حسب الذكرى اللي اتكونت.

فيبقى العقل اللاواعي كل وظيفته إنه يتأكد إنك آمن، ويبعدك عن أي مصدر للخطر، العقل الباطن وظيفته يحميك، في حين إن إدراكه للعالم الخارجي ضعيف جدًا.

على عكس العقل الواعي اللي وظيفته إنه يجمع معلومات عن طريق الإدراك المباشر، ويكون صور وأفكار ورموز يبعثها للعقل اللاواعي؛ اللي

دوره يصنف البيانات دي ويقسمها في خانات، لأن ده اللي يقدر عليه؛  
يقسم الأشخاص إلى:

- شخص تدعمه.
- شخص يدعمك.
- شخص تربطك به علاقة عاطفية.
- شخص تهرب منه.
- شخص يرؤسك.
- شخص تهاجمه.

ليا صديقة جت من فترة حكنت لي موقف حصل بينها وبين جوزها  
وهي مكسوفة أوي من نفسها ومستغربة جدًا رد فعلها، وعاوزاني  
أساعدها تفهم هي ليه اتصرفت كده. ابتدت عادة تحكي:

– الأسبوع اللي فات كنا عازمين حماتي تقعد معانا كام يوم، أنا  
مكنتش مرتاحة أوي إنتي عارفة ذكرياتي مع زياراتها لينا مش لطيفة،  
بس قلت يومين وهيعدوا، المهم في يوم هي قاعدة معانا على السفرة،  
وأنا طابخة فضلة خيرك فراخ مشوية ومحشي وملوخية، وجه مكان  
طبق الفراخ قدام محمد، وفضل طول الوقت يتحايل على مامته: «طب  
حتة كمان، طب عشان خاطري»، وبعدين وأنا بشيل الأكل من على  
السفرة لقيته بيقول: «إيه ده يا غادة إنتي ما أكلتيش فراخ ليه؟» قتلته:  
«صراحة ماليش نفس لها النهارده» ومن غير ما حد ياخذ باله جريت  
على الحمام وبقيت أسح بالدموع، هو لسه فاكرك، يعني قاعد مركز  
أوي مع مامته وناقص يأكلها في بقها ونسيني أنا خالص، وأنا اللي واقفة  
وتعبانة وطابخة، كنت متضايقه منه أوي، ومش لاقايله عذر، خاصة  
إن دي مش أول مرة؛ دايمًا وجود مامته بينسيه وجودي، وكل ما آجي

أحط نفسي مكانه أقول عمري ما كنت هعمل كده. هو غالبًا حس إني مش كويسة وبالليل قبل ما أنام لقيته بيقوللي: «مالك؟ إنتي تعبانة؟ أخذت بالي إنك ما أكلتيش كويس النهارده؟»، هو قال كده من هنا وأنا انهرت يا بنتي، وجبت بقى الجديد ع القديم وبهدلته.

سألتها:

– وهو كان رده إيه؟

– قال لي: «يا غادة، أنا بعمل زيك، بقلدك؛ إنتي طول الوقت رايحة جاية تتحايلي عليها عصير، فاكهة، حلويات، قلت أنا ابنها ميصحش أبقى مطنشه كده. أنا بتعامل إننا صحاب البيت، وهي ضيفة، لقيتك تعبتي النهارده في المطبخ قلت أشيل عنك عبء ضيافتها شوية».

كلام جوز غادة منطقي وبديهي يعني، هي ست البيت أصلًا، ولو مامته مش موجودة كانت غادة بمنتهى البساطة طلبت من جوزها يناولها طبق الفراخ من غير قمص وزعل. طب أمال إيه اللي حصل مع غادة هنا؟

الحقيقة إن اللي حصل ده ماكنش دلوقتي لكن كان من عشرات السنين اللي فاتوا، ولأن العقل اللاواعي ما بيقدرش يميز بين الماضي والحاضر؛ بمعنى إن كله عنده في الزمن الحاضر، فكان ده رد فعل غادة على سنين من الحادث.

نرجع سنين ورا:

غادة طول عمرها طفلة بدينة...

كانت مامتها طول الوقت بتحاول تجبرها تعمل ريجيم، وكان لها أخت نحيفة جداً ومصابة بالأنيميا طول الوقت، وطبعاً كانت الأم بتخبي الأيس كريم والشيكولاتة من غادة لكن كانت بتتحايل على أختها علشان تاكل، كبرت غادة وهي دايمًا تتهم مامتها إنها بتدلل أختها وتنديها حنان أكثر منها، كبرت غادة وتخلصت من وزنها الزائد للأبد بعملية جراحية، لكن فضلت ذكرى الجلوس على مائدة -هي محرومة من نص أصناف الأكل عليها في حين فيه حد تاني بيتم استجدائه علشان يأكل - ذكرى بغیضة مؤلمة.

لما موقف حماتها حصل عقل غادة اللاواعي معرفش يفرق إنها دلوقتي غادة الكبيرة اللي وزنها بقى مثالي، صاحبة البيت، لكن اللي حصل رجوعها سنين ورا من غير ما تاخذ بالها.

ورد فعل عقلها الباطن كان بهدف يحميها من الألم اللي حسته وهي صغيرة؛ فعشان كده ثارت على جوزها، كأنها بتقول لأ، مش هسمح لده يحصل تاني، أن الأوان أحمي غادة الطفلة.

مش بس غادة، أوقات كتير أوي نلاقي غضبنا أكبر من الحدث، خوفنا مش مبرر، نفورنا من شخص ما عملناش حاجة لكن بيفكرنا بحد تاني ضايقنا وقت ما كنا أطفال، ساعتها اللي بيتصرف مش بيكون أنا العاقل البالغ، لكن العقل اللاواعي اللي بيحاول يحمي الطفل اللي جوا اللي اتأذى من حاجة زمان.

عشان كده كان مهم قبل ما غادة تثور على جوزها، تقف مع نفسها وتحاول تفهم منبع الغضب اللي جواها ده إيه؟ وتطمئن الطفلة اللي جواها، تكتبلها جواب مثلاً.

أيوا تكتب جواب من غادة ذات الأربعين ربيعاً لغادة بنت العاشرة، تطمئنها فيه وتقولها إن كل زمام أمورها في إيديها، وإن محدش يقدر يوجعها تاني، وتخلي غادة الطفلة ترد عليها هي كمان بجواب.

غادة اختارت تكتب جواب لمامتها اللي ماتت من سنين، بقلم الطفلة المجروحة اللي جواها، تشرح لها مشاعرها اللي كانت بتحسها زمان لما الأم كانت بتخبي منها الأكل اللي بيزود وزنها. لأن التعبير عن المشاعر وتسميتها بالكتابة يساعدنا نفهم اللي جوانا وبيطمئن عقلنا.

عقل غادة الباطن اتعود لما يشوف جوزها ومامته المريضة سوا، يفتكر مامتها وأختها اللي كانت مريضة هي كمان، واتعودت تشوف نفسها ضلع المثلث التالت المنبوذ، وساعتها بيتحط الزوج في خانة الشخص الذي يجب مهاجمته تماماً زي ما كانت بتعمل مع الأم.

ده يمكن كمان طبق الفراخ اللي اتحط بالصدفة قدام الزوج ماكنش صدفة، أه مش موقف مدبر منها، لكن ممكن تكون اتصرفت كده وعقلها الواعي مش مدرك ده أصلاً عشان بس تختبر جوزها، أو تشوف اللي كان بيحصل زمان هيتكرر تاني ولا خلاص كده.

كام مرة لقيت نفسك متوتر وإنك طالع كبري أو نازل نفق؟ تعرف كام شخص بيقول لأ أنا مركبش جنب السواق أبداً؟ فيه كام طريق بتلاقي نفسك بتجنبه وأنت ممكن ماتكونش عارف السبب حتى؟ كام مرة قفشت نفسك متعصب لمجرد إن حد كسر عليك أو عداك؟

---

غالبًا بتكون المشكلة في اللي عقلك اللاواعي مخزنه من ذكريات في اللي يخص المواقف دي، والموضوع مرتبط عندك بذكرى مؤلمة.

ساعات يبقى قدامنا الشخص المناسب، وتلاقينا نخترع أسباب عشان نسيبو ونمشي، لأن عندنا رعب إنو ينزل بينا نفق الخذلان المظلم، أصل الماضي قال لنا إن الحب مرتبط بالتخلي والخذلان.

أوقات تانية نخاف نطلع كبري المغامرة عشان كل المغامرات اللي أخذناها في حياتنا خسرتها؛ فبقت المغامرة مرتبطة بالفشل، فنلف الكرة الأرضية ونمشي سكك طويلة بس مانزلش نفق ولا نطلع كبري.

### اللافتة السابعة:



ردود أفعالنا المبالغ فيها

لا تخصصنا،

تخص صغيرًا كناه يومًا!

## هاتشباك ولا 7 راكب



---

عندي صديق، العربيات لعبته، أكثر شخص على الكوكب يفهم  
فيهم، بيعشقهم عشق...

اتصلت بيه:

– علي، أنا عاوزه أشتري عربية؟

– مبروك مبروك، ها عاوزه تشتريها إيه.

– لأ، معرفش، أمال أنا بكلمك ليه؟

– طب عاوزه مواصفاتها إيه؟

– لأ، معرفش، بس عارفة المبلغ اللي أقدر أدفعه فيها؟

– حلو جداً، تعالي نتقابل في أي معرض عربيات قريب ونتفرج  
ونتكلم.

وأنا في الطريق كلمتني بنت خالتي اللي لسه مخطوبة جديد:

– إزيك يا رنا وازاي محمود؟

– أنا كويسة، محمود بقى معرفش.

– إيه مالك؟ إنتو اتخانقتو تاني ولا إيه؟

– زهقت والله العظيم، على طول مش فاضي وعلى طول تليفونه  
مش متاح وبشوفه بالعافية؟

– إيه ده؟ ليه كده؟

– شغله وامتحانات الدكتوراه اللي بيعملها.

– طيب حبيبتى ما إنتي عارفة أهو؟

– أيوا بس مش كده، ما إنتي شايفة هند جوزها بيشتغل معاه في نفس الشركة وكل شهر بتخليه يسفرها حته؛ مرة الجونة، مرة دهب، زي الخاتم في صباعها، ولسه من كام يوم عاملها حفلة عيد ميلاد تجنن وصورهم سوا مغرقة الانستجرام.

– يا بنتي هند جوزها موظف عند خطيبك – اللي هو صاحب الشركة أصلاً– بيخلص شغله ويروح بيتهم، لا بيعمل دكتوراه بقى ولا بيبي فيلا في زايد، وبعدين ما إنتي طول عمرك عايزة راجل غني أوي، وطموح وناجح وقائد في شغله وتتهزله جبال، جاية دلوقتي عاوزاه يعمل لك حفلة عيد ميلاد مفاجأة بالتعاون مع الأهل والجيران والأصدقاء، وياخدك سفاري كل ويك إند، وسينما وأوبرا، وطول النهار بيعت لك أغاني على الواتس آب، ويبقى خاتم ف صباعك زي جوزهند. طب ازاي؟

ما هو لو بالموصفات دي؛ ناجح وقائد وطموح، هيجيب منين وقت لأنه يبقى متاح للحفلات والسفاري والأوبرا؟ لوهوقوي وناجح هيبقي الإيجو بتاعه عالي أوي وصعب يبقى خاتم في صوباع حضرتك.

– يا بنتي إنتي مش فاهمة...

أنا بقاطعها:

– معلش يا رنا سلام دلوقتي، عشان خلاص وصلت، وعلي مستنيني في المعرض بقاله ساعة، هكلمك بعدين.

...

قابلت علي وبعد السلام والملام:

– إزيك يا هانم؟ ها قوليلي، إنتي محتاجة إيه من العربية؟

– إيه السؤال الغريب ده؟ هكون محتاجة منها إيه يعني؟ تغسلي  
المواعين!

– لأ يا لمضة هانم، يعني أقصد عايزاها عربية سيدان ولا عالية  
ولا رياضية ولا اقتصادية ولا عائلية ولا إيه؟

– يا الله، إيه كل ده! ده الموضوع طلع كبير، بالراحة بقى  
وفهمني، هتفرق في إيه؟

– هتفرق إنك ماينفعش تشتري عربية صغيرة أوي مثلاً وإنتي  
أهم حاجة عندك إن الشنطة تكون كبيرة عشان بتنقلي فيها حاجات.  
مينفعش تكوني عايزة تشتري عربية وناوية تبيعها بعد سنتين تلاتة  
وتشترى عربية مش مطلوبة في السوق المصري فيبقى سعر إعادة  
بيعها قليل، فتخسري وهكذا.

– لأ، ده إنت كنت معايا وأنا بكلم رنا بقى.

ساعات نلاقي راجل بيقول عاوز ست تبقى بتاعتي لوحدي، ويتخدم  
أهلي ورهن إشارتي، ومابتدقش معايا في حاجة، وترضى بقليلها، وتسييني  
أقعد ع القهوة مع صحابي، بس تكون قوية وطموحة وبتعتمد على  
نفسها وتاخذ قراراتها لوحدها وأفخر بيها قدام الناس.

طب ازاي؟ ما هي لو بترضى بأي حاجة مش هتبقى طموحة، ولو هي  
بتاخذ قراراتها لوحدها وعارفة تدير شؤونها وبتخليك تفتخر بيها قدام  
الناس هتبقى رهن إشارتك ليه!

البنى آدم ما بيتجزأش، هي باكدج؛ بتتاخذ على بعضها.

(take it or leave it)

شوف إيه أولوياتك، وإيه اللي تقدر عليه وتستحمله، واختار الإنسان اللي يغطي احتياجاتك دي، ما تاخدش حد عشان صفة وتطلب منه يدفن بقية صفاته في التراب عشان باقي الصفات دي مش مناسبة لسعادتك، شوف عاوز إيه في شريكك ودور على الشخص اللي تنطبق عليه احتياجاتك، وخده زي ما هو، وماتحاولش تغيره؛ لأنه لو اتغير الصفات اللي حبيته علشانها مش هتبقى موجودة، وساعتها هتبقى عندك مشكلة.

عاوز تاكل رنجة براحتك، بس متشتكيش إنها زفرت ريحة إيدك. عاوزه تخسي كلي سلاطة وماتعيطيش إنها مش نفس طعم الجاتوه. وفكري نفسك دايمًا؛ أنا حبيته عشان عملي وواقعي مينفعش دلوقتي أقوله إنت مابتجلبيش ورد ليه يا إبراهيم!

أنا اتجوزتها عشان هي خجولة وبتتكسف من أنوثتها ومالهاش في اللبس والمكياج، فماينفعش دلوقتي أقولها إنتي ليه مش بتلبسيلي وتدلعييني زي الستات.

### حدث بالفعل

هو: أكثر حاجة بتعجبني فيكي إنك مش بتغيري عليا بشكل يخنق، غيرتك عاقلة، عمرك ما طلبتي تبصي في تليفوني ولا تعرفي الباسوورد الخاصة بيا.

هي: حبيبي دي مساحتك الشخصية ماينفعش أعديها.

بعد شهر...

هو: جاتلك إشعار رسالة من فلان امبارح.

هي: أه ما انت عارف ده عميل.

هو: أنا مش فاهم أنا ليه مايقاش معايا الباسوورد بتاعتك؛ أفتح

تليفونك وأقرا اللي بيجيلك أي وقت؟ أنا كده مش مرتاح.

ده راجل عاوزها واثقة في نفسها وغيرتها عاقلة، وتحترم مساحته،

بس تديه كلمة المرور بتاعت تليفونها، طب إزاي؟ ما هي لو مش بتحترم

مساحتها الشخصية وتحافظ عليها وعارفة إن مش من حقه يقرأ

الرسائل اللي بتجيلها من وراها، مش هتحترم خصوصياته هو كمان،

وهتلاقها بتفتش وراه.

المهم وأنا بتفرج على العربيات لقيتني بقول لعلي:

– عاجباني أوي العربية دي، بنت ناس كده في نفسها وأنيقة

جدًّا وفيها كل اللي أنا محتاجاه بس مضايقي إنها مش بتاعت سفاري

ومهدلة.

ساعتها لقيت علي بيبرق وبيقول:

– إنتي هتجنيني! إنتي عايزاها أنيقة يبقى إزاي تبقى بتاعت سفاري؟

هات ورقة وقلم واقعد اكتب مواصفات عربيتك أو حبيبتك/

اقعدي كده مع نفسك بالورقة والقلم اكتبي المواصفات اللي عايزاها في

عربيتك، أو شريك حياتك، وقسموها لخانتين:

## • الخانة الأولى مواصفات جسدية:

عربية أنيقة/ رجل كلاسيكي المظهر/ امرأة تهتم بمظهرها  
أو

عربية رياضية شبابية/ لابس بنطلون مقطع وعامل فورمة  
الساحل/ ست رشيقة محافظة على وزنها عايشة جوه الجيم،  
وهكذا...

## • الخانة الثانية: مواصفات شخصية:

عربية اقتصادية بتوفر في البنزين وقطع غيارها رخيصة/ بيزنس  
مان عصامي وعارف قيمة القرش/ ست لبسها بسيط ومدبرة.  
أو

عربية أوروبية فخمة/ رجل يبجب يصرف على مظهره وخروجاته  
وسفرياتة/ ست ارستقراطية هانم في نفسها.  
وماتكتبوش حاجة بالنفي، العقل الباطن مايفهمش نفي، لو  
كتبتي مش بخيل هتقعي في واحد بخيل، لو كتبت مش مسرفة هتقابل  
المسرفة وهتحبها.

وكل يوم قبل ما تناموا بصو في المواصفات دي، واقروها بصوت  
عالي، وبعد فترة هتذهلوا بالنتيجة لما تلاقي إنكوا بتقابلو الأشخاص  
اللى فيهم المواصفات دي طول ما أنتوا ماشيين.


---

اللافتة الثامنة:



لا تبعد عن حبيب  
لنفس السبب الذي أغواك  
للاقتراب منه!

إذا كانت سيارتك فرنسية فلا يجب أن  
تتحدث معها بالألمانية!



---

– إيه يا ابني اللي إنت عامله في عربيتك ده؟

– إيه مالها؟ مش عاجباكي؟!

– عجباني إيه؟! ده أنت شوهتها يا أحمد، حد يعمل كده في  
عربية ألماني شارها برقم فلكي! دي بقت توكتوك.

– بدلها، قلت أعملها شوية حركات وحبشكتنات، وبعدين نهتم  
مايعجبش، ما نهتمش تقولوا أصل الاهتمام ما بيتطلبش، إلا صحيح هو  
الاهتمام بيتطلب ولا مبيتطلبش يا أختي؟

– عايز رأيي، ولا رأي تشبمان؟

– مين الأخ ولا مؤاخدة؟

– الكاتب الشهير جاري تشبمان عامل كتاب اسمه لغات الحب  
الخمس؛ يقول فيه إن كل إنسان فينا ليه الطريقة اللي بيها بيحس  
إنه محبوب، وإنه في العادة كل واحد بيختار يهتم بشريكه ويعبر ليه  
عن حبه بنفس الطريقة اللي هو يتمنى يستقبل بيها الحب، وإن ده  
ساعات بيبقى خطأ كبير بنقع فيه لما بنفتكر إن شريكنا بيتكلم نفس  
لغتنا.

– هو الحب طلع فيه لغات كمان؟

– أيوا طبعًا، أصل ماتجيش حضرتك تبقى عربيتك فرنساوي وتروح تجيب لحبيبتك قطع غيار فرنساوي وهي أصلا عربيتها ألماني، عشان اللي يناسب عربيتك مش هو اللي يناسب عربيتها، ولذلك يا أخي العزيز مهم جدًا تعرف لغة حبيبتك إيه، وبعد ما تعرف لغتها تتعلمها عشان تعرف تمارسها في علاقتك بيها. أصل مش حاجة بتحصل كل يوم إن اللي بنحبه تبقى عربيته نفس ماركة عربيتنا، الطبيعي إن كل واحد فينا تبقى له لغة اهتمام وتقدير خاصة بيه هو، ممكن تتصادف ولغته تشبه لغتنا، وممكن لأ، فمهم أهتم بعربية حبيبتني، ومهم أملا خزان وقود جوزي؛ عشان يفضل فيه حب، لكن الأهم إنني أهتم بيها بالطريقة اللي هي تفهمها؛ بمعنى إنني أقدم لخطيبتني الحاجات اللي تناسب موديل عربيتها، وأملا خزان وقود جوزي بنوع البنزين اللي ينفع عربيته؛ فعشان العلاقة تفضل مزهضة، وبتعود عليا بالسعادة؛ واجبي أعرف إيه لغة شريكي في الحب وأكلمه بيها، وحقني على نفسي أفهم إيه لغة الحب اللي أتمنى شريكي يكلمني بيها وأطلبها منه.

– أطلبها منه! يعني الاهتمام طلع بيتطلب أهو؟

– أيوا طبعًا، طريقة الاهتمام بتتطلب، أصلك مش هتروح لبني آدم أنت مش فارق معاه وماتربطكش بيه أي علاقة إنسانية من أي نوع وتقوله اهتم بيا، أنت هتطلب طريقة معينة للاهتمام من شخص بالفعل مهتم.

– وإيه هي بقى لغات الحب دي؟

– بص تشبمان في كتابه قسم لغات الحب لخمس لغات هي:

## اللغة الأولى:

### الكلمات

فاكر زمان لما كنت بحب أقرا لنزار وبابا كان بيخاف عليا ويقول  
سيبك من الشعر والكلام الفارغ ده، الحب اللي بجد أفعال مش كلام.  
وكنت أرد عليه وأقوله أكيد مخترع العبارة دي:  
رجل أبكم حبيبته صماء.

أصل مين فينا مايبحبش يسمع كلام حلو يعزز ثقته بنفسه  
ويحسسه بأهميته؟ أكيد كلنا؛ كلنا بنتبسط لما القريبين مننا يقولولنا:  
إن لبسنا النهارده حلو، أو إننا وحشناهم، أو إن القعدة كانت ناقصانا  
والخروجة ملهاش طعم من غيرنا أو إن ذوقنا في اختيار العفش حلو، أو  
إن نفسنا في الأكل يجن.

يمكن الست بتحب بودانها أكثر من الرجل، لكن الراجل كمان  
بيحب يسمع كلام يطمئه إن حبيبته شايفاه حلو، وإنها متطمئة بوجوده  
معاه وإنه هو بالنسبة لها الونس.

الكلام الحلو له مفعول السحر مع أي بني آدم، جرب تقول  
لصديقك اللي زعلان عشان ماسألتش عليه: «حقك عليا، إنت ليك  
حق طبعا تزعل مني، بس أنا بحبك وما تمناش تكون متضايق».  
وشوف هيمدى ازاي!

إحنا من وقت ما كنا أطفال وكنا نعمل حاجة فخورين بيها كنا  
نجري على أهلنا عشان يقولوا لنا: «الله، الرسمة دي جميلة!»، أو:  
«شاطرين» عشان خلصنا طبقنا.

كلنا عاوزين نسمع إننا مهمين، لكن الناس اللي الكلام لغتها الأساسية في استقبال الحب، بيحتاجوا يتقالهم كلام حلو أكثر من غيرهم، واللي تشبمان بيقوله في كتابه هنا إن الشخص اللي محتاج لغة الكلام الحلو من اللي حوالية كتعبير عن حبهم ليه هو نفس الشخص اللي طول الوقت بيقول كلام حلو اللي حوالية، بمعنى إنه بيدي اللي هو محتاج ياخده.

الشخص اللي الكلام لغته الرئيسية لو ماسمعش كلام إطراء تحفيزي بشكل متكرر، بيحس ساعتها إنه مش محبوب، ويبقى عنده مشكلة في العلاقة، ويحس إن احتياجاته مش مشبعة ويبتدي خزان الحب بتاعه يقل.

عارف إنت النبي آدم اللي بكلمة يطلع السما ويديك عيونه، وكلمة تانية ينزل سابع أرض! هو ده اللي الكلام لغة الحب الأساسية بتاعته.

في زماننا ده الكلام بقى أكثر لغة؛ الشباب بيستخدموها للتعبير عن الحب؛ اللي ممكن يكون لسه لا يرتقي لمرحلة الحب أصلاً، لدرجة الكلام ساعات بيتقال من غير ما يبقى الشخص يقصده بالفعل، ولا يحسه.

لكن على النقيض والمؤسف جداً، إن الأزواج والزوجات هم أقل فئة بتستخدم اللغة دي، مع إن مهم أوي نخلق لحظات تخلي قلب الإنسان اللي اختارناه واختارنا يرجع يدق دقة زيادة، مهم نخلي شريكنا يرجع يحس بالشغف في العلاقة من تاني، مهم نباغته، نربك مشاعره زي أيام اللقاء الأولى والوسائل كتير:

• اكتب ورقة صغيرة فيها كلمتين من قلبك، كلمتين حقيقيتين عن شريكك، وسيبها له فوق شاشة موبايله أو على مراية الحمام، ماتبعتش رسالة مستهلكة متداولة على الميديا، اكتبها بخط إيديك، حط فيها مجهود، سيب له فيها ريحة كف إيدك.

• انتهمز أي فرصة واثني عليه قدام أهله، صحابه، أطفالكم، ده له تأثيره مضاعف وما بيتنسيش.

• لو عمل حاجة زعلتك بلاش تهاجمه، لكن قوله إنك مش متعود منه على كده، وإنك متوسم فيه الخير دايمًا، ومستني منه كل حاجة حلوة.

كل ده بيوصل رسائل إيجابية مليانة حب وطمأنينة وبيملا خزان الحب بتاع شريكك.

– أهو دلوقتي هموت وأعرف إيه هي لغتي! الحقيني بقى بالتانية؟

## اللغة الثانية:

### تكريس الوقت

اللي هو الكواليتي تايم؛ نقعد سوا بنحكي ونسمع بعض باهتمام، نروح سوا سينما عشان بنحب الأفلام، وقت حبيبي بيشاركني فيه الحاجة اللي أنا بحبها وهو مبسوط، أو أنا بشاركه فيه هواية هو بيحبها، مش مهم الوقت ده مدته أد إيه، لكن مهم إن الوقت ده يكون فيه تواصل واندماج حقيقي.

للأسف دي أكثر لغة إحنا مفتقدينها في زماننا ده، ده إحنا حتى لما بنخرج مع صحابنا نتغدى في مطعم، كل واحد يفضل باصص في تليفونه طول القعدة وكأنا خارجين نقعد مع تليفوناتنا.

زمان كنت تلاقي الناس على القهاوي بيتكلمو سوا، بيسمعو بعض وهما قاعدين مندمجين سوا وفي الخلفية الست أم كلثوم بتغني، أو الأزواج اللي كانوا متعودين يطلعوا يقضوا السهرة في البلكونة مع صينية البطيخ أو شوية ترمس، دول اللي فعلاً كانوا عارفين قيمة تكريس الوقت.

ساعات كتير وأنا قاعدة في مطعم أو كافيه الأقي اتنين قاعدين مقربين من بعض، وإيديهم على الترابيزة اللي بينهم، باصين لبعض، بيتواصلوا وهما بيضحكوا، خارجين من بيتهم عشان يتواصلوا سوا ويتبسطوا.

وساعات الأقي اتنين قاعدين أكثر من ساعة مافتحوش بقهم، محدش فيهم حتى سأل الثاني هتطلب إيه، عدد الكلمات اللي اتكلموها مع الجرسون أكثر من اللي دارت بينهم، وكأنهم خارجين ياكلوا وبس.

اللغة الثانية دي هي اللي ساعدتني بشكل شخصي أفهم طبيعة شخصية حد من الأشخاص القريبة مني لما اكتشفت إنه رافض التواصل، الحميمية كانت بتزعجه، أي محاولات مني أني أقضي وقت معاه كانت بيقابلها مقاومة من ناحيته، ساعتها عرفت إن عنده مشكلة حقيقية في اللغة دي، اللي هي بالنسبة لي أنا مثلاً أهم لغة.

فيه لعبة اتعودت ألعها مع شريكي ومع ولادي ومع صحابي، لعبة لطيفة بتخلينا نقرب من بعض ونقضي وقت بنضحك، واحنا فيه بيننا

---

تواصل حقيقي، أنا مسمياها لعبة الاختيارات الأربعة:

كل واحد يبقى عليه الدور يسأل سؤال عن نفسه ويطلب من الآخرين يجابوه بعد ما يديهم أربع اختيارات، ولو الإجابة طلعت صح بيختار مكافأة، المكافأة دي حب برضه بس بلغة الفائز: (هدية/ حضن/ مساج للرقبة).

أو اللي يفوز في الآخر خالص بإنه يجمع أكبر عدد من النقط هو اللي بيختار الفيلم اللي هنشوفه أو المطعم اللي هنتعشى فيه أو بنجبله شيكولاتة أو أي حركة لطيفة كمكافأة.

مثال للأسئلة: تفتكر لو أنا مش إنسان كنت أحب أبقى إيه؟

• شجرة؟

• عصفورة؟

• بحيرة؟

• سحابة؟

ويجابوب الحبيب: أكيد عصفورة عشان إنتي مبتحبيش حد يقيد حريتك.

وتكون إجابتي: إيه ده برافو، أنا فعلاً كده. مبسوفة إنك عارف ده عني، بس أنا بخاف من الطيران؛ نسيت آخر مرة سافرنا وكان فيه شوية مطبات هوائية أنا عملت إيه، ونستدعي ذكرياتنا سوا ونضحك.

بيجي دوره: تفتكري إيه الحاجة اللي بتحسني إن اليوم بتاعي كان

مثمر:

- إني أروح الجيم؟
- إني أخلص كل التقارير وأبعث كل الإيميلات المطلوبة مني؟
- إني ألق أقرأ شوية؟
- إني أتفرج على فيلم؟

الحوار اللي زي ده بيخلينا نفهم شريكنا أكثر، ونعرف أولوياته ونوريه إنه متشاف ومهم، وبتبقى وسيلة غير مباشرة نوصل له بيها طلب أو أمنية نتمناها، من غير ما نكون بندي أوامر، زي مثلاً: (تفتكر إيه أكثر حاجة بزعل لما بتنسى تعملها؟). وأديله اختيارات.

أنا كده بعرفه حاجة ممكن تكون بتزعلي منه، أو حاجة عاوزه أعرفه إنها مهمة بالنسبة لي، لكنها غايبة عنه، بقول ده واحنا بنلعب وبطريقة لطيفة وحميمية.

اللعبة دي بتشجع الأشخاص اللي ما اتعودوش يعبرو عن نفسهم—عشان طلوعوا في بيوت مبتشجعش الأطفال على التعبير عن مشاعرهم وأفكارهم—إنهم يحكو ويقولوا ويعبروا.

اللعبة دي كمان لطيفة أوي؛ لأن في الزمن الحالي ووسط زحمة الحياة صعب أوي نلاقي وقت نخرج فيه سوا أو نتفرج على فيلم بالليل بعد الشغل، لكن دي لعبة ممكن نلعبها واحنا بنتعشى سوا، أو واحنا رايعين للدكتور وواقفين في الإشارة.

الأشخاص اللي دي لغتهم لو ملاقوش الحبيب بيوفر لهم وقت للتواصل الحميمي بيعتقدو إنهم مش محبوبين، وبيبتدي خزان الحب بتاعهم يفضى.

عشان كده مهم أوي لو أنا عارفة إن دي لغتي الأساسية، ومتقدملي واحد هيعيش في بلد وأنا في بلد، أو طبيعة شغله هتخليه غايب عني طول الوقت إنني أبقى متوقعة إنه مش أنسب اختيار ليا.

الحب رابطة هي لوحدها مش بالقوة اللي إحنا متخليينها، فلو ماكنش فيه تواصل ورغبة في معرفة الآخر واحتواؤه والاستمتاع معاه وبياه، فالحب بيخلص. الحب زي أي حاجة ع الكوكب بيخلص.

– أنا لسه مش لاقى لغتي على فكرة ادخليلي بقى ع اللغة الثالثة.

– حاضر، اللغة الثالثة من لغات الحب هي أكثر لغة إنت بتفهمها يا أخويا الحبيب، ومتأكدة إنك هتقول هي دي.

– الهدايا؟

– بالضبط.

## اللغة الثالثة:

### الهدايا

أخويا: ورد بقى، هدية عيد ميلاد، شيكولاتة، بمناسبة وبدون مناسبة.

– أكيد، الهدايا من أكثر الحاجات اللي بنستعملها للتعبير عن حينا للي قدامنا، وأكيد كلنا بنحب نستقبل هدايا من اللي بنحبهم جدًّا، لكن فيه شخص عنده الهدايا هي اللغة الرئيسية للتعبير عن الحب، أهم حتى من إنه يسمع كلام حلو أو إنه يقضي وقت مع حبيبه.

الناس اللي لما بتمسك الهدية كده في إيديها وتقول أيوا بيحبني، وهو ده الدليل على حبه، أصله أخذ من وقته وفلوسه ونزل ينقي هدية علشان، الناس دي هما اللي بيختاروا يعبروا عن حبهم بالهدايا، وزي ما اتفقنا اللي بيعبر عن حبه بلغة بيحب يستقبل الحب بنفس اللغة.

عندي صديقة تقديم الهدايا لغتها الأولى للتعبير عن الحب، كل اللي حوالها عارفين عنها ده، كانت متجوزة من شخص أموره المادية مش كويسة، فكانت بالمنطق عارفة إن صعب يعبر لها باللغة دي عن مشاعره، لكن عمرها ما بطلت تشتري له هدايا، ما أصل هي دي اللغة اللي هي بتكلمها عشان تقوله بحبك، بعد وقت من جوازهم سافرو الخليج وربنا كرمهم وأمورهم المادية اتحسننت، وفضل برضو مايجيلهاش هدايا، حتى في أيام أعياد ميلادها، كان بيكتفي بأنه يقولها كل سنة وإنتي طيبة، وكانت دايمًا حخته أخاف ذوقى مايعجبكيش.

لحد ما في مرة في يوم عيد جوازهم غضبت وثار و بكت واتهمته إنه مايبجهاش، عشان حتى بعد ما بقى معاه فلوس مايفكرش يجيب لها هدية، ولما قال نفس الحجة: «أخاف ذوقى مايعجبكيش»، عيطت وقالته: «شيكولاتاية من السوبرماركت اللي تحت البيت ممكن تبقى هدية تسعدني شهر قدام». ساعتها هو اللي ثار وقالها: «أنا قبل ما أعرفك عمر ما حد اشتري هدية، ولا عمل لي عيد ميلاد، عشان كده أنا لا بحب أستقبلها ولا بعرف أقدمها». ردت عليه هي: «وأنا طول عمري باستقبل هدايا ومهادي الناس اللي بحبهم، فمن فضلك أنا أستحق تتعلم تهادييني».

في اليوم ده كل واحد فيهم فهم إنه بيتكلم لغة حب غير الثاني، ومن ساعتها قررت صديقتي يوم عيد ميلادها تاخذ جوزها من إيده

يشترى لها هدية، وطبعًا كان بينتقص من سعادتها بالهدية إن هي اللي مختارها، مش حبيبها اللي فكر وتعب ونزل ينقي ويفاجئها بها، بس لما كانت بتشوف السعادة في عيونه وهو بيعمل حاجة - ما اتعودش يعملها لكن بقى يعملها عشان يفرحها - بقت راضية بالطريقة اللي بتتقدم لها بيها الهدية.

أحيانًا كتير الحبيب بيبقى عاوز يهتم لكن مش عارف يهتم ازاي، الحبيب مش بيقرا أفكارك وماكنش جزء من ماضيك عشان يعرف لغة الحب بتاعتك، فحكك تساعد من غير ما تقول أصل الاهتمام ما بيتطلبش.

- طب قوليلي بقى باقي اللغات، عشان أنا لسه مش لاقى في اللي قلتيه ده لغة مراتي.

## اللغة الرابعة:

### الأعمال الخدمية

بتحبنى فجابت هي المكواة مع أنه كان دوري / بيحبنى فغسل هو المواعين بدالي.

جرى العرف إن اللغة الرابعة دي هي اللغة اللي كل الرجالة متوقعينها من الستات اللي بيحبوهم؛ متوقعينهم يقوموا بشغل البيت والطبخ والاهتمام بالولاد.

بس مش كل الرجالة هيشوفوا إن الست لو ماعملتش الهووم وورك ده - وهو أصلًا مش بتاعها لوحدها - يبقوا بطلوا يحبوهم، الرجل اللي يشوف كده هو اللي دي عنده اللغة الأساسية اللي بيستقبل بيها الحب.

أنا أعرف ستات كده لما تشوف جوزها بينيم الولاد بدالها، أو يروح يصلح عربيتها يبقى كده هو بيعهما، أصل دي طريقتهما في استقبال الحب.  
 - أيوا صح أنا مراتي كده، لما بساعدها في شغل البيت أو أعمل الهووم ورك مع الولاد بتبقى فرحانة أوي.

مشكلة اللغة دي إنها مش بتبان قبل الجواز، لأنكم لسه مش عايشين في بيت واحد، ولأن للأسف برضو احنا طلعنا في بيوت فيها الأم هي اللي بتقوم بأعمال المنزل والأب دوره برا البيت بس، فلما ظروف الحياة اختلفت وبقت الست مضطرة هي كمان تطلع تشتغل لتحسين مستوى الأسرة، وفضلت برضوا الأعباء المنزلية واقعة عليها لوحدها بقى ده حمل زيادة عليها.

عشان كده إحنا محتاجين نعيد النظر في اللغة دي، بلاش التابوهات اللي اتربينا عليها، لأن البيت مسؤولية كل اللي عايشين فيه، الموضوع أكيد هياخد مننا وقت ومجهود وحب عشان نتعلم نقدم أعمال خدمية، لأننا مش هنستفيد حاجة لو فضلنا نعدن وتمسكنا بالنمطية اللي نشأنا عليها، لكن هنكسب حب كثير ورحمة وسعادة لو غيرنا ده.

- كده فاضل لغة. صح؟

- تعرف تخمنها؟

- تفتكري لسه فاضل حاجة ماقولنهاش؟

- آه اللغة الخامسة.

## لغة الحب الخامسة

### الاتصال البدني (للمتزوجين فقط)

المستقبلات الحسية اللي موجودة في كل جلدنا وظيفتها إن من الطريقة اللي بنستقبل بيها المؤثر نعرف إذا كان ده حزن ولا صفة، فنحس بالسعادة والراحة والنشوى أو نحس بالألم؛ حب ولا كره.

ربنا لما خلق لنا عقل خلقه عشان يفكر ويقرر، وخلق روح تستكين وتهفو، وجسد عشان يتلمس.

الجسد مخلوق عشان يتلمس، وفيه زوجة لما تططبب عليها بعد طبخة مجهدة، أو تلمس كتفها وهي بتصب الشاي؛ فإنت كده عندك رغبة في التواصل معاها، ولما تعرض عن جسمها فأنت كده بتعرض عنها هي شخصياً، والرجل بالمثل.

والاتصال البدني هنا مش مقصود بيه العلاقة الحميمية؛ لأن عند الرجل العلاقة الحميمية احتياج جسدي مش عاطفي، أمر فسيولوجي بحت، لكن عند الست مرتبط بالعاطفة، أصل اللي بيثير الست إن الرجل اللي هي بتحبه يشوفها حلوة، تبص في عنيه فتلاقيه شايفها مغوية، ويرغب فيها وبيدشتمها، دي أكثر حاجة بتخليها ترغب في ممارسة العلاقة الحميمية معاها.

عشان كده الرجل لأنه مدفوع لممارسة العلاقة الحميمية بشكل منتظم، ساعات يفكر إن دي لغته الأساسية، لكن لو سألته برا العلاقة الحميمية هل محتاج طول الوقت للمسات والأحضان والطبطة ممكن تكون إجابته: «لأ»، محتاج لكلمات التشجيع أكثر مثلاً.

أصل الرغبة الجنسية حاجة واحتياجه العاطفي إنه يتلمس عشان يحس إنه محبوب حاجة تانية خالص.

عشان كده فيه ست مستحيل تقبل فكرة إن جوزها يكون متصل بامرأة تانية جسدياً، سواء بقى هي زوجته الثانية أو أولى، في حين فيه ست تانية الموضوع بالنسبة لها مش يبسبب نفس الألم، وممكن تتجاوزه وتسامح فيه.

وفي الأغلب الست اللي مش قادرة تتجاوز الأمر ده؛ بيبقى الاتصال البدني عندها لغة أساسية من لغات الحب، يعني فكرة إنك تلمس حد، وتتواصل معاه في قاموسها ترجمته حب؛ فلما بتتخيل إن الحب ده بيتقدم لست غيرها بتنهال، وساعتها خزان الحب عندها مش بس بيفضى لأ ده بيتكسر، بينفجر.

عارف إنت الشخص اللي بيفضل طول ما بيكلمك يلمسك، صاحبة اللي كل مرة بتقابل صاحبها بتحضنها حضن مطارات، الناس اللي دايمًا بتحب تحط كريمات وتروح مساج وتدليك وچاكوزي؛ دول أكثر ناس دي لغتهم في الحب.

أكثر حد كمان محتاج لغة الحب دي هما أطفالنا والناس الكبار في السن.

التواصل الجسدي من أكثر الأشياء قداسة على الأرض، أنت تقدر تحب أي شخص باللغات الأربعة اللي فوق دول لكن التواصل البدني لا يكون إلا تحت مظلة الزواج.

---

طب لو أنا بعد ما قرّيت كل الكلام ده لسه مش عارف إيه هي لغة  
الحب بتاعتي أعمل إيه؟

### أنا أقولك اللغة بتاعتك:

في العادة اللغة اللي إحنا بنستخدمها في التعبير عن الحب هي  
نفسها اللي بنحب نستقبل بيها الحب؛ فلو إنت شخص بيقول كلام  
حلو كتير ف ده معناه إنك محتاج تسمع كلام حلو كتير، يعني الكلمات  
لغتك الأساسية، ولو إنت بتهادي شريكك كتير، ف إنت بتحب تهادي،  
فتبقى الهدايا لغتك الأهم برضو.

### موضوع النقد:

لما تلاقي نفسك بتنتقد شريكك دايمًا في حاجة أنت شايفه مقصر  
فيها فغالبًا إنت عندك احتياج عاطفي ملح ليها، وتبقى دي لغة الحب  
المهمة أوي ليك، طبعًا ده بغض النظر عن إنك من النهارده في المرات  
الجاية مش هتنتقد وهتختار أسلوب الطلب مش الأمر.

### اسأل نفسك:

لما تلاقي نفسك ابتديت تسأل شريكك هو إنت لسه بتحيني؟ أو  
تقوله أنا حاسس إنك مابتحبنيش أو تلاقيك بتثور عليه لأتفه الأسباب،  
أو بطلت إنت نفسك تعمل حاجات مهمة هو محتاجها في العلاقة، ف  
ده معناه إن خزان الحب بتاعك بيفضي، ساعتها اسأل نفسك إيه  
الحاجة اللي لو شريكها عملها هتبسط وهحس إني ممتن ليه وعاوز أنا  
كمان أسعده؟

الإجابة ع السؤال ده هتعرفك لغتك!

## طريقة اعتذارك:

الطريقة اللي بتعتذر بيها لشريكك لما يكون زعلان منك؛ هل هي كلمات ولا طبطبة ولا هدايا، طريقتك بتقول لك إن دي أهم لغة عندك، لدرجة إنك بتقدمها له في أصعب الأوقات اللي بينكو، عشان يفتكر حبك ف يصفح ويسامح.

– طب ماينفعش أعوز اللي بيحبني يحبني بالخمسة لغات دول؟


– يا ريت طبعًا بس اللي يقصده شيبمان إن فيه لغة من دول لو ما اتحققتش مابحسش إني محبوب، وبحس ساعتها إني مهمل. تعرف يا أحمد عندي صديق مراته شايلة الليلة كلها، حتى السباكة هي اللي بتعملها وعلى طول تقوله مفروض تقدر أني بحبك وبريحك من القرف ده، في حين صديقي ده مش عاوز بس غير يسمعها بتقوله يا بيبى. هي بتقدمله (أعمال خدمية) وهو عاوز (كلمات).

شريكي بقى هيعرف منين إيه الطريقة اللي أحبه يهتم فيا بيها! إذا كنت أنا نفسي ممكن أكون معرفهاش، فيبقى حقي على نفسي لما أعرفها إني أعرفها له وبكل الطرق، وبرضه حقه عندي أني لازم أسأله عن الطريقة اللي يحبني أهتم فيه بيها وأقدمها له.

أسهل حاجة إنك تقع في الحب، يمكن صعب إنك تقع في حب الشخص المناسب، وصعب إن الشخص المناسب يطلع هو كمان بيحبك، لكن الأصعب على الإطلاق إنه الشخص اللي وقعت في غرامه يحبك بالطريقة اللي إنت عاوز تتحب بيها. والأصعب من ده إن أنت كمان تحبه بلغة الحب بتاعته.


---

اللافتة التاسعة:



طريق العشق مكتظ بالأحبة،  
لكن؛  
لا أحد يقود بالطريقة ذاتها!

## بئزئ 95



من أسبوعين فاتوا كان فيه يوم بادئ بداية زحمة أوي معايا، زي أي ست مصرية جميلة؛ عندي طبيخ وغسيل مواعين وليلة كبيرة أوي. خلصت الدوشة دي كلها ونزلت أقعد في الكافيه اللي جنب بيتي أكتب شوية، أول ما وصلت وقبل حتى ما أختار مكان أقعد فيه اتصلت ب أبويا أتطمئن عليه والمكالمة طولت، أنا أصلاً كنت جعانة جداً ولسه ما شربتش قهوتي ف مش فايقه خالص.

وأنا لسه مع بابا في المكالمة وبحاول أحافظ على عيوني مفتوحة بالعافية، لقيت الجرسون جايب لي نسكافيه وجنبه كوباية حليب.

بقوله:

– لا، ده أكيد مش عشاني، أنا لسه ما طلبتتش.

قالي:

– أنا عارف طلب حضرتك: «نسكافيه حليب خالي الدسم»، ولما لقيتك طولتي ف التليفون ومش عارفة تطليه جبتة.

بصراحة أنا استغربت إني اتبسطت أوي كده واكتشفت ساعتها إنه إحساس رائع إن الحاجة اللي إنت عايزها تجيلك من غير ما تطلبها، إنك تلاقي حد بيفكر فيك ويقدم لك اللي إنت عايزه من قبل حتى ما تقول عليه ده شيء عظيم جداً، حتى لو أنت اللي هتدفع تمنه.

اللي حصل معايا ماخلصش على كده، بقيت كل مرة بوصل الكافيه بعدها بدقايق بلاقي الجرسون جايب لي نفس الطلب من قبل حتى ما أطلب المنيو، في أول كام مرة كنت مبسوفة من الاهتمام، طلبي بيجيلي بسرعة وقبل باقي الزباين.

لكن بعد كده ابتديت أحس إني متضايقه لما لقيت الجرسون بيقدّم لي نفس الطلب في كل الأوقات ومن غير ما أطلب؛ مرة مثلاً كنت طلبت بالفعل غدا وعصير برتقال وكان المسؤول عن طلباتي جرسون تاني خالص، فجأة لقيت النسكافيه بيتحط قدامي وأنا أصلاً مش عايزاه، مرة ثانية كنا بالليل وأنا عادتني مابشر بش كافيين بالليل لقيته جاي بنفس الاجتهاد والدأب والود ويحط قدامي برضه كوابية النسكافيه من غير ما يسألني، مجرد ما بيلمحني في الكافيه بيلاقي نفسه بشكل أوتوماتيك بيروح يجيب طلبي من غير ما يسألني حتى.

كل كوابيات النسكافيه اللي اتقدمت لي وأنا مش محتاجها كنت بدفع تمناها قبل ما أقوم لأنها متضافة على الفاتورة، متقدمتليش مجاناً مثلاً.

والحقيقة اللي حصل ده خلاني أفكر في واحدة من صديقاتي متجوزة وجوزها دايمًا مش راضي ولما في يوم سألتها تفتكري هو مش مبسوط ليه؟

قالت: معرفش، أنا مولعة صوابعي العشرة شمع وهو مش عاجبه.

والحقيقة فضل الموضوع شاغلني وفضلت شايفة جوزها شخص جاحد، عايش في نعمة كبيرة مش مقدر قيمتها، لحد ما حص — موقف الجرسون والنسكافيه، اللي نور عندي حته كانت ضلمة، اتصلت بصديقتي واتقابلنا وأول لما ابتدت تشتكي من جوزها سألتها بوضوح:

– تعتقدي إيه الحاجات اللي جوزك يحب إنك تقدميها ليه في العلاقة مقارنة باللي إنتي بتقدميها ليه بالفعل؟ وإيه الاحتياجات

---

الي تتمني إنه هو يَعْطِيها لك في علاقتكم؟ وإيه الي هو بيقدمه بالفعل؟

والنتيجة فاجتني زي ما فاجتني إني بقيت بتضايق من الجرسون الي بيحجب لي النسكافيه من غير ما أطلبه -مع إني في الأول كنت فرحانة وشايفة ده اهتمام- واللي لقيتني في مرة بناديه وبقوله:

- متشكرة جدًّا لاهتمامك بس أنا بشرب النسكافيه في أوقات معينة بس من اليوم، المرة الجاية قبل ما تقدمهولي أرجوك إتأكد إني فعلاً عايزاه.

صاحبتي حكّت إن هي بتقدم لجوزها طول الوقت بيت نضيف ومرتب وكل يوم طبخة جديدة مع إنه وباعترافها لا عنده مشكلة إن البيت يبقى في يوم مش في أبهى صورته، ولا عنده مشكلة إنه يأكل طبيخ بايت.

قالتلي: زمان كان شايف إن دي حاجات حلوة، وكان مبسوط بيها بس تقريبًا خلاص اتعود ع النعمة فمبقاش يحس بقيمتها.

هي طبعا معاها حق فكرة إن الانسان يألف النعمة -ويبطل يشوفها شيء يستحق الشكر- ده شيء وارد، لكن الغريب إن جوزها بيتدي يتضايق من ده، احنا مش بنبدأ نتضايق من اللي بيتقدم لنا إلا لو دفعنا تمنه واحنا أصلاً مش عايزينه.

زي ما حصل معايا وكنت بدفع تمن نسكافيه أنا مش عايزاه ومطلبتوش مع إنه أول مرة اتقدم لي اتبسطت إنه اتقدم لي من غير ما أطلبه.

جوز صديقتي كمان كان مبسوط إن بيته على طول نظيف وبيأكل أكل طازة كل يوم لكن أكيد اللي ضايقه إنه ابتدى يدفع تمن ده وهو مش أولوية عنده، ولما سألت صاحبتى تفتكري إيه التمن اللي هو بيدفعه قصاد اللي بيأخده ده كانت إجابتها: طبعًا ولا حاجة، ما بيدفعش حاجة.

قلت لها: بصي حبيبتي اسمعها مني، في كل العلاقات الإنسانية على كوكب الأرض والكواكب المجاورة ومنذ بدء الخلق وحتى تحترق النجوم محدش هيديك حاجة إلا وهتدفع تمنها، ما عدا أبوك وأمك؛ دول مصدرك الوحيد للحب غير المشروط، طب بصي بلاش السؤال ده: تفتكري إيه الحاجة اللي هو محتاجها تتقدم له وإنتي مش بتقدميها ليه؟

قالت: حاجات تافهة زي الدلع والطبوبة والكلام الحلو.

رديت: طب وإنتي ليه مش بتقدميها ليه؟

صديقتي: بكون تعبت، غسيل وتنظيف وطبخ، بيرجع يلاقيني خلاص معنديش طاقة أطبب وأدلع.

رديت: طيب إيه بقى اللي جوزك بيقدمهولك في العلاقة دي؟ ولو هو فعلاً ما بيقدمش حاجة زي ما بتقولي، ف إنتي بقى عايشة ليه مع واحد جاحد وناكر للجميل زيه؟ أكيد هو كمان بيقدملك أي حاجة في علاقتكودي؟

صديقتي: الصراحة أه بيغير لي العربية، إنتي عارفة صاحبتك مهووسة بالعربيات، العربية مابتكملش معايا ثلاث سنين وبيغيرها لي، كنا لسه بنتفق على الصيف يجيب لي العربية اللي هموت عليها،

وبيجرني آخر الأسبوع لأمي وبيجي معايا نشترى طلبات البيت وساعات  
بيشيل عني الولد على ما أنظف يوم أجازته.

أنا: يبقى بيدفع، بيدفع تمن إنك بتقدمي ليه كوباية نسكافيه هو  
مش محتاجها بتنضاف ع الفاتورة.

صديقتي: نسكافيه إيه! لأ، مش فاهمة.

أنا: بلاش نسكافيه، هسألك سؤالين: العربية اللي عينك عليها  
ناوية تحطي لها بنزين كام؟

صديقتي: أكيد 95، بس إيه علاقة ده بجوزي يا هانم؟

أنا: طب إيه رأيك لو رحتي معرض يبيع لك العربية اللي إنتي  
عايزاها دي بسعر زيادة 10 آلاف جنيه بس هيديكي كارت تمونها  
سولار العمر كله ببلاش؟

صديقتي: سولار! ارار!

أنا: جاوبي بس.

صديقتي: سولار إيه! وأنا هعمل إيه بالسولار. يفتح الله!

أنا: بالظبط! ده اللي بيحصل مع جوزك، إنتي بتقدمي له حاجة  
هو مش عايزها ومع ذلك بيحاسب عليها، أنا قدرت أقول للجرسون  
شكراً مش عايزة، و إنتي عرفتي تقولي يفتح الله ع السولار، ماتخلمهوش  
بقي هو كمان يقول كده، عرفتي بقي جوزك مش مبسوط ليه مع إنك  
شايفة إنك قايدة صوابك العشرة بالسولار بس هو محتاج بنزين

!95

في العلاقات الإنسانية لما نقدم لحد حاجة لازم نبقى متأكدين إنه هي دي الحاجة اللي هو فعلاً محتاجها أو عايزها، لأنه كده كده هيدفع تمها، وحتى لو مش بيدفع حاجة قصاها هيتولد عنده إحساس إنه مديون.

وفي أي علاقة إنسانية ماينفعش يكون فيه طرف دائن وطرف مديون، وعلى عكس ما ناس كتير فاهمة المديون بيمشي من العلاقة قبل الدائن.

صديقتي: تقصدي المستفيد اللي بياخد أكثر ما بيدي بيمشي الأول! ده إيه الجحود ده؟


بصي، الإنسان بطبعه مايبحبش يبقى في علاقة مع أي حد وهو عنده إحساس إنه أقل، إنه أدنى، إن فيه حد ثاني ليه عليه أفضلية.

لو إنت مثلاً سالف من صديقك فلوس، كل مرة هتشوفو هتبقى محرج وحاسس إن له جميلة عليك، عشان كده المديون بيمشي الأول من العلاقة، بيبقى عاوز يكون في علاقة بيدي فيها زي ما بياخد، عاوز يحس إن هو وشريكه في نفس المستوى مش واحد فوق بيصب والثاني تحت بياخد طول الوقت وبس. المديون بيمشي عشان مايبحبش إحساس إنه يبقى تحت.

في العلاقات المتوازنة هتيجي أيام وشهور هتلاقي نفسك بتدي أكثر ما بتاخد وهتيجي سنين تلاقي العكس بس في المجمل هتلاقيكوا شايين بعض، مش واحد على طول الخط بيدي ومضحي والثاني بياخد.

---

اللافتة العاشرة:



قد ندين باعتراف،  
باعتذار، بشكر...  
لكن؛ لا أحد يدين بالحب!

## العربية غرزت



---

– بقالك ساعة يا أميرة بتحكي لي عن مميزاته؛ بيحبك وكريم وشكله حلو وبيحب الأفلام والموسيقى زيك وشاطر في شغله وبرج الأسد وإنتي حمل ف قشطة جدًّا، هاااا، فين المشكلة بقي؟

– وهو لازم يعني يبقى فيه مشكلة؟

– طالما مقعداني القعدة دي، وإنتي اللي عازمة، واحنا آخر الشهر يبقى أكيد فيه كارثة، اتفضلي.

– متجوز، بس هو مش بيحب مراته أصلاً...

بقاطعها:

– ومنفصلين وكل واحد عايش في أوضة، ومكملين بس عشان العيال.

– لأ، هو مفيش عيال، بس هو وعدني إنه هيقولها، بس لما أموره المادية تظبط؛ هي أصلها مش مصرية والقانون في بلدها يمنع الرجل إنه يتجوز اتنين، وساعتها كمان هتاخذ نص أملاكه، اللي شقي وتعب فيها وهي أصلاً مابتشتغلش. يعني ماتعبتش معاه في حاجة.

– طيب أنا هسألك سؤال واحد بس يا أميرة ومش محتاجة أسمع منك إجابة، جاوبي إنتي على نفسك:

«جوا قلبك ده في أعرق نقطة فيه، حاسة إنك مرتاحة ومتطمنة؟»

– منا جايباكي النهارده علشان كده، أنا مش متطمنة؛ بحبه ومصداقه، ومتأكدة إنه هيسبها بس قلبي مش مرتاح، فيه حنة جوا بتقولي بلاش.

– بصي يا أميرة في العلاقات بين الرجل والست بنبص على الوضع الحالي، اللحظة الراهنة اللي أنا وإنتي بنتكلم فيها دلوقتي، يعني مثلاً اللي بيعحبك ده شاب مكافح ومجتهد وطموح بس معندوش شقة، ومنتقدي معاه في بيت أهله لحد ما يشتري شقة وهو محوش مبلغ كويس، هتقبلي ولا لا؟

أميرة: طالما ناوي ومحوش يبقى هقبل.

– يبقى إنتي كده مافهمتنيش، مابقولش تصبري أولاً، ده قرارك؛ فيه حد يقدر وحد لاً، لأن قدرة كل إنسان على التكيف مختلفة عن غيره، اللي أقصده لو معنديش مشكلة تعيشي في بيت عيلة يبقى و افقي، لكن لو مش هتقدر يبق ارفضي، يعني عملي حسابك كده إن مفيش شقة غير بتاعت أهله، ماتبصيش لي هيبقى معاه بعدين وتقييمي الموقف على أساسه، قيمي الموقف على الموجود دلوقتي، وعلى قدرتك على التكيف دلوقتي في الحاضر مش في المستقبل.

– لو متقدملك راجل زي الفل عاجبك من كل النواحي، بس مشكلته إن وزنه زايد، بس هو بيقولك إنه هيبداً يعمل ريجيم وبيوعدك إنه هينجح وإنك إنتي الدافع إنه يخس، ساعتها لازم تسألني نفسك وتشوفي هل قصة وزنه الزايد دي مش فارقة معاكي ومش مضايقاكي، ولا شكل جسمه مسببلك نفور منه ومضايكك! وأرجوكي ماتقوليش مسببلي نفور، ومضايقني بس هشجعه يخس لأنه ساعتها هتبقى مستنياه يخس بفارغ الصبر، ولو مانجش هتحبطي جداً، وهتحسي إنه كسر وععدك.

لوأنا بادئة العلاقة وأنا عيني على إن هيبقى فيه شقة وهنسيب بيت العيلة، لما ده مابيحصلش بحس إن شريكي قصر، وعدني بحاجة وماقدرش ينفذها، وده محبط جداً للطرفين وبيضر العلاقة. لوفيه جانب في حياة اللي قدامك إنتي مش قادرة تتأقلمي معاه دلوقتي امشي فوراً. لو حاسة إن ضميرك وقناعاتك في خطر امشي، لو حاسة بالذنب معظم الوقت امشي.

أميرة: طب أنا في قصتي دي أعمل إيه؟ أمشي؟

– أنا عندي مشكلة مع الخيانة؛ فكرة إنني مع حد ثاني غير شريكي بعقلي ومشاعري وشريكي فاكربي معاه ومخلص ليه، دي ثقيلة أوي على نفسي.

### الخيانة غش وخداع وكسرة قلب!

اللي بيحب حد؛ بيحبه في النور قدام الناس، واللي استنى لحد ما لقي قلبه ومشاعره رايعين لحد ثاني غير شريكه فيبقى من الأول خالص عنده مشكلة في التواصل مع نفسه؛ لأنه لو فاهم إن احتياجاته العاطفية مش متحققة ف المفروض يصارح شريكه من قبل أصلاً ما يبقى فيه انجذاب لشخص ثاني، يصارحه أنه فيه خلل، وإن احتياجاته مش متلبية، وإنه العلاقة دي مش محققة ليه العفة والسكن والسكينة. وساعتها لازم يشوفو حل سوا؛ يشتغلوا على نفسهم وعلى علاقتهم، يروحو لمتخصص في العلاقات الزوجية، أو في أسوأ الظروف يتفارقوا بالمعروف.

لكن بفرض إنه ما أدركتش ده غير بعد ما قابل حد ثاني لقي نفسه منجذب ليه وبيتعلق بيه، أو يمكن كان مدرك من قبل ما يقابل حبيب

جديد بس عنده أمل الدنيا بينه وبين شريكه هتتغير في يوم ما، أو يمكن هو عارف إنه مش مبسوط وطلب من شريكه زيارة متخصص والشريك ما اتستوعبش ده وتخاذل أو رفض أو أي سبب تاني.

المهم دلوقتي إن بقى فيه ثلاث أطراف في العلاقة، ف نعمل إيه؟

1- لازم كل الأطراف تعرف بوجود بعض -وطبعًا أنا أقصد هنا في حالة إن راجل يحب واحدة غير مراته- لازم يكون عنده شجاعة كافية إنه يتحمل مسؤولية قراره واختياره، وللازم كمان يحترم حق شريكه في إن هو كمان يقرر ويختار يكمل ولا يمشي.

2- لو هما الاتنين قرروا يكملو معاه -وده اختيارهم وعلى حسب قدرتهم النفسية- لازم كل واحدة فيهم تبقى فاهمة إن ده الأمر الواقع؛ الحبيبة ماتحطش أمل إنه بكرة يطلق زوجته ويبقى بتاعي لوحدي، والزوجة تبقى فاهمة إن بقى فيه ست تانية شاءت أم أبت.

3- كل اللي فات ده بفرض إن كل الأطراف عرفت، إنما لو في السر ومحدش يعرف والراجل ده مش بيواجه شريكته الأولى ومش بيتكلم في جواز أصلاً مع التانية فالوضع كده خيانة.

أصل الراجل اللي بيحبك وهو متجوز ولا بيحب سيرة جواز ولا ناوي يتجوزك ولا بيسيبك في حالك ده حاجة من اتنين: يا راجل نسوانجي عنده مشكلة نفسية بتخليه يسعى لأنه يملأ حفرة عدم الأمان اللي جواه، ودول معظمهم بيبقو جذابين جدًا بتلاقيه راجل في العادة عامل هالة حوالية، محافظ على رشاقتة ولياقتة اللي هما رأس ماله، بيخطفك من أول نظرة، بيعرف يسمّعك ويسمّعك كلام حلو وعمره مايبينسى كلمة قولتها ولا غنوة حبيبها، وبيطلب تجاوزات ويحاول ومن

الأول خالص، وده بيتقفش بسرعة عشان طريقته بتخوف بنات كثير،  
بيبقى عاوز علاقة جسدية وبس.

يا إما راجل رومانسي مش نسوانجي، كيووت، بيدور على الحميمية  
وده حنين وبهم بنفسه وبيكي جداً والإيجو بتاعه عالي وده الأخطر بقى  
ليه؟

لأنه مش واضح زي الثاني، لأنه بدل ما يصلح علاقته بمراته لو  
فيها أمل، أو يسيبها تبدأ من جديد مع غيره لو هو بجد مش عاوزها،  
ويشيل حمل أكله وغسيله من عليها، لأ هو بيهرب لعلاقة تانية يبقى  
فيها متشاف وملتصل، ومرغوب وعلى طبيعته ومن غير ما يتحمل أي  
مسؤولية ولا التزام تجاه الطرف الجديد، ويبقى عايز يعيش عصفور.

الطبيعي لو حد مش مرتاح في علاقة يا يحاول يتشتغل عليها،  
ياينهمها؛ إنما الراجل ده معندوش الشجاعة الكافية؛ لا إنه يواجه مراته  
ولا إنه يسيبها، لاعتبارات كثير بقى شكله قدام نفسه، قدام الناس،  
الإيجو بتاعه.

وفي العادة هتلاقي الدنيا مضربة وإنتي مش فاهمة حاجة، مش  
فاهمة هو عاوز إيه، وطبعاً هيقولك ماينفعلش مراته تعرف؛ وتعالى  
نتجوز في السر، أو اصبري عليا شوية البنت تخلص ثانوي عشان  
ماضيعهاش، أو بس لما نعمل للواد الزايدة، أو أصلاً مراتي عيانة وقربت  
تموت وتبقى جت من عند ربنا.

فينتهي الأمر ازاي بقى؟ إنه يسرق عمر واحدة ست مراته قاعدة  
مستنياه العمر كله يمكن في يوم من الأيام يقولها كلمة حلوة ولا يرجعها  
مرة بدري يطبطب عليها.

وبيسرق مستقبل ومشاعر واهتمام واحدة ثانية بتحبه وقاعدة مستنياه يبقى بتاعها لوحدها أو حتى تتشارك معاه ست ثانية.

### فيا عزيزي الرجل:

لو إنت في جوازة وابتديت تنجذب لواحدة ثانية، يا تلحق نفسك وتقتل العلاقة دي في مهدها، وتحاول تستشير حد يساعدك تفهم ليه ده حصل، وتبدأ إنت ومراتك تشتغلوا على علاقتكم، يا تخليك شجاع وتروح تقول لمراتك: «مش قادر أكمل معاكي وعيني ابتدت تزوغ على غيرك». وسيبلها القرار، تفضل معاك بتربي العيال لو الوضع مش فارق معاه، يا تنفصل عنك وتديها كل حقوقها وزيادة وتبدأ هي من جديد.

لكن الوضع ده مرهق ليك إنت أكثر حد، إنك تعيش طول الوقت بتكذب وبتداري وبتخترع حيل؛ كل ده متعب ومؤذي ليك نفسيًا، هتلاقيك شوية بشوية بتفقد جزء من ضميرك، الخيانة بتنتقص من روحك ومن طاقتك ومن سلامك الداخلي ومن صورتك قدام نفسك واحترامك لهما.

### ويا عزيزتي المرأة:

لو انتي ست متجوزة وجوزك بيحب واحدة ثانية أو إنتي الثانية دي، وقاعدة مستنية؛ فاستهدي بالله وادعيه ينور بصيرتك وماتستنيش وماتخليش حد يسرقك.

العلاقات اللي خارج حدود الضمير كلنا عارفها وكلنا بننفر منها:

- اللي بيحب حبيبة صاحبه.
- اللي عنيا ابتدت تزوغ على جوز بنت خالتها.

---

• واللي بيحب زميلته المتجوزة.

كل دي علاقات من الأول ماتنفعش.


مقولة في الحب والحرب كل الأمور مباحة مقولة غير شريفة، أصل الغدر غدر والخيانة خيانة.

لو إنت شخص في بداية علاقة خارج حدود الفطرة ف إنت أكيد عارف، جوه في أعمق نقطة في قلبك، عارف، اخلع بسرعة، وماتتحركش لقدام عجلة زيادة لأن كل ما فترة وجودك في علاقة إنت عارف إنها مش نزيهة بتطول كل ما خروجك منها بيكون أصعب، زي عربية لقت نفسها داخل الصحرا؛ كل ما تمشي خطوة زيادة كل ما تغرز أكثر، ساعتها بتبقى النصيحة: «ماتدوسش بنزين».

ولو إنت دلوقتي في علاقة محسساك بالسوء تجاه نفسك لكنها بالفعل عميقة ف أكيد هتتوجع وتهتعيط وهتفتقد حبيبك، أكيد هتخسر، لكن هتخرج كسبان نفسك، رافع رأسك وعارف إن تصرفك نبيل وإنك أكيد هتقابل شخص تحبه حب حقيقي مفهوش إحساس بالذنب.

الحب اللي جواه إحساس بالذنب بيضعفك، والحب الحقيقي بيقوي مايضعفش.


اللافتة الحادية عشرة:



حين تضل الطريق،  
فأنت تعرف،  
في أعمق نقطة في قلبك،  
أنت تعرف!



## الطريق قبل الرفيق



كلنا عندنا الصديقة اللي بتهتم أوي بالتفاصيل، اللي مركزة إنك خسي تي 250 جرام أو تخنتيم، اللي بتاخذ بالها من لون الروح الجديد، أكثر واحدة عارفة إن الفوشيا أحلى عليكى من البينك، بتلاحظ أي تغيير في عفش بيتك.

الصاحبة دي إنتي عارفة إنك لو عاوزه حد ينزل يعمل معاكي شوبنج مش هتلاقي أفضل منها، الصديقة دي أنا بسميها الشخص العين، لكن في العلم اسمها الشخص البصري.

عارفة بقى صاحبتك اللي بتسمع، واللي لو عندك مشكلة بتلاقيها أول حد بتجري عليه، عشان تحكي وتفضضي معاه، مابتقاطعكيش، نفسها هادي وتلاقيها مخزن أسرار الكل، بتختار كلامها أوي ودايمًا مجاملة، وفي المقابل الكلام الحلو بيطلعها سابع سما، والكلمة الجارحة بتقتلها أكثر م الفعل. دي بقى صديقتك الودن، أو زي ما العلم بيقول الشخص السمعي.

مين بقى عارف الصاحبة المهروشة، اللي مبتقعدش على بعضها ومبتعرفش تحافظ على التواصل بالعين وإنتي بتكلمها، ولو بتزورها بتقوم مئة مرة، ولو هي عندك في بيتك بتدخل وراكي المطبخ وتحسها بتتحرك كأنها في بيتها، عارفة لما كلنا بنبقي مكسلين نقوم نصب الشاي أو نقطع الكيك وتلاقي واحدة اتبرعت غالبًا بتكون هي دي، أجدع واحدة تظبط خروجات تروح معاكي مصايف، تزقك تروحو الجيم، المهم تعملو مجهود حركي. دي الصديقة اليو يو اللي العلم بيسميها شخص حركي.

اللي سبقو دول أنواع البني آدمين عمومًا ف التعلم واستقبال المعلومات، مش بس الصديقات.

1- الشخصية البصرية.

2- الشخصية السمعية.

3- الشخصية الحركية.

أي بني آدم ممكن يبقي مزيج من أكثر من نوع بس أكيد في نوع بيطنى على الباقيين، طب أنا لو عايز أعرف نفسي أو اللي قدامي أعمل إيه؟

## الشخص البصري:

لو أنت شخص بيحفظ تفاصيل الأماكن وياخد باله من اللافتات ع الطريق، أو لما بتوه في مول بتجري ع الخريطة عشان تشوف إنت مكانك بالضبط فين، وازاي توصل للمحل اللي عايز تروحه يبقى إنت شخص بصري.

لو بتحب الرسم والألوان والصور واللوحات والمتاحف والشوينج وبتقضي أكثر وقتك على الانترنت تتفرج على الصور، لو لازم تلبس ألوان لايقة على بعضها ولازم تخرج مهندم وأنيق يبقى إنت شخص بصري.

لو مهم عندك تحضر المحاضرة وأنت قاعد في الصفوف الأولى وشايف المدرس والسبورة والكلام المكتوب، لو لازم وانت بتذاكر يكون جنبك ورقة وقلم وتكتب وترسم خرايط وتعلم بالألوان ف الكتاب يبقى إنت شخص بصري.

---

الأشخاص البصريين ويمثلو أكبر نسبة من البشرية.

## الشخص السمي:

لو إنت شخص مش بستحمل الصوت العالي وأهم حاجة عندك إن المكان اللي تقعد فيه يبقى هادي، لو بعد ما بتقعد مع حد بيتكلم كثير وتضطر تسمعه بتحس بطارية طاقتك خلصت ف أنت كده شخص سمي.

لو لما بتوه في مول بتضطر تسأل عشان تسمع الشخص اللي بيوصف: يمين وبعدين شمال هتلاقيه في وشك، عشان توصل بدل ما تبص ع الخريطة يبقى إنت شخص سمي.

لو بتحب تقرا شعر أو تكتب، لو قلبك متعلق بالكلمات واللغات عمومًا يبقى أنت شخص سمي، لو الموسيقى صديقتك، لو بتحب شغلتك اللي فيها تدريس وإلقاء محاضرات وتسويق وتعامل مع عملاء، لو بتحب تحكي حواديت وتسمع حواديت يبقى أنت شخص سمي.

لو بتحب تلبس لبس بسيط وهادي ومفيهوش أكسسوارات بتعمل صوت، لو صوت الكعب العالي بينرفذك يبقى أنت سمي.

لو بتتكلم وإنت بتذاكر عشان تسمع نفسك، ولو أهم حاجة في المحاضرة إنك تسمع كويس، أهم حتى من إنك تبقى باحص ع السبورة ولا شايف المحاضر، ده ممكن ببساطة حد يسجل لك والدنيا تمشي زي الفل يبقى إنت سمي.

لو بتحب تألف أغاني من المعلومات اللي بتجمعها وبتسمعها لنفسك في صورة سجع يبقى إنت شخص سمي.

## الشخص الحركي:

لو إنت شخص بتحب الرياضة أوي والحرف اليدوية والطبخ، بتتحرك طول الوقت، بتذاكر وإنت بتلف في البيت كله، ولو تهت في المول ولا بتسأل ولا بتدور على الخريطة إنت بتجري يمين وشمال، وتطلع الدور اللي فوق وترجع تنزل تاني لحد ما تلاقي المحل اللي إنت عايزه يبقى إنت شخص حركي.

لو أهم حاجة في لبسك إنه يكون مريح، مش شكله ومش أناقته يبقى إنت شخص حركي.

لو الملمس بالنسبة لك مهم، لو بتحب الجيم والرقص والرحلات والسفاري يبقى إنت شخص حركي.

لو بتحب تشتغل في مجموعات، بتحب تلمس الأشخاص والأشياء، بتحب تمشي على الرمل والحشائش، بتحب تمشي تحت المطر، يبقى أنت شخص حركي.

مهم تعرف اللي قدامك، عشان مينفعش مثلا تبقى عاوز حد يقيم إلقاءك لقصيدة وهو ما بيعرفش يسمع، أو تكون بتشتري حاجة لبيتك ومحتاج حد مركز في تفاصيل عفشك وتأخذ معاك صديقك اللي مش بصري.

ماينفعش إبنك يكون بصري وتحاولي تشرحي له من غير رسومات تساعد ع الفهم، أو جوزك يكون مش سمعي (ومعظم الرجالة كده)


---

وانتي عاوزاه يستحمل يسمعك بتحكي له بالساعات حواديتك مع أختك.

والأهم إنك تعرف نفسك!


دائمًا الأهم إنك تعرف نفسك!

اللافتة الثانية عشرة:



اترك للقدر اختيار الحبيب،  
وللطريق اختيار الصديق!

## عيوب تصنيع



جوا كل واحد فينا مجموعة من الوحوش والتنانين المجنحة والعمفارية، كائنات مدمرة كده؛ منها حب التسلط، والغيرة غير المنطقية، الشكوى الكثير، حب الامتلاك، الأنانية وغيرها كثير؛ أنا بسميها عيوب تصنيع.

لما أهلنا كانوا زمان بيجهزوا عربية كل واحد فينا استعداداً لرحلته في الحياة، حاولوا ساعتها على أد ما قدروا أنها تكون على أفضل صورة ممكنة، وأنها تكون مجهزة أفضل من كل ماركات السيارات الثانية عشان طبعاً تكون المنافسة لصالحهما ولصالح السيارة الجديدة.

هو يعني ابن خالتك أحسن منك في إيه؟ إلا أنهما مما لا شك فيه يعني نسيوا بعض الأساسيات.

ممكن يكونوا وهما بيصنعوا سيارتك اهتموا بمظاهر الرفاهية على حساب الاعتمادية؛ فبالغوا في تدليلك واشتروك لبس وطلعوك مصايف ونسيوا أن يدربوك ويعلموك على كيفية الاعتماد على نفسك، وربما كانت أولويتهم أن يؤهلاك عشان تكون رياضياً رشيماً بتلعب سلة وسباحة وجمباز على حساب راحتك، فبقت سيارتك رياضية لكنها غير مريحة، أو علموك تحوش وتقتصد أوي في المصاريف على حساب مظهرك، فطلعت سيارتك اقتصادية بغض النظر عن مظهرها الفقير المتقشف.

المهم إنه مش ذنبك، التجهيزات اللي هما قصروا فيها مش ذنبك والطريقة اللي اتربتت بها إنت مالكش يد فيها.

لكنك دلوقتي وإنك عندك معرفة كاملة بالمشاكل اللي في عربيتك والعفراريت أو خرينا نقول الجانب المظلم من شخصيتك؛ ف الموضوع بقى مسؤوليتك بالكامل، مسؤوليتك لوحدك.

الموضوع أكيد مش سهل ومش بسيط ومحتاج قدر كبير من الشجاعة والقوة والمثابرة إنك تعترف بعيوبك قدام نفسك وتبدأ في معالجتها عشان تسعد بسيارتك وتمشى رحلتك وإنك آمن وعشان يوم ما تقابل الحبيب اللي تستحقه ويستحقك ما تؤذيهوش من غير قصد، ولا وعي.

لو أنت مثلاً عارف إن فرامل عربيتك سايبة وبرضو سايق بيها، فسلامتك مسؤوليتك، وأي شخص هتخطئه في طريقك ذنبه في رقبته.

مينفعش تقول ده عيب في الموديل أو مش فاضي أروح لمتخصص أو التوكيل غالي، حياتك وحياة شريكك أعلى.

طب إيه هي بقى أصعب عيوب التصنيع دي؟

## العيب الأول:

### أنا اللي سابق

في مرة صديقة ليا كانت جاية تستشيرني في أمر، وقتها أنا ما فهمتوش واستعجبته جداً، لكن لما درست علم نفس قدرت أستوعب قلقها:

---

– بصي جوزي لسه شاري موبايل جديد، شافه وعجبه وكان عليه خصم كبير، وقاللي أنه بيفكر يديهولي أنا، لأن هو مبسوط بتليفونه ومش بيفكر يغيره.

– طب مبروك حبيبتى، تنتهى بيه.

– لأ، منا مش عايزة أخده، وجاية أستشيرك فى الموضوع ده.

– طب إنتى ليه مش عايزة تاخديه؟

– عشان لو أخذته هبقى مدينة ليه بحاجة قصاده.

– تقصدي هتضطري تهادهيه إنتى كمان؟

– أنا حتى لو هاديته، عمري ما هشتري له هدية غالية كده، أنا مش بشتغل إنتى عارفة، لكن مش ده قصدي، اللي أقصده إن هي دي طريقته معايا دايماً إنه يخلىني مديونة ليه.

– إنتى حساسة بس. الموضوع بسيط.

– لا مش بسيط، هو كل مرة بيعمل فيها حاجة تبان إنها عشان تبسطي، هو بيبكون بيعملها عشان ببقى هو اللي سابق، مثلاً لو قرر يساعد العيال ويعمل معاهم واجبات المدرسة بدالي، يبجي يقولي: «شوفي أنا ريحتك من الولاد أهو، عشان لما أطلب منك نعزم أصحابي على الغدا الجمعة تبقى تفتكرها لي».

– آه، أنا كده فهمت.

جوز صديقتي بيحاول يخلها مديونة؛ عشان تضطر ترد الدين بالطريقة اللي تناسبه هو. الطبيعي إن الأزواج يتعاونوا وكل واحد يبقى بيعمل حاجة علشان الثاني، لكن الأصل إنه يعمل ده عشان يسعده ويريحه، مش عشان الشريك يبقى مديون ليه ومجبر يدفع الدين بطريقة هو مش عايزها.

قيمة العطاء وجوهه في أنه يكون بدافع الحب والحنان، مش عشان يبقى الشخص هو اللي سابق وعلى شريكه إنه يحصله.

الهدف من العطاء وبهجتته بتضيع لما يكون الغرض منه إنى أطلب مقابل، المقابل ده هيبقى لوحده في التوقيت اللي يناسب اللي بيدي وبالطريقة اللي هو يبقى قادر عليها، أصل إنت في علاقة مع حبيبك مش بتلعب ماتش تنس وبتشوفوا مين سجل نقاط أكثر.

الشخص اللي بيتعامل كده وعنده عيب التصنيع ده بيعمل كده عشان عنده نوع من أنواع حب التسلط المستتر فعابز دايمًا تبقى ليه اليد العليا، وده بيخلي حبيبه يرتاب ويتردد قبل ما يقبل أي حاجة بيقدّمها له شريكه، عشان خايف يكون التمن غالي.

ولأن الكتاب اللي بين إيديك ده مش الهدف منه إن اللي يقراه يعرف يغير شريك حياته زي ما هتشوف في الفصول الجاية، فأكيد مش هتلاقيني بقولك تعمل إيه لو شريكك عنده العيب، أنا أثق في ذكائك ومتأكدة إنك بعد ما تنتهي من قراءة الكتاب هتكون عندك خطة حكيمة للتعامل مع الأمر، لكن لو إنت الشخص اللي عاوز يفضل سابق دايمًا.

فأولًا: واجه نفسك واعترف إن ده عيب مؤذي للعلاقة، وبلاش تنكر إن ده سلوكك.

ثانيًا: حاول تتخلى عن روح التنافس، إنت مش في سباق، لكن في شراكة، لو عايز تطلب أمر أطلبه بشكل مباشر من غير ما تقدم قبلها تضحية، لو هتقدم حاجة قدمها عشان تسعد حبيبك وتريحه، مش عشان تمن عليه بيها، وما تفتكرش عطايك ليه ولا تفكر الحبيب بيها.

## العيب الثاني:

### السيارة ترجع إلى الخلف

– إنتي زعلانة منه دلوقتي عشان حاجة معينة، إيه بقى اللي فكرك بالموضوع اللي عدى عليه سنة ده؟ مش كنا خلصنا من القصة دي؟

– بس أنا ماسامحتوش عليها، مش قادرة أنسى إنه خلف وعده.

– هو إنتي عمرك ما خلفتي وعدك؟

– لأ، عمري.

– متأكدة بدمتك؟ ولا حتى مع نفسك؟

– يعني إيه؟

– كام مرة وعدتي نفسك إنك هتحافظي على مواعيد الصلاة، وضيعتي صلوات؟ كام مرة وعدتي نفسك هتبطلتي تدخين وما بطلتيش؟

– كثير، بس الموضوع هنا مختلف، أنا بوعد نفسي، نفسي وأنا حرة فيها يا ستي.

– حبيبتى بتكلم عن المبدأ؛ كلنا بنوعد، وكلنا كثير بننسى إننا وعدنا، أو بنتحط في وقف أو ظرف يضطرنا نخلف وعدنا، أو على أسوأ تقدير بنبقى عارفين إننا بنخلف بس بنتوسم إن شريكنا هيسامحنا.  
– بس أنا عمري ما هيسامحه.

– إنتي عايزة تسامحيه ومش عارفة ولا مش عايزة؟

– لأ، مش عايزة، ومش عارفة ليه مش عايزة.

– كده فهمتك، يمكن إنتي مش عايزة تسامحيه عشان كل شوية تفكره بالحادثه، كل شوية تشني عليه هجوم وتصبي عليه لعناتك، يمكن مش عاوزه تسامحيه عشان يفضل يحايل ويعمل المستحيل عشان ينول رضاكي من جديد.

– أيوا ممكن تكوني صح.

– بس إنتي كده بتخسري يا منى؛ بتخسري طاقتك وسلامك النفسي ومابتناميش، ولو نمتي بتحللي كو ابيس زي ما بتقولي، وكل جملة منه بتفسريها بطريقة سلبية وبتخسري حازم، وبتخسري العلاقة كلها؛ إنتي طول الوقت بتحاولي تحسسيه بالذنب على حاجة عملها من سنة، وكل ما يغلط غلطة ترجعي سنة ورا، وتفكره بيها وتفضلي تلومي وتعذبي فيه.

– أنا اللي بعذبه؟! أمال اللي هو عمله ده كان إيه؟!

– إنتي عارفة إنتي بتعملي زي إيه؟ عارفة العربيات اللي فيها تنبيه كل ما تتحرك لورا يقولك: «انتبه من فضلك السيارة ترجع إلى الخلف». الإنذار ده بقى عندك بايظ، عشان كده واجبي أقولك

انتبهي يا منى سيارتك ترجع إلى الخلف، وفي مرة هتفرمي حازم تحت عجل المرارة والغضب اللي إنتي حاساهم، إنتي طلبتي منه اعتذار وهو اعتذر، ووعدك ده مش هيحصل تاني. فا إيه بقى؟

انسي يا منى. انسي.

عايزة تقفي مكانك وما تكمليش في العلاقة قرارك، عايزتسامحي وتتحركي لقدام قرارك برضوا، لكن مفيش عربية بتفضل ماشية بضرها طول الوقت يا منى.

ساعات بناخد قرار إننا مانسامحش اللي آذونا فاكرين إن ده هيحمينا من إنهم يجرحونا تاني، وساعات نفضل نفكر شريكنا بأخطاؤه عشان يفضل تحت هيمنتنا عليه، يفضل أسير إحساسه بالذنب فيلبي احتياجاتنا.

بس لو شريكك فضل مستسلم للوم والتأنيب فتأكد إنها مش حاجة تطمنك إنه يسمح لك تبتزه، ولو فضل يحاول يرضيك مش هيعمل ده بدافع الحب، لكن عشان يخلص من زنك، وبعد كده لو عمل حاجة عنده شك إنها ممكن تضايقك هيخبي عليك عشان مايوجعش دماغه، وساعتها العلاقة هتبقى في خطر حقيقي.

إنت قوي، وتقدر تسامح وتتجاوز، وأكد الأمر مش بضغطة زرار، لكن صدقني سلامك الداخلي يستحق الجهد المبدول، عشان المرارة والغضب من خصائصهم إنهم بيهمتوا على كل حطة رحمة وحنية وحب في قلبك ويصبغوه أسود.

ولازم تبقى متأكد إن مفيش أي حاجة تضمن لك إن شريكك يصون وعده ليك أو يخاف على زعلك غير المولى عز وجل، ورغبة شريكك وإنك تكون رحيم معاه وحنين ومتسامح، وده مش معناه إنك تقبل الأذية ولا تسمح بتكرارها، لكن معناه أنك قابل تعدي اللي فات وعارف إن لو ده حصل تاني ف إنت عندك من الأدوات والملكات اللي يخليك تأخذ القرار المناسب.

### العيب التالت:

#### الرادياتير مخروم

كانت عندي صديقة علاقتي بيها أجهدتني جدًّا، وقعدت فترة طويلة مش فاهمة الغلط فين، كنت بحس إنها بنتي اللي محتاجة رعاية طول الوقت مع إنها في نفس عمري.

مثلاً: أنا مرتبة أخرج مع صاحباتي - اللي مشفتمش من سنة لظروف سفرهم - واللي هي ماتعرفهمش، ومفهوم طبعًا خروجات البنات اللي بنقعد نرتب لها قبلها بشهر، وبتتلغي أكثر ما بتتنفذ، وأخيرًا ظبطنا مواعيدنا سوا، وصديقتي مصرة نقضي اليوم أنا وهي سوا وأتخلي عن خروجة صحابي، ولما أقولها: «يا بنتي ما احنا بقالنا أسبوع بنشوف بعض كل يوم». تقولي وهي غضبانة: «مش كفاية، إنتي أقرب صاحبة ليا، وأنا محتاجاكي أكثر منهم».

مرة تانية تطلب مني ألغي تمرين بنتي عشان أروح معاهها تغير بلوزة، ولما أقولها مش هينفع تزعل وتتهم نفسها بالغباء والسذاجة إنها

أخرجت نفسها معايا بطلبها ده.

مرة رتبت وعزمت صحابنا وعملتها عيد ميلاد مفاجئ، تاني يوم بعنت لي رسالة فيها جملة واحدة: «ليه مشيتي بدري؟ هو أنا ما أستاهلهش تسهري عشاني».

وكان مفيش حاجة كفاية أبدًا؛ عاملة زي رادياتيير العربية المخروم؛ مافيش ميه بتفضل فيه، وكل شوية يوقفك ع الطريق عشان فيه دخان طالع منه وريحة شياط، وأول ما تشيل الغطا بخار المية السخنة يهب في وشك.

صديقتي دي لو طبخت طبخة تفضل تسأل جوزها مليون مرة: بجد حلوة؟ بجد عاجباك؟ يعني أحلى من بتاعت مامتك؟

لو قدمت لشخص حاجة وقالها شكرًا، تفضل تقلل من قيمة اللي عملته عشان تسمع إنه فظيع وإن مجهودها عظيم.

لو جوزها خرج مع أصحابه تفضل تقوله: «روح واتبسط أنا عارفة إن القعدة معايا مملة وإني مش بعرف أسليك زيمهم، عشان عايزة جوزها يطمئنها ويثبت لها العكس».

صاحبتي دي دايمًا مش سعيدة ودايمًا شايفة إنها مش كويسة كفاية، ودايمًا محتاجة دعم كثير طول الوقت، ودايمًا الدعم اللي بيتقدم لها مش كفاية يحسسها أنها تستحق، صاحبتي دي إرضاءها صعب جدًا وبستنزف الشخص اللي معاها، صاحبتي جعانة تقدير واهتمام، وغالبًا السبب إن وهي صغيرة ما اتقدملهاش ده بشكل صحي.

لو إنت زي صديقتي ف إنت أكيد عارف إن فيه وُحش كبير جواك محتاج استحسان وتوكيد وإطراء طول الوقت، لكن اللي إنت مش عارفه إن محدش هيضمن الوحش ده غيرك، ومهما اللي حوالياك طمنوك وقالوك إنت تستحق؛ عمر ده ما هيرضيك، إنت محتاج تسد ثقب الرادياتير بنفسك، وتغطي احتياجك للشعور بقيمتك وأهميتك من نفسك، محتاج تقعد مع نفسك تعرفها وتديها قيمتها.

## العيب الرابع:

### أنا الدبرياج

– إنتي وديتي البننت اللي كانت بتساعدك فين؟

– مشيتها.

– يا نهار أبيض ليه؟ إنتي كنتي بتقولي عليها كويسة.

– هي كويسة، بس مابتعملش الحاجة زي ما أنا بعملها.

– داليا، هي البننت دي تعليمها إيه؟

– مش متعلمة.

– طب إنتي إزاي عايزة واحدة مش متعلمة تعمل الحاجة زي

واحدة معاها دكتوراه؟

– بس ده شغلها.



راجع نفسك، واسألها تفتكر شريكك سعيد؟ تفتكر هيقدر يستحمل كده لحد إمتي؟

وجاوب بمنتهى الصدق، واستشير متخصص يساعدك تشتغل على نفسك؛ لأن شريكك لو شخص سوي وناضح هيجي يوم وهيمشي، أصل محدش سوي هيفضل في علاقة عارف إن شريكه ليه دايمًا الأفضلية فيها، ولو حبيبك خرج من تحت قبضتك عمره ماهيرجع لها تاني.

## العيب الخامس:

### إشارة مضللة

– لأ أنا مش فاهمة منك حاجة، دلوقتي هي بتتخانق معاك عشان إنت على طول مش ف البيت ويا إما في الشغل، يا مع صحابك ع القهوة، إيه بقى اللي وصل الحوار لأن الحوض مش نضيف؟

– هي بتسألني فيه حاجة في البيت مضايك أنت ليه مش بتحب تقعد معنا؟

– تقوم تقول لها الحوض والغسيل اللي متكوم على كرسي الصالون! ليه مابتقلهاش الحقيقة؟

– سالي إنتي هبله؟ عاوزاني أقولها إيه؟ إني مابقتش أحبها وإن غيرتها وتسلطها خلوني أنفر منها، عاوزاني أقولها إن مفيش ست بتمسك موبايل جوزها تفتشه رسالة رسالة أول ما يدخل للبيت.

---

– أيوا. وماتقلهاش كده ليه؟

– عشان هتقول لي أنت لو مش بتعمل حاجة غلط خايف ليه  
أمسك تليفونك؟

– بس دي مساحتك الشخصية.

– مساحتك الشخصية دي هناك في البيت الأبيض، حضرتك  
هي ما عندهاش الكلام ده. مش مقتنعة هي بكلامك العظيم ده واحترام  
مساحة الشريك وعزلته وحدوده النفسية.

– أيوا بس أنت كده بتدي إشارات غلط يا شادي، بتشغل  
الإشارة الشمال وإنت طريقك يمين، بتلخبط اللي ماشي وراك.

– معلش يا ستي لما أدي إشارات غلط أحسن ما ندخل بقى في  
حوارات ودوشة وأنا دماغي وجعاني.

– بس إنت كده بتخلها توجه طاقتها لحل مشكلة مش حقيقة،  
بتضلها، مفهمها إن مشكلتك نظافة البيت وإنت أزمته في اقتحامها  
لخصوصياتك. وهبيجي يوم وهتلاقي عربيتها لبست في عربيتك.

شادي شخص انهزامي استسلامي مش عايز يواجه شريكته في  
العلاقة دي، مش قادر يدافع عن وجهة نظره ولا حقوقه في العلاقة  
فبيعمل إيه؟

بيضلل شريكته، بيقول لها إجابات مزيفة عن أسباب المشكلة  
بدل ما يواجهها بالحقيقة، عامل بالظبط زي شخص وقعت منه فلوس  
في شارع ظلمة راح يدور عليها في شارع نور وهو متوقع إنه هيلاقها.

إزاي مشاكل شادي مع مراته ممكن تتحل لو هو أصلاً مش معرفها  
ليها؟

أكيد عمرها ما هتتحل، وهتلاقي شادي دائماً بيأجل النقاش في  
المشاكل ويتجاهلها وهو كده فاكر إنه بيتفادها ويحبي نفسه من  
ألم الصدام، لكن الحقيقة إن المشاكل بتفضل تكبر وتتفاقم لحد ما  
تنفجر، والوجع جاي جاي.

العلاقات الإنسانية محتاجة شجاعة ومثابرة ودفاع عن قناعاتك  
من غير صدام يا شادي.

## العيب السادس:

### العربية بتنتش

- مروة، هي العربية بتعمل كده ليه؟
- بتنتش صح؟
- مش عارفة يعني إيه بتنتش بس فيها حاجة غريبة؟
- آه، وديتها لميكانيكي وقال بتنتش.
- أيوا من إيه يعني؟
- لأ، النتش ده أسبابه كتير أوي ما بنعرفهاش، احنا بنحاول  
نتعامل معاها من غير ما نفهم هي زعلانة ليه.

---

– أه دي عاملة زي حماتي كده، تلاقي البوزو اتقمصت وانتي مش فاهمة ليه.

عارف الشخص اللي كثير تلاقيه واخذ جنب وتحسه مقموص وإنّ قاعد بتضرب أخماس في أسداس مع نفسك مش فاهم فيه إيه، ولا إنت عملت إيه غلط.

مراتك اللي إنت حاسس طول الوقت إن فيه حاجة غلط حاصلة بينكم بس مش عارف تحط إيدك عليها.

خطيبك اللي يشوف رسايك ومايردش عليها وإنّ عارفة إن دي مش طبيعته، وبتحاولي تفهمي وهو قاعد يقولك لأ، بس مشغول وإنّ قلبك حاسس إن أكيد عشان معتر زميلك تفاعل على صورتك على الفيسبوك بقلب، بس مش متأكدة.

الأم اللي دايمًا بتخاصم وتفضل تراضها ماترضاش كنوع من أنواع العقاب عشان الفكرة المترسخة بتاعت بتحبي يبقى تسمع كلامي وتعمل اللي أنا عاوزه.

زميلتك اللي بتكتشفي صدفة أنها عزمت كل أصحابكم لعيد ميلادها وانتي لأ، ولما تسألها بشكل مباشر تقولك: «إيه ده؟! تصدقي أنا كتبت لك رسالة ونسيت أبعثها!». وإنّ ملاحظة إنها متغيرة معاك من يوم ماعرفت إن أجازتك اتوافق عليها وأجازتها لأ.

الزوجة اللي بتتمرض وتجاهل وتاخذ جنب عشان جوزها بيتأخر برا أو مش بيديها انتباه واهتمام كفاية.

الزوج اللي على طول الوقت مش راضي ومصدر الوش الخشب  
عشان يحسس زوجته إنها مقصرة فتضطر تبذل مجهود أكبر عشان  
ترضيه.

الأشخاص دي مؤذية. عشان مش مباشرين ومريكين ومابتقاش  
فاهم هي ملاحظاتك دي حقيقية ولا تهيئات، الناس دي محاولتهم  
لابتزازك بالخصام والبعد وتصدير القمصنة بتقول إن عندهم نزعة  
تسلطية، وإيهم يفتقروا للحنية والرحمة، وفي معظم علاقاتهم بيدفعوا  
الي قدامهم إنه يحس بالذنب عشان ياخدو منه أكثر.

وبمرور الوقت بتلاقي إن أسلوبهم المتكرر بيخليك يا تفضل تدافع  
عن نفسك، يا تخي عليهم تفاصيل حياتك وتبقى عايش وكأنك بتعمل  
حاجة غلط هي في الأصل حقا.

لو إنت من الناس اللي بستخدم الأسلوب ده اللي اسمه عدوانية  
سلبية:

### passive aggression

فأنت محتاج تراجع نفسك وتقرأ وتتعلم ازاي تبطل تتصرف  
كده، أو استعين بمتخصص يساعدك تفهم بتعمل كده ليه! ويمكن  
تستعيض عنه الأسلوب ده بإيه!

بس خليك متأكد إنك لو كملت كده هتخسر، هتخسر كثير.

## العيب السابع:

### المساحات لا تعمل

- لازم تصلح المساحات على فكرة، الشتا دخل والمطرة مع التراب اللي في الجو هيخلوك ماشي مش شايف قدامك.
- معاكي حق ونضطر نركن كل شوية على جنب زي الشتا اللي فات وننزل نمسح بالفوط عشان نعرف نكمل.
- تعرف أنا خطيبي اللي سبته كانت مساحاته بايظة برضوا.
- بتهزري، ده إنتي موعودة بقى!
- مقصدش مساحات عربيته، أقصد مساحاته هو الشخصية.
- إيه مساحاته الشخصية دي؟ تقصدي مساحة الحمام؟
- لأيا خفيف، أقصد إن كل واحد له مساحات بينظف بيها نظرتة للحياة؛ فيه ناس دايماً شايفة الدنيا حلوة والحياة جميلة وصافية؛ دول اللي طول الوقت في علاقاتهم بيختاروا يشغلوا المساحات، فبيعرفو يشوفو مزايا الشريك عشان إزاز عربيتهم نضيف.
- وفيه ناس بقى زي اللي كان خطيبي، مش شايف غير الوحش، وعلى طول بينتقد ولو عملت مليون حاجة كويسة وحاجة واحدة وحشة، مش هيشفو غير الوحش، شايف الوجود كله من ورا ازاز مغبر.
- عارف إنت الشخص اللي لو نسيت حاجة تخصه مرة يقولك إنت دايماً ناسيني، ولو اتأخرت عليه في مشوار يقولك إنت على طول بتتأخر، ولو مردتش على اتصاله مرة يقولك إنت طول عمرك بتتجاهلني.

عارف الزوج اللي لو مراته طلبت منه حاجات من السوبر ماركت فنزل ورجعها بشيء وشويات ونسي حاجة واحدة، مش هتبص لكل اللي اشتراه وتركيزها هينصب بس على اللي نسيه، وهتفضل رايحة جاية تقول: «يا خسارة لو كنت جبت الفانيليا كنت عملت كيك، أنا مش عارفة ازاي تنساها!».»

الناس دي كمان بتبقى قاسية على نفسها، مابتشفش الحلو اللي جواها ولا بتفرح بإنجازاتها، عيونها دايماً شايفة المهمة الوحيدة اللي لسه ماعملتهاش.

فلو إنت فاكِر إن انتقادك لشريك حياتك وتذكيره دايماً بالي ناقص هيخليه شخص أحسن وهيخلي العلاقة أفضل فأنت غلطان.

أيوا الصح الشريك لازم يبقى أمين مع حبيبه، كأنه مرايته ويوريه دايماً الحاجات اللي محتاج يشتغل عليها عشان يوصل لهدفه، لكن ازاي وبأي طريقة.

قبل ما تفكره بالي نسيه -لو يعني الأمر يستاهل- أشكره الأول على اللي عمله، قبل ما توريه الحاجة اللي لسه محتاج ينجزها، امدح واثني الأول على كل اللي أنجزه.

محدث هيجب يعيش مع شخص طول الوقت شايفه من ورا زجاج مغبر، محدش هيسعد في علاقة بتوريه طول الوقت إنه غلط ومحتاج يصلح.

واشتغل على عيوبك إنت، لأن ده هيحفز شريكك يشتغل هو كمان على نفسه. وصلح المساحات؛ شريكك كله مميزات بس إنت اللي محتاج تشوفها.

## العيب الثامن:

### الفرامل سايبة

– أنا معرفش إزاي ده بيحصل؟ أنا فجأة بلاقي عفاريتي كلها طلعت  
وبقول كلام فظيع وجارح وبعد ما بهدى ما بصدقش إن أنا اللي قلته.

– بتشتني يعني؟

– بشتم؟ ده أنا بسب وبلعن وبشتم ومفيش حاجة بتوقفني، لا إنه  
يسكت بيهديني ولا إنه يرد الإساءة بيسكتني، عارفة لما الفرامل تسيب  
وإنتي ماشية في أمان الله وفجأة تلاقي نفسك مش عارفة توقفي العربية،  
أنا ببقى كده.

– طب ليه؟ ليه غضبك بيوصل لكده؟

– صدقيني مش عارفة غير إني ببقى عاوزه أكسر فيه، أهده،  
وأجرحه، وبعدها بنهار بقى بزعل من نفسي أوي، وأفضل أسألني مين  
الست دي؟ أكيد دي مش أنا. الست اللي بتصوت في وش شريكها،  
وتصرخ وتهدد دي مش أنا.

– إنتي بتحبيه؟

– أيوا بحبه، بس لما بحس إنه ضعيف، ومش عارف يقول لأمه لأ  
بتجنن.

الشخص اللي فجأة بيتحول لوحش كاسر، أسد غادر فجأة ده؛  
عنده مشكلة، عنده عيب تصنيع راجع للطريقة اللي اترى بها:

\* يا إما كان بيشوف حد من أبويه بيوصل للي هو عاوزه بالطريقة دي؛ يدبذب في الأرض ويصرخ ويجرح ويهاجم فيجبر الطرف اللي قدامه يستجيب.

\* يا إما الموقف اللي حصل وطلع العفاريت بتاعته، ده موقف ليه جذور قديمة، قديمة جداً من أيام الطفولة، بيلمس مع حاجة حصلت معاه في الماضي فبيفكره بالطفل اللي جواه المجروح.

### wounded inner child

فبيبتدي يشن هجوم شرس على شريكه، بيصرخ عشان كان عاوزه يصرخ زمان في الموقف المشابه ده وهو طفل وماقدرش، بيصرخ عشان يقول لنفسه لأ مش هقبل ده يحصل تاني، بيصرخ عشان يحيي الطفل اللي جواه اللي إتأذى زمان ماقدرش يحميه.

\* يا إما هو شخص بالأصل عنيف، وعنده مشكلة ومحتاج يروح لمتخصص يساعده.


فيه ناس عندها طريقة تانية في الهجوم، مؤذية جداً بتطلع في شكل تريقة أو هزار مقنن أو سخرية من شريكها في ذوقه في اللبس أو هجوم على حد من أسرة الشريك أو أصدقاؤه.

الاعتداء اللفظي على حبيبك واستخدام العنف حتى بلامح وشك أو الإشارات اللي بتحمل تهديد بيخلق عنده جرح عميق في روحه، وحتى لما الجرح ده بيخف بيفضل سايب ندبة جواه، هتتراكم الندوب وهيدبل الحبيب فترة، وبعدين هيرفض، هيرفض إهانتك وهيمشي.

لو كملت كده هيسيبك، ويمشي.


---

اللافتة الثالثة عشرة:



بإمكان أي شخص  
أن يستحضر عفاريتك،  
لكنك الوحيد القادر على صرفها!

## فداكي ألف عربية



---

– حبيبي هو أنا بعد الشر عليا لو عملت حادثة وكلمتك أعيظلك  
و أقولك الحقني، هتعمل إيه؟

– لا إله إلا الله، ليه الأسئلة دي ع المسا؟

– معلش خدني على أد عقلي.

– أكيد هتخض...

بقاطعه:

– لأ، أنا عاوزه أعرف أول كلمة هتقولها، أول كلمة هتخرج منك؟

– هسألك إنتي كويسة؟

– حلو أوي، طب لو عرفت إن عربيتي خلاص ماتت خالص

هتقولي إيه؟

– هقولك فداكي ألف عربية، المهم إنك بخير.

– طب لو أنا ساعتها قلتك إنني حزينة ع العربية، هتقولي إيه؟

– ياختااااي.. يابنتي عايزة أنام.

– رد بس الله يخليك.

– هقولك طبعًا حقك تزعلي، مش عربيته اللي دافعة فيها دم

قلبك.

– الله عليك والله، طب أنا دلوقتي متضايقه إن خطيبي حبيبي

اللي هو إنت كان واقف بهزر أوي مع الحيزبونة اللي اسمها نيهاد

يوم عيد ميلادي وإنت عارف إنني مابطيقهاش، ليه مش بتقولي

حقك تتضايقي يا حبيبتى؟ ليه مش بتقبل مشاعر ضيقي وتعملها (validation).

– اعملها إيه يا أختي؟ ده إيه ال(validation) ده؟

– ده القبول، يعني تقبل مشاعري زي ما هي، وتوافقني إن حقي أحسها.

– عشان لو قلت لك كده ف ده معناه إن على راسي بطحة وإني غلطان وده مش حقيقي، وبعدين أنا عندي شغل الصبح بدري اقلي بقى وسيبيني أنام الله يرضى عليكى.

– طيب نام وأنا بحكي لك الحدوتة دي، كان ياما كان في قديم الزمان ثلاث بنات صاحبات؛ عالية وأميرة وسلى، سلى مجتهدة في شغلها جدًّا لكنها دايماً بتوصل متأخرة على الأقل ساعتين، وده عاملها مشاكل كتير مع مديرها، في يوم بعنت رسالة ع الواتس آب بتاع الجروب بتاعهم كتبت فيها (أميرة، عالية عايزة أشوفكم النهارده ضروري، المدير بتاعي طلب مني أرتب أمورى عشان هيمشي في آخر الشهر وأنا منهارة).

– ده إيه، قديم الزمان اللي فيه واتس آب ده؟

– لأ منا جيا لك م المستقبل حيث الواتس آب ده حاجة كده من الزمن الجميل يا شهريار، وبعدين ما إنت مركز أهو أمال عاملي فيها عايز تنام ليه؟

المهم أول ما دخلوا لقوا سلى قاعدة في الكافيه اللي اتفقوا يتقابلوا فيه، وطبعًا أول ماشافاتهم انهارت عياط وقعدت تشتم في

مديرها وتلعنه، وده كان رد فعل كل صديقة منهم (عالية: يا سلمي متعيطيش يا سلمي، بعدين إنتي كنتي متوقعة إيه؛ الراجل ياما قالك أهم حاجة عندي توصلني في ميعادك وإنتي مسمعتيش كلامه، ياللا خلاص اللي حصل حصل يا حبيبتي، متقهريش نفسك. أميرة بتحضنها أوي وبتطلع مندبل من شنطتها تناوله لهما).

الخطيب الشهريرار: وقفة هنا بقى يا شهرزاد، أنا غالبا فهيمتك؛ انتي شكلك هتوريني مثالين لصديقتين واحدة بتتصرف صح والثانية لأ.

الخطيبة الشهرزاد: بالظبط يا شهريرار، وطبعًا إنت أكيد دلوقتي عرفت إن أميرة هي اللي هتتصرف بقبول تجاه مشاعر سلمي وهتعلمها (validation) وعالية هي اللي لسه ماتعلمتش تعمل ده ازاي. لو خدت بالك أول حاجة عالية قالتها زي ماكلنا متعودين لما نشوف حد بيعيط: «ماتعيطيش». هي هنا بتطلب من صاحبها ماتعبرش عن مشاعرها، تاني حاجة بتلومها وبتحملها المسؤولية من تحت لتحت وفي التوقيت الغلط.

شهريرار: طب ما تخلي عالية تسكت شوية وخلي أميرة بس اللي تتكلم.

شهرزاد: أوكي، ياللا بينا نرجع للثلاث بنات، سلمي بتعيط وبتحكي إزاي مديرها ناداها وإزاي قال لها الخبر، بتحكي عن التزاماتها المادية الكثير اللي لسه مش عارفة هتعمل فيها إيه عشان تغطيها بعد ما اترفدت، أميرة قاعدة جنب سلمي ماسكة إيديها وكل شوية تناولها مندبل، حاطة تليفونها ع التراييزة على وضع الصامت، ومدية كامل انتباهها لسلمي، ووشها عليه علامات تعاطف، بتسمع من غير ما تقاطع ولا تصدر

أحكام، يبجي الجرسون يسألهم: «تطلبو إيه؟» بترد أميرة: «إدينا شوية وقت لو سمحت». ودول كده أول خطوتين من خطوات القبول إني أكون حاضر بكل حواسي مابنشغلتنش عن اللي بيتكلم برسالة واتس أب جت ولا بجارسون معدي، وإني أكون متعاطف مع اللي قدامي وحاسس بوجعه. ماقلتلهاش مثلاً: «اسكتي والله كلنا قرفانين؛ ده أنا لسه متخافقة مع جوزي الصبح أنا كمان».

ناس كتير أوي فاكرة إني لما حد يبجي يشتكي لي من حاجة ف اشتكيله أنا كمان، أنا كده بخليه يرضى باللي هو فيه ويقبل فكرة إن الحياة كلها هموم، لكن اللي بيحصل في الحقيقة إنك لما بتشتكي إنت كمان بتوصله فكرة إنك مش مهم، مشاعرك مش مهمة، ماتستحقش معاملة خاصة دلوقتي لأن أنا كمان زيك في هموم تانية، نرجع لسلي، سلى: «أنا أكثر حاجة مضايقاني إن مديري مافرقش معاه أي بروح كل يوم من المكتب بعد ما كل زمايلي يروحو بساعتين؛ عشان أعوض الساعتين اللي بوصلهم متأخرة، لكن أهم حاجة عنده إني أوصل الصبح في ميعادي، مع إنه عارف أد إيه ده صعب أوي عليا». أميرة: «يعني إنتي حاسة إنك مظلومة يا سلى وإنه مقدرش تعبك؟». سلى: «لأ، أنا حاسة إني متغاضة ومحبطة من نفسي، هو طالب مني حاجة مهمة بالنسبة له وأنا بقدم له حاجة تانية ملهاش أي قيمة عنده». أميرة: «يعني إنتي متضايقة من نفسك؟ مش من مديرك؟». سلى: آآه، متضايقة من غباي.

تالت خطوة من خطوات القبول اسمها (mirroring) أنا بحاول أبقي مراية الشخص اللي أنا بعمل قبول (validation) لمشاعره، بحاول أساعده يخمن حقيقة اللي جواه؛ زي ما أميرة بتعمل مع سلى

هنا بتساعدنا تسمي مشاعرنا، هل هي إحساس بالظلم ولا إحباط ولا  
ندم ولا غضب ولا حزن!

وزي ما إنت شايف يا شهريار سلى في الأول كانت غضبانة جدًّا من  
مديرها، لكن بعد ما أميرة سمعتها وتعاطفت معاها وابتدت تساعدنا  
تسمي مشاعرنا، تعملها (labelling) اكتشفت سلى إن الشعور  
الموجود عندها هو الإحباط من نفسها بسبب عدم إدراكها لعواقب  
سلوكها المتكرر.

ساعات ناس كثير بتخلط بين المشاعر وبعضها، زي مثلا الحزن  
والغضب، ناس كثير جدًّا بتفتكر نفسها حزينه لكنها ف الأصل غضبانة،  
يمكن ده بيحصل لأننا اتعودنا نشوف الحزن شعور مقبول وطبيعي،  
وبنبص للغضب على إنه شعور عيب وميصحش ولازم نستعيد بالله من  
الشیطان الرجيم أول ما نحسه، مع إن الاتنين مشاعر، طبيعي نعيشها  
ولاظم نعبر عنها ونعلم ولادنا الصغیرین اللي إحنا ماتعلمنا هوش؛ إزاي  
يعبروا عن مشاعرهم. الحدوتة كلها دايمًا في إزاي، أنا بعبّر عن المشاعر  
دي إزاي؟ حزين وبلطم على وشي، ولا غضبان وبخبط دماغی ف الحیط.

شهريار: طب ارجعي للحدوتة.

شهريار: نرجع للحدوتة، أميرة: «بصي يا سلى أنا حاسة بيكي  
كويس جدًّا ما إنتي فاكرة من سنتين لما كنت مرعوبة أسيب شغلي  
عشان التزاماتي المادية وأنا عارفة كويس أوي التزاماتك الكثير  
وفاهمة خوفك من إنك تتعرضي لنفس الزنقة اللي اتعرضتي لها من  
فترة لما سيبتني شغلك المرة اللي فاتت بس بإذن الله من بكرة ندور  
على شغل جديد ونكلم حد يحاول مع المدير بتاعك مرة تانية والحمد

لله إنك دلوقتي فهمتي كويس إن قعادك ف الشغل ساعتين بعد ما كل الموظفين يمشو مش هو ده اللي مديرك عايزه منك، هو عايزك تروحي الصبح في معادك زي كل الموظفين».

أميرة هنا عملت حاجة تانية من أهم الحاجات اللي بتتعمل واحنا بنقبل مشاعر الآخر؛ فكرت صديقتها بموقف مشابه هي نفسها مرت بيهما عشان توريمها هي أد إيه حاسسة بيهما وفي نفس الوقت صداقة أميرة وسلمى الطويلة أتاحت للأميرة إنها تبقى عارفة تاريخ وخلفية مخاوف سلمى جاية منين وده سهل مهمة الصديقة.

شهریار: طب مش يمكن علياء مريضيتش تتصرف بطريقة أميرة عشان هي أصلاً مش موافقة على تصرف سلمى وشايفة إن مديرها معاه حق؟

شهرزاد: طب وهو إنت شايف إن أميرة طلعت موافقة سلمى على تصرفها؟

شهریار: لأ.

شهرزاد: شوف يا مولاي، فيه فرق بين القبول والموافقة؛ القبول يعني أنا بعترف وأشهد إن مشاعرك مباحة ومن حقك تحس بيهما وإن أي حد مكانك كان هيحس نفس المشاعر دي، يعني القبول بيكون للمشاعر، والموافقة هي أن أقول لك تصرفك ده صح وبرافو كمل فيه، يعني الموافقة بتكون على السلوك.

شهریار: طب مش يمكن لو قبلت مشاعر الشخص اللي قدامي اللي هي أصلاً ناتجة عن سلوكه الغلط يبقى أنا كده بشجعه ع السلوك ده؟

شهرزاد: العكس تمامًا هو اللي بيحصل لأنني لما بقبل مشاعر وأفكار وتصرف شخص أنا كده بقوي علاقتي بيه وفي نفس الوقت بحافظ على وجود وجهة نظر مختلفة قدام عنيه تخليه يرجع في يوم من الأيام يعيد النظر فيها بعد ما انفعاله يهدى. تخيل لو شخص بيشر ب سجاير وكل كل اللي مش بيدخنوا قطعوا علاقتهم بيه كده هيلاقى فجأة نفسه متحاوط بس بالمدخنين وساعتها عمره ما هيعرف يبطل تدخين.

– فهمت يا شهرزاد هانم ومعاكي حق تغيري عليا م الحيزبونة وأنا مقدر إحساسك، ممكن تسيبيني أنا م بقى، وماتسوقيش عربيتك بكره خدي تاكسي، مش ناقصين حوادث.

### اللافتة الرابعة عشرة:



## استقالة شرطي مرور



---

– طب معلى يا محمد يعنى و إنت ليه معذرتش ليه؟ طالما مش هتقدر.

– ما انتى عارفة أنا مقدرش أقول لحد لأ على حاجة، أخاف يزعل.

– ليه يزعل؟ هو عايز ياخذ عربيتك يطلع بيها اسكندرية يستجم هناك كام يوم، و إنت محتاج العربية عشان حضرتك دكتور تخدير بتلف يومياً على مستشفيات القاهرة الكبرى كلها كعب داير، عارف لو هياخدها يوصل بيها حد من أهله كبير أو مريض مشوار أو لو محتاجها يقضى واجب عزا مثلاً كنت قلتلك معاك حق، وقضى إنت مشاويرك اليوم ده مواصلات، بعدين مش هولسه واخدها من شهر برضه عشان كان عنده فرح وفضلت تلف وراه كام يوم لحد ما رجعها لك.

– بصي ماتفضليش تأنبيني، اللي حصل بقى.

...

عارف إنت الشخص اللي ما بيعرفش يقول لأ على حاجة من احتياجات الطرف اللي معاه فى العلاقة؟ وبدل لأ بيقول حاضر، وأوكي، وبعدين يرجع يفكر مع نفسه فيحس إنه كان عايز يقول لأ، بس قلقان من إنه يحبط الشخص اللي قدامه، فرد بحاضر، وكأنه مجبر.

الشخص اللي بمرور الوقت بيلاقي نفسه بيدي أكثر ما بياخذ، فيبتدي يحس إنه مستنزف ومستهلك، بعد ما يكون شريكه ابتدى يتعود منه على مستوى معين من التنازلات، أو يستغل النقطة دي فيه ويبتدي يحمله حاجات فوق طاقتة.

ولو تعب وقرر ما يعملهاش يلاقي نفسه بيتهاجم ويئنتقد فيحس أكثر بالذنب وإنه غير مقبول إلا لما يرجع يقدم تاني وتالت؛ فيتأكد له إحساس إنه مش محبوب لذاته لكن للي بيقدمه.

الشخص اللي معين نفسه حلال العقد، اللي مسؤول عن كل مشاكل اللي حواليه، اللي نصب نفسه شرطي مرور واقف طول النهار على رجليه ينظم حياة الناس، يتوتر لو فيه مشكلة مش بتاعته أصلاً هو مش لاقيلها حل، وكأن ده المغزى من وجوده في الحياة إنه يتأكد إنه يمنع تصادم العربيات، ويتأكد إن كل واحد طريقه سالك.

الشخص اللي متخيل إن دوره في العلاقة إن الطرف التاني يفضل راضي طول الوقت؛ ولو مش راضي يبقى أكيد المشكلة فيه هو، وكأن نجاح العلاقة كلها على كتافه لوحد.

الشخص اللي بيحتاج يحس إنه متحكم في خط سير الطريق أو العلاقة، عارف هي رايحة لفين وضامن إنه مش هيتفاجئ.

الشخص اللي لما بتحصل مشكلة بينه وبين شريكه أول حاجة بيعملها إنه بيلوم نفسه ويبتدي صوت جواه يقوله: «لو إنت شخص أحسن ماكانتش حصلت المشكلة، لو كان رد فعلك أفضل كانت الدنيا عدت بسلام، أنت المسؤول عن غضب شريكك وعدم رضاه وتعاسته».

الشخص اللي دايمًا يشخصن الأمور؛ فبقى نجاح العلاقة في مفهومه معناه إنه هو شخص كويس، وفشلها معناه إنه فيه حاجة غلط فيه.

الشخص اللي مبيقدرش يحكي على مشاكله في الشغل أو في علاقته  
ودايماً بيخبيها عشان شايفها انتقاص من قدره.

الشخص اللي بينتقد كثير، بيدي ملاحظات على كل حاجة عشان  
يحمي نفسه من إنه يتهاجم.

الشخص اللي صعب أوي يتحمل فكرة إنه يعمل حاجة ومايتلقاش  
مدح عليها، أكيد كلنا عاوزين نحس إننا بنتقدر، لكن ممكن نعمل  
حاجات تعدي ومحدث ياخد باله منها، إنما الشخص ده لازم كل حاجة  
بيعملها بتقدر، أصله دافع فيها كثير؛ ف ازاي ماتتشافش، وتتقدر أو  
بمعنى أصح هو عاملها وهو مش عايز يعملها، غصب عنه يعني، لكن  
مضطر عشان ياخد قصادها حب وقبول؛ لأنه حاسس إنه هو في ذاته  
مش قيمة، لكن قيمته في اللي بيقدمه.

الشخص اللي يدفع نص عمره عشان يتجنب الجدل والدخول في  
مشادات من أي نوع عشان كده ممكن يحط احتياجاته كلها على جنب  
أو يرميها في أقرب سلة مهملات أو حتى يعتذر ويطلع نفسه الغلطان،  
الشخص اللي لو فيه موضوع إنت وهو مش متفقين فيه أو مش واخدين  
نفس القرار أو معندكوش نفس وجهة النظر فيه، تلاقيه بيقولك بلاش  
كلام في الموضوع ده، أو أجله؛ شعاره في الحياة: «خلاص عدي يا باشا  
عدي، نهارك أبيض».

البنّي آدم اللي يقول بحبك وهو لا يعنهما، مش مركز ومش  
حاسسها، أو اللي يقبل يعمل حاجات هو مش عايز يعملها عشان بس  
ينهي الجدل، أصل النزاع بالنسبة له مرعب عشان بيخاف ينتهي بإنه  
يتساب، ولو اتساب هيحس إنه منبوذ.

الشخص اللي محتاج الآخرين يحتاجوه بالأخص القريبين منه، مش قصة عايز الناس تحتاجه أو بيعب الناس تحتاجه، لأ ده عنده احتياج مُلِح إن الآخرين يحتاجوه فبنلاقيه دايماً يدخل العلاقة عشان يقوم بدور المنقذ، زي واحد يختار يحب واحدة أهلها واقفين ضد طموحها وبيمارسوا عليها العنف والتسلط فيقرب منها عشان يخلصها من العذاب.

أو زي بنت توافق تتخطب لواحد فاشل مدمن عشان تصلح حياته، وتقول دايماً لنفسها أصل من غيري يضيع، الأشخاص اللي بيفتكروا نفسهم مكافأة للآخرين.

الشخص اللي مايبسمحش لنفسه يغلط؛ فدايمًا حاسس إنه عليه ضغط إنه يعمل كل حاجة صح عشان يلبي احتياجات الآخرين ويخلصهم سعداء، إحساسه بتقديره لذاته جاي من إنه يصلح غلطات اللي معاه ويحل مشاكلهم.

الشخص اللي لو قعد لوحده شوية يحس بالتقصير تجاه اللي حوالية ويا سلام لو اتبسط في الحبة دول يحس بذنب رهيب، يحس كمان بالذنب لو بقت عنده متطلبات.

الشخص اللي بيتعامل مع نفسه كأنه إله والعياذ بالله مش مسموح له يغلط ولا يتعب ولا يشتكي، اللي صعب يقول إنه عنده محدودية زي أي بني آدم تاني اللي صعب يقولك أنا مقدرش على ده أو ده فوق طاقتي وبرا حدود إمكانياتي.

الشخص اللي مايعرفش يحافظ على مساحته الشخصية ولا حدوده، اللي مايعرفش يقول لحد: «استوب، اوقف عندك، ده مش

حقك، ده مش مناسب ليا». وببسيب الآخرين ينتهكوا خصوصياته، الشخص اللي بقى يلاقي راحته في العزلة.

الشخص اللي بقت عنده مشكلة إنه يدرك حقيقة مشاعره أو يطلق عليها اسم، الشخص اللي مابقاش عارف إيه هي احتياجاته أصلاً، لأنه اتعود يليي احتياجات الآخرين ويتوحد مع مشاعرهم.

فبقى عنده ارتباك يا ترى ده احتياجي ولا احتياج اللي قدامي وأنا اتبنيتة! يا ترى الصوت اللي جوايا ده صوت رغبتي أنا ولا صوت اتعودت أسمعها لأنه رغبات اللي حواليا. الشخص ده بقى فاقد اللينك اللي بينه وبين نفسه، مش عارف يتواصل معاها.

فلو إنت ابتديت تدرك دلوقتي إن معظم الصفات دي بتنطبق عليك، وعارف إنك في علاقة مؤذية أو مش صحية ومش قادر تمشي، أو مدرك إنك هتنهار لمجرد إنك تتخيل إن العلاقة اللي إنت فيها ممكن تنتهي، وكأنك مدمن بتجيله أعراض انسحاب أو مستني شريكك يقولك آه معاك حق أنا شخص لا يطاق فعلاً واحنا لازم ننفصل؛ ف إنت كده قطعت نص الطريق.

الإدراك نص رحلة التعافي، ولأزم تبقى عارف إن قدامك رحلة طويلة هتمشيها، بس في الأول لازم تستقيل من وظيفة شرطي المرور وتركب عربيتك وتبدأ تبقى مسؤول عنها هي وبس، مش عن كل عربيات اللي حواليك.

الرحلة صحيح طويلة بس ممتعة؛ خلاص بقى هتشيل من على كتافك كل الحمل اللي مايخصكش واللي ألزمت نفسك بيه، وهتبدأ تتعرف على نفسك الحقيقية اللي كانت مستخبية تحت ركام احتياجات

الأخرين وهتكشف فيها كنوز وتهتمها، وهتبدأ تتواصل معاها بشكل حقيقي وصادق، وهتعرف إن اعتنائك بنفسك مش أنانية واحترامك لمحدودية قدراتك هو منتهى الشجاعة ولجوءك لمتخصص يساعدك هو منتهى الحب.

طب لو حبيبك بقى هو الشخص اللي بتنطبق عليه المواصفات دي، تعمل إيه عشان تساعد؟ تساعد مش تغيره:

1- تقبله زي ما هو؛ تحبه وتوريه تقديرك وحبك ليه طول الوقت، الحبيب اللي زي ده هتلاقه دايماً فاكر عيد ميلادك، جدول أعمالك الزحمة جداً، بيفكرك بميعاد الدكتور، قول له دايماً إنك محظوظ بيه.

2- اسأله عن نفسه دايماً، اسمعه، اديله فرصة بيتدي يركز مع نفسه ويبص جواه، ولو لقيته بينتقدك ماتخدش نقده بشكل شخصي.

3- لو حسيته بيتصرف بشكل درامي فهو كده محتاج انتبهك وتطمينك، حاول تطبطب وتوريه إنك بتحبه لأن ده غالباً نابع من عدم إحساسه بالأمان. بلاش تهاجمه أو تقول: «سيبني لوحدي أولما أهدى هرجعلك»، حدد وقت معين هترجعه فيه؛ بعد ساعتين، آخر اليوم، لأن الشخص ده اتعود وعنده احتياج دايماً يشوف الدنيا واضحة، وكله يبقى بالنسبة له تحت السيطرة.


كل واحد فينا عنده حياة طويلة عاشها قبل ما يقابل حبيبه، الطفولة كانت الجزء الأكبر والأهم والأخطر فيها؛ واللي اتخزن فيها مشاعرنا وأفكارنا واللي اتكونت فيها صورتنا عن نفسنا من الرسائل اللي وصلتلنا من أهالينا، علشان كده مهم نعرف وندرك إن جزء كبير مننا مش إحنا.

مش كل تصرفاتك هي أنت ومش كل معتقداتك عن نفسك صحيحة، إنت عمرك ما هتتعرف تحدد هل العربية الياباني عربية اعتمادية وتوفر في البنزين ولا لأ، طب هل العربية الفرنسي مريحة وبتقدم لك رفاهية ولا لا، غير لما تسوقها وتتحرك بيها لوحدهك عشان تعرف إمكانياتها وخصائصها عيوبها ومميزاتها. المهم تستمتع بعريبتك وتسوق على مهلك. وانسى اللي اتقالك عن عريبتك زمان، واكتشفها بنفسك.

### اللافتة الخامسة عشرة:



## بیز لاین، وهای لاین، و بینهما متشابهات



---

بيزلاين، وهاي لاين، وبينهما متشابهات!

رجالة!

سي السيد وأمينة:

– أنا تخنت أوي يا سي السيد.

– إيه ده إنتي لسه واخدة بالك.

أحمد ومنى:

– أنا تخنت أوي يا أحمد.

– أحبك يامدملج في كل حالاتك، وبعدين إنتي قمر أصلاً، أمال أنا

أروح فين بكرشي ده!

سي السيد:

– إنتي هتنزلي كده؟ البلوزة ضيقة أوي والله ما أنتي خارجة بيها.

أحمد:

– إيه الجمال والشياكة دي! احنا طبعًا مش هنخرج كده والرجالة

الي برا دول مش هيشوفوا مراتي بالحلاوة دي! صح ولا إيه؟

فيه سي السيد تلاقي الست بتبعد عنه بالمشوار، أو بتدعي عليه

هي وصاحباتها ليل نهار، وفيه أحمد تلاقيها دايبة في تفاصيله، وبتدعي

ومن جوا قلبها ماتتحرمش يوم منه.

سي السيد لو قالها تناوله الريموت يبقى طلبه تقيل على قلبها،

وأحمد لو طلب منها إيه بتعمله وهي راضية ومبسوطة.

فيه أحمد الست معاه بتبقى ست بجد، حاسة بأنوثتها وكيانها  
عشان معاهها راجل، وفيه سي السيد بيخليها تقول يا ريتني كنت الراجل.

الحاجة الوحيدة اللي بتفرق مع الست الطيبة هي طريقة تعامل  
الراجل معاهها؛ طريقة المعاملة هي اللي بتحسسها إنها ملكته المتوجة،  
متقدرة ومنتشالة ع الراس.

الرجالة اللي بجد، هي اللي بتصون ف بتتصان. الرجل اللي بيشيل  
الست فوق راسه بيخليها تحطه جوا عنيا.

## فئات الرجال الأربعة:

### الفئة الأولى الراجل البيزلاين أو الطفل:

ده رجل بيكبر في السن مابيكبرش في التفكير، في العادة مايعرفش  
حاجة عن ازاى يتعامل معاكي، ومعدوش استعداد يتعلم، لبسه وأكله  
والبلاى ستيشن أهم منك ومن ولادكم، فهتضطري إنتي اللي تفكري  
وانتي اللي تاخدي وتنفذي من أبسط لأهم القرارات.

بيحكي معظم حياته لصحابه، وبتحسي إن أسرار بيتكم البشرية  
كلها عارفها، في العادة الراجل ده بيبقي عنده مشاكل مع أمه، ومع  
ده بيهمه أوي رأيها فيه، مابىخططش للمستقبل، ولا بيهمه يعني إيه  
مسؤولية، هو مش وحش لكنه طفل، الأعجب إنه بيتوقع منك احترام  
وتدليل. معاه يا تتحولي لطفلة زيه يا إما تبقي إنتي الراجل.

### الفئة الثانية الرجل المضطرب:

ده واحد مش عارف هو عاوز إيه، بيخاف من الالتزام جدًّا، دايمًا  
عنده رجل جوا العلاقة ورجل برا، هو مش شرير وهتلاقي نفسك مش

---

عارفة تكراهيه بس متلخبطة ومش فاهمة هو عاوز إيه، دايمًا يقولك  
اصبري عليا واديني فرصة أفهم أنا عاوز إيه.

أول ماتدي له ضهرك وتمشي هيقرب ويلزق، وأول ما تطمنيه إنك  
معاه بيتدي يتوتر ويهرب، رسايل عكس بعض طول الوقت، وتستني  
وتستني وتستني...

معاه العمر بيخلص ومابتمشيش خطوة واحدة لقدام، هو أصله  
مش رايح في حتة، هو واقف مكانه.

### الفئة الثالثة الراجل اللعوب:

ذكي وأناي، وعمره ما يبقي مخلص لست واحدة أبدًا أبدًا، لكن  
معظم البنات بتحبه عشان جذاب وعنده كاريزما، وفي العادة عنده  
حاجة تخلي الستات تتشد له؛ غني بقى مشهور، عنده سلطة، وعلى  
طول مستحوي وببيرق.

في بداية العلاقة هيغرقك اهتمام وحب وهيقولك ويوريكي اللي  
نفسك تسمعيه وتشوفيه.

هيوصل لعقلك عن طريق قلبك مش العكس، بس كله مؤقت يا  
حلوتي وتبقي عبيطة لو صدقتي إنه هيتوب على ايديكي، شوية هيبدا  
يبعد وهتستغربي وتسألني نفسك هو أنا عملت إيه عشان يبعد! اتأكدي  
إن الحدوتة مش فيكي، هو بس معندوش وقت يضيعه مع ست واحدة  
في حب وإخلاص، في طابور طويل عاوز يلحقه. معاه قلبك هيتكسر  
هيتكسر مفيش مفر.

## الفئة الرابعة الراجل الهاي لاين أو الناضج:

ده راجل ناضج، مسؤول، عارف هو عايز إيه، الحب عنده التزام مش وعود، مش هيطاردك بشكل مريب ولا هميتم بيان معاكي براق وبيلمع طول الوقت، لكن هتلاقيه تلقائي وعلى طبيعته، هيديكي وقت واهتمام، أكثر من كلام وهدايا، بالعكس ده انتي هتلاقيه كمان بيحب يقتصد قبل الجواز، مش بخيل لكن عنده خطط مستقبلية إنتي جزء منها.

الراجل الحقيقي بيعرف يصالح ويعتذر، لما تختلفي معاه هميتم يسمع وجهة نظرك، الراجل الحقيقي بيدشيل معاكي مسؤولياتك، بيثق فيكي وبهمه أمانك، معاه مش هتحتاجي تقولي يا ريتني كنت راجل.

## بیز لاین وهاي لاین و بینهما متشابهات

### ستات

أمینة:

أنا طلعت روحي النهارده في السوبر ماركت، اشتریت حاجة البيت وكان فيه خصومات فجبته كابتشينو بدل اللي خالص، يا رب بس تقدروا تعبي.

منى:

خمن، سمعت غنوة إيه النهارده وأنا في السوبر ماركت فكرتني بيك! آه ولقيت على عرض الكابتشينو أبو رغوة اللي بتحبه فاشتريته هلك.

فيه أمينة تلاقى الراجل مش طابق يدخل البيت بسببها، وفيه منى تلاقىه دايب في تفاصيلها وحكاويها. أمينة بتحكى من غير روح، عيونها ازاز، تون صوتها ميت، شريكها مش جزء من تفاصيل أيامها، ومنى موصلة لحبيبها أنه اليوم كله متفصل على حضوره في خيالها وإحساسها بيه.

أمينة لو عيانة وبتشتكي له تلاقىه عمل نفسه ميت ومقلهاش حتى سلامتك، ومنى حبيبها عنده استعداد يعمل أي حاجة عشان بس يحس إنها بقت أحسن.

أمينة بتئن وبتشيله الهم وكل ما يقترح عليها حاجة تقوله عملتها ومفيدش فايده، ومنى بتقوله حبيبي أنا تعبانة قولي أعمل إيه، جربت كل حاجة وقلت محدش هيساعدني غيرك.

الأنوثة مش أنا طبخالك وموفرالك وغسلالك ومخلية بالي من عيالك، بس مصدرالك القمصة ولوية البوز وإنت ليه مش شايل همي، الست الحلوة مش وتر مشدود طول الوقت نافرة وعصبية وصوتها عالي. الأنوثة ست منورة مثقفة، عيونها بتلمع وهي بتحكي، قلبها بيدشع حنية، إيدها بتمسح على قميصه قبل ما يديها ظهره وينزل، الأنوثة ست مابتحمليش نفسها فوق طاقتها، لكن معندهاش مشكلة تقول حقك عليا، ست بتعاطف وتطبطب بجد لو شافته في ضيقة، وبتزغده وتعضه لو بص على غيرها.

الراجل السوي بيقترب من الست الحلوة دي وبيشيلها فوق دماغه، ومبيقدرش يستغنى يوم عنها؛ حتى لو مايقولش كلام حلو وبينسى يجيب هدية، لكن لو حصلت له مشكلة في شغله بيجري يقولها، مبيعرفش ياكل غير من إيدها، هي واحتياجاتها جزء من خطته، من الدافع اللي بيجري على لقمة العيش عشانه.

## فئات النساء الأربعة:

### الفئة الأولى الست البيزلاين أو الطفلة:

دي ست وقفت عند مرحلة الطفولة عايزة في الراجل كل حاجة، معندهاش ثقة بنفسها ولا بقدراتها وذكاءها، شخصية متشبثة برأيها بتدور على راجل تعيش تحت جناحه وياخد باله منها، ماتعرفش يعني إيه حدودها الشخصية ولا مركزة أوي في خصوصية البيت، هتلاقها على تواصل بأهلها طول الوقت لأن عندها إحساس إنها طفلة، لو زعلت منها هتلاقها مش عارفة تعمل إيه، مش هتعرف تعتمد عليها أوي في مهام برا البيت، في العادة هي فوضوية ما هي طفلة؛ بتتمص منك بسرعة،

وبتحب تعيش دور الضحية، بتشتكي على طول وبتهاجم على طول، معندهاش حس فكاهي ومش بتعرف تعبر عن مشاعرها أوي، ودي أسرع ست الراجل بيسيها.

### الفئة الثانية الست الراقية:

دي ست مهتمة أوي بجسمها وشعرها ولبسها والجيم والرقص والسفر، الدلع أهم حاجة عندها، متمركزة حوالين نفسها، راقية ومش بتاعت نكد، واثقة في نفسها ومابتحبش حد يتحكم فيها لكن تحب الراجل يدلعها أوي ويصرف عليها ويشيل شنط الشوينج، وصعب تقول لها لأ على طلب من طلباتها، مبتحبش تقعد في البيت، اجتماعية جداً وصحابها كثير جداً وهتلاقي نفسك معاها دايماً بتتعرف على ناس جديدة، هتلاقي بيتك ريحته حلوة طول الوقت وألوانه مبهجة، لكن الست دي مش بتاعت طبيخ وغسيل، مينفعش تنسى عيد ميلادها ولا تجيب هدايا أي كلام، حياتك معاها دايماً زحمة مع وعد إنك عمرك ما تحس بالملل.

### الفئة الثالثة: الست الماما في نفسها:

الست المضحية الماما في نفسها، اللي فانية حياتها عشان اللي حوالها ومابتشتكيش، أهم حاجة عندها الولاد والطبيخ والتنظيف وممكن تكون بتشتغل عشان تساعد جوزها في الحياة، الست الماما مابتعرفش تقول لأ على أي حاجة لأي حد.

حتى شكل جسمها ماما، بيتوتية، ولو خرجت تلاقها ماشية بالساندوتشات والجواكت، حوض المطبخ بتاعها دايماً نضيف، وهتلاقيها دايماً بتسألك فطرت؟ أخذت الدوا؟ تقل هدومك وإنت نازل.

الست اللي بتزعل منك فتعيط في صمت وماتقولكش، اللي بتعمل لك تورتة عيد ميلادك بإيديها، اللي هتلاقي الجيران بيسيبيوا ولادهم عندها وييستلفوا منها نص عفش البيت، الست دي لو جوزها شهبها بيتوتي وسهل حياتهم تبقى رايقة أوي.

الست دي متقمصة مع جوزها دور أمه، متخيلة إن دورها تأكله وتشيل كوباية الشاي بداله وقصاد ده بتنسى إنها ست، دورها تضحك وتلدع نفسها واللي معاها، تطبط عليه ويتطبط عليها، كل حوادثها عن الطبخ والعيال والدوا والأسعار والتمرين، وتنسى إنها الحبيبة، المجنونة، الملهمة.


### الفئة الرابعة الهاي لاين أو الست الناضجة:

ست طموحة عارفة هي عايزة إيه في حياتها وعارفة هي عايزة إيه من علاقتها، عاطفية بس لازم عقلها يكون مقتنع معندهاش مشكلة تصرف على نفسها، تخطفها بتصرفاتك الرحيمة مع اللي حواليك مش بمظهرك، بتعرف إزاي تلهمك، إزاي توريك نفسك بعيونها، مابتحكمش عليك، بتغضب لو لقت فيه حاجة في العلاقة ضد قيمها وقناعاتها، بتثور لو عقلها مش مرتاح بس بتهدى بسرعة جدًّا، أصلها ملهاش في الدراما، بتعاتبك وتشتكي لك بس صعب أوي تشتكي منك، بتحب بيتها وشغلها، دايماً عندها شغف، الست الناضجة دي لو قابلت الرجل الطفل أو اللعوب أو المضطرب أو المسيطر بتهرب عشان معندهاش وقت ليهم، مخلصه لكنها أسرع ست لو أسأت ليها ومقدرتش وجودها تمشي وتسيبك.

---

الرجالة الحقيقيين موجودين وكثير، والستات المنورة موجودين وكثير، بس كله حسب استعدادك. كل ما تبقى إنت شخص ناضج وناجح وبيحب نفسه، كل ما بتزيد فرصتك تقابل حبيبك.

### اللافتة السادسة عشرة



قد نقع في غرام أحدهم لأن كلامه  
أو أفعاله أعجبتنا، لكننا نبقى  
لأجل الطريقة التي جعلنا نشعر بها

## الطريق ده مش غريب عليا



---

منة: يعني إنتي جاية بعد العمر ده كله يا رانيا تقوليلي إنني كنت متجوزة ماما؟

المعالجة النفسية رانيا: بالظبط.

منة: يعني أنا عشت طفولتي كلها مع أم بتخاصم وتضرب وتشتتم وعلاقتي بيها ماكنش فيها أي تواصل عشان أروح أتجوز راجل يعاملني بنفس الطريقة!

رانيا: بالظبط.

منة: أيوا ليه؟ ليه بعمل كده؟ هو أنا مجنونة؟

رانيا: طبعاً لأ. الطبيعي والمنطقي إن البني آدم لما يختار شريك شبه أبوه أو أمه يختاره شبيههم في الصفات الحلوة اللي هو بيعحبها فيهم، اللي أسعدته كطفل، طب والصفات الصعبة اللي كانت فيهم واللي سببته أذى وجرح يعمل فيها إيه؟

منة: يبعد عنها طبعاً عشان مايقاش عاش نفس المأساة مرتين.

رانيا: ده المنطقي طبعاً واللي العقل الواعي يفهمه، إنك تدور على حد فيه صفات عكس صفات أبوك وأمك اللي ضايقتك، يعني اللي أبوها كان صعب ومايخلمهاش تخرج مع أصحابها ولا تلبس على مزاجها ولا تسمع موسيقى؛ طبيعي تختار راجل يديها حريتها واستقلالها ويسيبها تعيش بحرية، صح؟

منة: صح.

رانيا: طب أمال إيه اللي بيحصل بقى على أرض الواقع ده؟

منة: إيه بقى؟

رانيا: إن العقل اللاواعي اللي مخزن كل ذكرايتنا جواه واللي مايفرقش بين الماضي والحاضر، زي ما اتفقنا، هو اللي بيوجهنا لاختيار الشريك - مش العقل المنطقي الواعي - والعقل اللاواعي ده كل هدفه إنه يتأكد إننا آمنين؛ فيعمل إيه بقى عقلنا الباطن؟ يعيد بناء نفس نمط حياتنا اللي اتربينا عليه، عشان إيه؟ عشان يصلح الوضع القديم، يجيب نفس الأبطال بس يحاول يغير سيناريو الفيلم لصالحنا بقى المرة دي، مش بتاخدي بالك إننا من ضمن العشرات اللي بنقابلهم يوميًا في حياتنا، فيه ناس بننجذب لهما، وناس ما بيسيوش جوانا أي أثر، طب ده بيبقى على أساس إيه؟

منة: معرفش والله.

رانيا: بصي يا منة، لو إنتي دلوقتي خارجة من بيتكم رايحة النادي وقدامك طريقين؛ واحد مشيتي فيه قبل كده ومتعوده عليه وحافظاه بمطباته بالحفر اللي فيه، وطريق جديد ماتعرفهوش - وما مشيتهموش قبل كده أبدًا - هتختاري إيه؟ إيه الأسهل؟

منة: أكيد الطريق اللي نعرفه أحسن من اللي منعرفوش.

رانيا: حلو، عقلك اللاواعي كمان بيعمل كده؛ بيمشي الطريق اللي هو عارفه، وعلى أساس مدى توافق صفات الشخص اللي بتشوفيه لأول مرة ده مع الصور اللي متخزنة بالفعل في عقلك بتنجذبي للشخص ده أو لأ، وكل ما التشابه زاد كل ما انجذبنا للشخص أكثر، وكل ما كانت ملامحه وصفاته بعيدة عن صفات وملامح الأشخاص اللي عاشرناهم في حياتنا ومتخزين في عقلنا، كل ما عدى الشخص علينا مرور الكرام،

وساب صورة باهتة أو ماسابش صور أصلاً؛ عشان كده فيه ناس أول ما نشوفهم نحس بانجذاب مفاجئ، ومن اللحظة الأولى لهم، عشان ييبقوا يشبهوا أوي صورة لشخص مهم صورته متخزنة في عقلنا، والطبيعي طبعًا إن أكثر أشخاص لهم صور متخزنة في عقولنا هما أبونا وأمنا، عشان كده بننجذب للي يشبهوا أهالينا، وعشان كده ساعات لما تشوفي حد وتبقى حاسة إحساس إنه مش غريب عليكى وإن دي مش أول مرة تشوفيه فيها ده بيكون السبب.

منة: تقصدي صور لشكلهم وملامحهم ولا لشخصيتهم وصفاتهم؟  
رانيا: أقصد كل حاجة: ملامحهم، صفاتهم، سلوكهم، طريقة تسريحة شعرهم، قعدتهم؛ هل هي قعدة كلها اعتداد بالنفس وظهرهم مفروود ولا قعدتهم خجولة وظهرهم محني وأكتافهم واقعة لقدام، أقصد مظهرهم؛ لابسين لبس كلاسيكي ومتأنقين ولا لابسين لبس كاجوال ومريح، كمان بصة عيونهم، التجاعيد اللي بتترسم حوالين شفايفهم لما يبيتسموا، كل ده العقل اللاواعي بيلتقطه في ثواني معدودة، ولو حصل ولقى توافق يبسجل استجابة سريعة محببة فلما نشوفه تاني نستدعيها بعد ما بقت ذكرى.

منة: يعني إنتي تقصدي إنى حبيت أسامة عشان صورته تطابقت مع صورة ماما، نفس لون العيون نفس الجسم القوي، الصوت العالي، نفس اهتمامه بمظهره، نفس طريقته إنه يحسبني إنى دايماً غلط، على طول بيخاصم، زهيا بالظبط، وعشان كده وقعت في غرامه من اللحظة الأولى.

رانيا؛ بالظبط، وقعتي في غرام الشخص اللي تخيلتيه هو اللي هيعوضك عن جراح الطفولة؛ لأن عقلك اللاواعي شافه ماما بس تخيل إنه قادر يخلق سيناريو جديد، ده إحنا ساعات كمان نقع في حب الشخص اللي يثبت لنا إن أهالينا كانوا صح، إنتي مع أسامة كل يوم تقولي لنفسك: «شفتي مامتك كان معاها حق تعاملك كده، عرفتي بقى إنك فعلاً ماتستحقيش غير المعاملة دي». أصل عقلنا بيمجد أهالينا؛ أبونا وأمنا، ما هو مستحيل ماما تكون فيها حاجة غلط، أكيد الغط فيا أنا.

خلينا نقول مثلاً إن فيه راجل اسمه عمرو، عمرو ده من وهو طفل بيشوف مامته في علاقة مؤذية مع أبوه؛ بتتهان وبتتشتم وبتتألم كل يوم، عمرو كطفل متضايق علشانها ومجروح لوجعها، فيقوم لما يبجي يدور على شريكة يرتبط بها أو حتى من غير ما يدور طول ما هو ماشي في طريقه مش هتجذبه غير البنت الضعيفة المغلوبة على أمرها، اللي أهلها بيعاملوها بقسوة، البنت الموجوعة، البنت اللي دخلت علاقات مؤذية كتير قبل ما تعرفه. ليه بقى؟

عشان عقله اللاواعي بيقول له: «أن الأوان بقى يا بطل ترتبط بيها وتنقذها من الأشرار، فرصتك جات لك يا عمرو عشان تعمل اللي ما قدرتش تعمله و إنت صغير مع مامتك، فاكر حزنك وقلة حيلتك لما كنت بتشوفها بتعيط و إنت مش قادر تحميها، أي آية قدامك، أي اعتبرها مامتك و أنقذها من الجحيم اللي هي فيه».

فتلاقيه اتشد لأية وابتدى يحبها حب مش طبيعي، وأكد طبعا قال لها: «عارفة إنتي البنت الوحيدة اللي لما شفتها حسيت إنني أعرفها من زمان». كل ده وهو مش مدرك اللي بيحصل.

تعالى بقى نتخيل إن عمرو ده كان ليه أخت اسمها ياسمين، ياسمين كمان كانت بتشوف مامتها ببتهان وكانت كل مرة تشوف دموعها على خدها وتقولها: «امشي يا ماما، روجي بيت تيتا وجدو، اتطلقى، إنتي ماتستاهليش كده». ويكون رد مامتها: «أنا مستحمة علشانكم». وتكبر ياسمين وتتجاوز وعقلها اللاواعي مخزن كل الماضي مشهد مشهد، وكلمة كلمة، شوية بشوية تلاقي نفس السيناريو اللي حصل في بيتهم وهي صغيرة بيتكرر، وتلاقي نفسها بتقبل الإهانة والشتيمة والضرب كمان وقاعدة وساكتة ومكلمة.

منة: طب ليه؟ مش ياسمين دي من وهي طفلة واعية وعاقلة وسابقة سنها وكانت بتنصح مامتها تمشي؟

رانيا: صح، بس مامتها مامشيتش وعمرها ضاع كله في ألم ووجع فعقل ياسمين اللاواعي لازم يثبت لها إن مامتها كانت صح وإن كل الألم اللي عاشوه ده ماراحش هدر، وإنها أهو لما بقت في مكانها اتصرفت نفس التصرف، طبعا إحنا كلنا شايفين دلوقتي إن جوز ياسمين شبه أبوها بالضبط، ده يمكن كمان هي اختارت الزوج ده عشان عقلها اللاواعي من الأول كان شايفه شبه أبوها، فعازب يثبت لها إن شفتي باباكي ماكانش وحش ولا حاجة بصي كل الرجالة بتضرب أهو.

منة: طب ليه؟ لقد وقعنا في الفخ واللي كان كان، ولا نعمل إيه؟

رانيا: لأ طبعا، مفروض لما تلاقي نفسك عندك علاقة سيئة بحد من أهلك وزعلان منه ومش قادر تسامحه، اوعى تهرب من البيت بالجواز، ماينفعش تختار شريك حياة وإنك عندك مشاكل مع جدورك.


لو إنتي بنت طول الوقت بتقول لنفسها: «عمري ما هتجوز حد زي أبويا/ أو لما أكبر عمري ما هبقى زي ماما».

أو لو إنت ولد بيقول: «أبويا راجل مغلوب على أمره بس غلطته هو عشان اتجوز حد زي أمي/ أو أنا لما أكبر استحالة أعامل ماما زي ما كان بابا بيعاملها».

يبقى لازم قبل ما ترتبط بشريك حياة العمر كله تتعلم تتعامل مع مشاعر الغضب والسخط واللوم اللي جواك لهم.

لازم نطلب مساعدة حد متخصص يساعدنا نتصالح ع الماضي؛ لأن لو ما اتصالحناش عليه، هيبقى المستقبل هو هو الماضي بنفس وجعه وجرحه، وهتلاقي نفسك ماشي طريقك وتقول: «الطريق ده مش غريب عليا».

### اللافتة السابعة عشرة:



من يهرب من أبويه بالزواج  
ينتهي به الأمر  
متزوجاً من أحدهما!



## لافتات تحذيرية



## الطريق مغلق!

– عالية بهزري، يعني إيه الطريق مغلق؟ ده أنا بقالي عُمُر سايقة، هرجع كل اللي مشيته ده ازاي؟ ده حتى البنزين اللي معايا بيخلص.

– على فكرة يا سارة، أنا قلتك من الأول؛ الطريق ده كله مطبات وحُفر، وكان فيه عمال بتشتغل عليه بقالهم فترة طويلة، ولقوا فيه مشاكل معروفش يحلوها فقفلوها، بس إنتي اللي أصريتِ تحاولي.

سارة ماشية طريق مكسر مع راجل نرجسي بقالها سنين، قابلتها منخفضات ومرتفعات كتير واتشالت واتهدت، ولأنها ست متفائلة، الفشل كلمة مش في قاموسها، وعندها أمل إن كل حاجة هتبقى كويسة– ودي أكثر حاجة جذبت النرجسي لها– تخيلت إنها أكيد في يوم هتوصل للي هي فاكراه علاقة صحية، ونسيت إن أي علاقة في الدنيا مسؤولية الطرفين، مش طرف واحد أبدًا، وإنها مهما حاولت لوحدها مفيش أي حاجة ممكن تحصل.

طب يعني إيه راجل نرجسي؟ وهل فيه ستات نرجسية؟ وليه الأشخاص دي مؤذية؟ ومين الستات اللي بتقع في غرام النرجسي؟ طب لو عرفتي إن الشخص اللي إنت معاه دلوقتي نرجسي عملي إيه؟

### مين هو النرجسي؟

تفتكري لو في يوم صحيتي تبصي في المراية عشان تكلمي نفسك كعادتك، وتبصي عليها وتقولي لها إيه القمر ده! وبعد ما لبستي واتشيكتي وبصيتي ملقتيش انعكاس لنفسك، مفيش صورة.

إنتي باصحة ع المراية، وفي المقابل مفيش صورة باصحة عليكي، هي دي بالظبط العلاقة مع النرجسي.

النرجسي هو لا أسمع، لا أرى، ولكني أتكلم، وأتكلم كثيرًا كمان.

النرجسي مش بيسمع غير إطرائك عليه، ومش بيشوف غير مظهرك اللي لازم يبقى مناسب لتوقعاته؛ عشان مظهرك جزء من برستيجه والإيجو بتاعه، لكنه طول الوقت بيتكلم، بيتكلم عن نفسه، إنجازاته وذكرياته، المهم يتكلم، دايماً شايف نفسه أهم من الآخرين.

النرجسي شخص متحكم، متسلط، عاوز كل بني آدم، وكل حاجة تمشي على مزاجه؛ سواء بيعمل ده بشكل واضح وفج أو مقنّع تحت مسمى: «أنا اللي بصرف/ أنا الأكبر/ أنا اللي فاهم».

النرجسي ما بيعرفش يكون رابطة حميمية مع حد، هو موجود لكنه مش حاضر ولا متصل، هو مش بيتواصل مع حد لأنه أصلاً مش متصل بذاته، الشخص النرجسي عنده شعور بعدم أمان رهيب، وصورته عن نفسه وحشة أوي.

النرجسي معندوش أي إحساس بالتعاطف تجاه أي حد، ممكن يحس بالخزي—لأن الخزي بيكون شعور بالحرج قدام العامة على عكس الإحساس بالذنب اللي هو شعور نابع من جوا نفس البني آدم—عشان كده النرجسي ممكن يشتم ويهين ويضرب؛ لو الأمور مامشيتش زي ما هو عايز، ومن غير ما يحس بأي تأنيب ضمير، لكن في نفس الوقت ما يستحملش حد يعرف المصايب اللي هو بيعملها؛ ولا يقبل حد يلومه أو ينتقد سلوكه، بيشوف النقد هجوم شخصي عليه.

الزرجسي دائماً على حق وما ينفعش حد يقوله يمشي إزاي، ما يستحملش يقف في طابور، ولا إن حد يكسر عليه وهو سايق، أو إن الجرسون يتأخر شوية، ولازم أولاده يجيبوا درجات عالية، ولازم في المسابقات يحققوا المراكز الأولى، وإلا يدخل في نوبة من نوبات الغضب، الزرجسي الأب أهم حاجة عنده إنجازات أولاده ومظهرهم، مش مشاعرهم.

### طب أعرف ازاي إني في علاقة مع نرجسي؟

لو الحوار ده بيحصل معاك بشكل متكرر يبقى إنتي في علاقة مع نرجسي:

إنتي: إنت لما قلت كذا قدام مامتك جرحتني أوي.

الرد: امتي ده؟ أنا مقلتش كده. (بينكر اللي قاله).

أو: انتي مجنونة بقي، ملكيش حق طبعاً تزعلي، بلاش حساسية و أفورة. (مشاعرك مش معترف بيها).

أو: لأ بقي ده لو فيه حد مفروض يزعل يبقى هو أنا، انتي أصلاً اللي قلتي كذا وكذا. (يقلب التراييزة وبيتدي هويهاجمك).

كل ده اسمه:

### (Gas Lighting)

وده نوع من أنواع التلاعب؛ الشخص هنا بينكر اللي قاله، مش بيقبل مشاعرك ولا حقك في التعبير عنه، بيحاول يخليكي تشكي في حقيقتك، ويلخبطك.

## مثال:

بتعملو شونج سوا وهو بيوريكي بلوزة صفرا، فأنتي بتقولي:  
«هي حلوة، بس إنت عارف أنا مبحش اللون الأصفر». فيكون رده:  
«مبتحبش الأصفر! ده إنتي دولابك مليون هدوم صفراء». تستغربي:  
«أنا! ده أنا معنديش أي حاجة صفراء أصلاً». ويكون رده: «اسمعي  
الكلام بس، بقولك دولابك كله أصفر، إنتي اللي مسطولة».

طبعاً ده شيء مبرك جداً، وأكد عمرك ما هيجي في بالك إن  
حبيبك وشريكك بيتلاعب بيكي وقاصد يلخبطك.

مع الشخص النرجسي هتلاقي دايماً لخبطة كثير بتحصل، ويقولك  
ما قلتش، ويأكد إن ده محصلش.

## مثال:

— أنا بكرة هروح لماما عشان هي عيانة وهتغدى معاها، هترجع  
تلاقي الأكل جاهز اتغدى إنت بقى.

وإنتي عند مامتك تلاقيه بيتصل بيكي يسأل:

— إنتي هتيجي إمتي؟ أنا جعان؟

— حبيبي ما أنا قلتك إمبراح إني هتغدى مع ماما.

— لأ ماقولتيش، إنتي قلتي بس إنك رايحة عندها، ما جبتيش سيرة  
الغدا خالص.

وتبتدي تحلفي وبيتدي يغضب ويأكد إنك ماقلتيش، عشان  
النرجسي مايبسمعش أصلاً. لو إنتي في علاقة مع أي شخص من أي نوع

---

وابتديتي تقولي لأ، أنا بعد كده هسجل كلامك، مش لأنه بينسى؛ لكن لأنه بينكر اللي قاله، يبقى لازم تشكي إنك في علاقة مع نرجسي.

### تنويه:

مينفعش خطيبك يقولك ماتنزليش من فضلك بالبلوزة القصيرة دي، ف تقومي فاسخة الخطوبة وتقولي عليه نرجسي، الموضوع مش بيتشخص بتصرف، ولا إنتي كشخص غير متخصص من حقك تشخصيه، الموضوع محتاج متخصص يقعد معاكي وبعد ما يفهم نمط معين يقدر يشخص، وبرضه ساعتها هيساعدك إنتي مش الشخص الآخر.

ده غير إن مش كل نرجسي زي الثاني، يعني فيه واحدة جوزها نرجسي وقادرة تتعايش ومعندهاش مشكلة، وفيه واحدة تانية بتفقد عقلها وصحتها النفسية كل يوم معاه.

طب هو إيه اللي بيخلي ست تستحمل كل ده؟ إيه اللي يقعدا في علاقة مجهددة كده؟

اللي بيقعدا إن النرجسي العلاقة معاه مش كده طول الوقت طبعًا؛ ده فيه أيام بتبقى جميلة ورايقة، ويطلعك السما السابعة؛ يجيب هدايا ويبوسك قدام الناس، وتحسي الحياة وردية وتقولي لنفسك: «الراجل يستاهل أصبر علشانه، والحياة ماشية أهي، أنا كل اللي محتاجاه أنسى اللي فات، وأديله حنان أكثر؛ ده زي الطفل بيتعصب ويضرب وبعدين يهدى ويبوسني». وأكد لو حبيته أكثر الدنيا هتبقى أحسن.

بس هما كام يوم ويحصل إن ابنك يوقع العصير في المطعم أو تلاقي حد من الجيران اشترى بيت أكبر أو حد من أصدقائه إترقى في الشغل فيرجع تاني يغضب ويكسر وهين -ومن غير ما يبين إن ده السبب- أو يخاصم ويهجر ويعاقب بالبعد.

## طب هو أنا إيه الضرر اللي ممكن يقع عليا من علاقتي بنرجسي؟

### عقلك!

لما بتعيشي مع النرجسي كام يوم كويسين فعقلك -اللي زي الكمبيوتر- بيبدأ يتأقلم على الوضع المريح، وبعدين تيجي نوبات الغضب فتحصل صدمة تخليه ياخذ وضع دفاعي، شوية ويرجع يسترخي تاني لما الدنيا تهدى وهكذا، أصل العقل دايماً بيعرف يتكيف، لكن مين بقى اللي ما بيكدبش أبداً؟

### جسمك!

جسمك ما بيعرفش يكذب، هتلاقي نفسك ابتدى يجيلك أعراض ملهاش تفسير: أرق/ صداع نصفي/ تشنجات في عضلات الرقبة والكتفين، كدمات من غير ما تكوني اتخبطتي/ أمراض مناعية.

### روحك!

هتلاقي نفسك على طول قلقانة ومتوترة مش عارفة عايزة إيه، ولا رايحة فين، تايهة وضايعة.

طب هو فيه ستات نرجسية، ولا ده مقتصر على الرجالة بس؟

---

طبعًا فيه ستات نرجسية بس نسبة الرجالة النرجسيين أكثر،  
تقريبًا الضعف.

طب هل فيه ست معينة الراجل النرجسي بينجذب لها ويصطادها؟  
طبعًا طبعًا، الست المغناطيس للنرجسي يبقى عندها بعض أو  
معظم الصفات دي:

◆ ست متعاطفة بتحب تقوم بدور المنقذ في حياة اللي حوالها،  
وبيدخل لها هو من دخلة إنه ضحية، وعاش ماضي صعب، أو مش  
واخد حقه في الحياة أو الدنيا طول عمرها قاسية عليه، وده طبعًا  
بيستفز حته التعاطف اللي جواها.

◆ ست متفائلة؛ عشان كده دايمًا متوقعة إنها هتقدر بقوة الحب  
تشفيه، وإنه بكرة يتغير علشانها، والجاي أحلى.

◆ ست متسامحة؛ معطاة مش بتدي فرصة ثانية وتالتة، لأ دي  
بتدي مئات الفرص، قلبها كبير ومتخيلة إن كل ما تسامحه أكثر؛ كل ما  
فرصتها إنه يحبها ويتغير علشانها تزيد أكثر.

◆ ست عندها موهبة الإطراء وده اللي بيخلي النرجسي يمسك فيها  
بأيديه واسنانه أصل مين ممكن يغذي الإيجو بتاعه أحسن منها.

**طب هل النرجسي ممكن يخف لو اتعالج؟**

السؤال مايقاش كده، السؤال يبقى: هل النرجسي عايز يخف؟

والإجابة للأسف: طبعًا لأ، ليه؟

عشان النرجسي معندوش أي مشكلة في كونه نرجسي، هو مش شايف نفسه أصلاً فيه حاجة غلط، هو مرتاح كده، لكن لو عايش في بلد بيجرم ضرب الزوجات فابتدى يتعرض لضغط من قانون الدولة، أو هيلاقى نفسه هيفقد وظيفته، أو هيفقد شريكه - اللي هي في نظره جزء من ممتلكاته ما ينفعش تروح منه - ساعتها ممكن يروح لمعالج نفسي، عشان يوري اللي حوالية إنه بيتعالج أهو، يبروح للمعالج يتلاعب بيه هو كمان.

### إيه ده يعني مفيش أمل؟

يؤسفني أقولك أكيد فيه أمل، لكن إلى الآن، ومنذ بدء الخلق ولحد اللحظة اللي إنتي بتقري فيها الكتاب دلوقتي مفيش حالة نرجسي واحدة خفت وبقت شخص طبيعي، ممكن لو ابتدى يحس إن فيه مشكلة من وهو صغير، وقرر يزور متخصص؛ ساعتها المتخصص هيساعده يتحكم في غضبه، هيعلمه ازاي يتواصل. ده لو عاز ولو راح، لو.

### طب لو أنا في علاقة مع نرجسي راجل أوست أعمل إيه؟

☞ لو العلاقة ينفع تنهيهما - حبيبك / صاحبتك / خطيبك - يبقى إنفدي بجلدك فوراً؛ لأن طريقك مسدود مسدود يا ولدي.

☞ ولو النرجسي ده زوجك - وإنتي مقررة تكلمي - أو أمك أو ابنك هتعملي الآتي:

◆ بطلي تغيري من نفسك علشانه: هتفرج ع الأفلام اللي بيعجبها/  
هصبغ شعري اللون اللي بيعجبه/ همشي الطريق اللي هو عايزني  
أمشي/ هجبه أكثر/ هسامحه أكثر. احنا اتفقنا بقى كل محاولاتك مش  
هتغير حاجة من الواقع.

◆ اكبحي جماح توقعاتك أرجوكي، أو بمعنى أصح ماتتوقعيش  
منه أي حاجة؛ لا اهتمام ولا تواصل ولا هدايا ولا أي حاجة، عشان  
التوقعات غير المنطقية بتنتهي بإحباط متكرر والإحباطات بتعمل  
اكتئاب.

◆ لما تحبي تتكلي معاه اتكلي في أمور عامة: حالة الطقس/ تاريخ  
الدولة الرومانية/ موسيقى بهوفن/ علم اللوغاريتمات. أي حاجة غير  
مشاعرك وخططك وصحابك.

◆ املي خزان طاقتك بعلاقاتك بصحابك وأهلك وولادك وشغلك  
وهواياتك، ولو إنتي كنتي بتحطي 95% من طاقتك في تصليح العلاقة  
بينكو و5% لحياتك الباقية، فمن فضلك اعكسي النسبة.

◆ لو عندك فرصة تروحي لمعالج نفسي اوعي تترددي، إنتي محتاجة  
دعم وإرشاد، محتاجة حد يساعدك تهتمي بنفسك وتقللي الضرر الواقع  
عليكي.

### طب لو قررت أمشي من العلاقة أعمل إيه؟

لو قررتي تمشي ف إنتي محتاجة تشوفي متخصص يساعدك؛ لأن  
الخروج من العلاقة مع نرجسي أمر مش سهل أبداً، ولازم تبقى متوقعة  
دراما كتير، أصله ييفقد جزء من ممتلكاته؛ اللي هو إنتي فالحرب هتكون  
قبيحة لأبعد حد؛ لأن النرجسي ما بيقبلش الخسارة.

## احذر! منحدر خطر!

بستغرب أوي من جملة بيتداولها ناس كتير مغزاها: «إن إحنا كبني آدمين بنحب اللي يدينا فوق دماغنا».

وعشان كده البنات دايمًا تحب الرجل اللعوب (Playboy)، أو الراجل اللي بيلعب بيها وبمشاعرها، والرجل دايمًا يجري ورا الست اللي بتصدده ويبقى هيتجنن على اللي حاطاه في خانة الصداقة أو الفريندزون.

والحقيقة دي فكرة ظالمة وكأن المولى خلقنا مشوهين، معوجين، غاويين اللي يمتن كرامتنا.

بس الحقيقة مش كده، مخ الإنسان أعقد وأذكي من أنه يكون كل هدفه يبهدل فيه ويشحطه معاه.

لكن اللي بيحصل إن العقل دايمًا بيحب التحدي (Challenge) وتعجبه الحاجات الصعبة؛ لأنها بتستفز فيه رغبته في الفوز بيها، فيحس ساعتها إنه جامد ومتميز، ووصل للي محدش قدر يوصله.

زي إنك تبقى عارف إنك داخل على طريق منحدر بس عاجباك فكرة المغامرة، ومتخيل إنك هتعرف تسيطر على عربيتك في الوقت اللي تحس فيه بالخطر، ومتحمس جدًّا لفكرة إنك في طريقك لهدفك اللي في أسفل المنحدر، هتتفجر جواك طاقات ممكن مايكونش عندك فكرة إنها موجودة أصلاً، وده لوحده لذة تانية تزود متعة الرحلة للوصول للطرف اللي قد يكون أصلاً مش مناسب لينا.

عشان كده الرجل اللي بيلاقي ست صعبة عليه وقوية ودايمًا تصده، عقله بيترجم ده أنه لو قدر يخلها تنجذب ليه فهو كده أحسن من كل اللي سبقوه في الطريق ليها، وأنه هو وحده اللي فاز بها، فشعوره برجولته ونظرته لنفسه وقتها بتبقى عظيمة جدًا، وطبعًا مش أي راجل، لكن بالأخص الراجل اللي ثقته بنفسه قليلة.

زي بالظبط شعورك تجاه الكرسي البلاستيك اللي شاربه بـ50 جنيه من على أول شارعكم وراميه ف البلكونة، عمره ما يضاهاي إحساسك ب كرسي صبرت وحوشت وتعبت ولفيت بلاد الله لحد ما اشتريته، التاني هتحافظ عليه، وهتبقى فخور بنفسك إنك قدرت تجيبه في بيتك وهتلاقي نفسك في العادة حاطه في مكان مميز، مش عشان هو مريح أكثر، لكن عشان التحدي كان أكبر.

ومن أشهر العلاقات اللي فيها تحدي وصعوبة لكن في نفس الوقت مؤذية، واللي دائمًا وأبدًا بتنتهي نهاية أليمة وكارثية هي علاقة البنت بالرجل النسوانجي، والراجل النسوانجي يندرج تحت مسمى النرجسي.

وتعريف الرجل النسوانجي ده؛ هو راجل نرجسي برضو لكن كل هدفه علاقة جسدية بس، الراجل اللي ممكن يعرف أكثر من بنت في نفس الوقت وكلهم لنفس الغرض، مش الراجل اللي بيحب يتفرج ع البنات في الشارع، ولا اللي مصاحب بنات كتير ولا اللي مقضيهما رسايل على تليفونه.

## طب مين البنات اللي ممكن تنجذب للرجل ده؟

• البنت اللي عندها مشكلة في صورتها عن نفسها بيعجبها الرجل متعدد العلاقات ده عشان بتسيطر على عقلها فكرة إنها لو هي اللي

فازت بيه، فده معناه إنها تفوقت على كل اللي عرفهم قبلها، وأن هي بقى المتفردة، وده بيزود شعورها بالاستحقاق (Self Worthiness) وهي اللي عاشت عمرها كله بفكرة: «أنا ما استاهلش، أنا ما أستحقش»، فلما اللي مقطع السمكة وديلها ده واللي كل البنات بتجري وراه -زي ما هو طبعًا مفهمها- يبص لها ويهتم بيها ف ده معناه إنها حلوة وجذابة ودخلت المنافسة؛ الرجل متعدد العلاقات ده بيبان جذاب جدًّا وعنده كاريزما ومهتم بنفسه وبيظهر إيجو عالي لكنه مزيف، بيحاول دايمًا يوصل للبنات فكرة إنه رغم كل اللي بيعمله لكنه عنده نزعة دينية، وتلاقي دايمًا منشوراته على صفحته فيها كلام عن عفو الخالق ورحمته، وده تكتيك عظيم، هو طبعًا لا متدين ولا بتاع، هو بيحاول يحزن قلبك، بيوصل لك معلومة إن فيه منه أمل، وإنك ممكن تكوني إنتي السبب في هدايته، ويتوب على إيدك، لكن في الحقيقة الرجل ده معندوش ضمير، معندوش ضمير بجد، وده كلام علمي، يعني مايبحسش بالذنب ولا تأنيب الضمير أنه بيعرف أكثر من بنت في نفس الوقت ولا إن هدفه جسدي بحت.

• البنت اللي بتنجذب للنوعية دي من الرجالة بيقو بنات اتربوا بطريقة فيها كبت وقيود كثير، وهي متخيلة إن هو اللي هيحررها من قيود المجتمع، ومعاه هتجرب كل اللي كان نفسها تعمله، وتعيش المغامرة، لكن أمنياتها دي متطرفة، وهي فاكدة إن المغامرة هتبسطها، وده مش حقيقي، لأن الانتقال من النقيض للنقيض مجهود ومؤذي.

• الستات اللي في علاقات زوجية غير مرضية ليهن والمطلقات - الله يحفظهن وينير بصيرتهن - اللي بتبقى عايشة حرمان عاطفي ونفسها تحس إنها حلوة ومرغوب فيها بتقع فريسة للرجل ده، اللي مابتبقاش

متخيلة إنه بس هياخد منها اللي هو عايزه ويديها ظهره وتعيش هي محترقة نفسها العمر كله.

• البنت الناجحة المنورة اللي عندها كارير بس خجولة وبتتكسف من نفسها، البنت دي هي اللي بتجذب النسوانجي، لأن النسوانجي ده راجل صورته عن نفسه قبيحة جداً، وكل ما كانت البنت الفريسة اللي يقدر يضمها لحريمه - ما هو البيه فاكر نفسه شهريار - جميلة ومشعة كل ما بتساعده يملأ الثقب الأسود بتاع عدم الأمان اللي جواه.

المشكلة إن النسوانجي بتاع زمان؛ بتاع مراتي أصلها مش بتديني حقوقي أو ريحتها وحشة والكلام بتاع الأفلام ده - لو هو متجوز يعني - بقى نادر الوجود، النسوانجي اتطور أوي وبقى من الأول خالص بيقول إنه مدمن أفلام إباحية، وإنه عنده علاقات جسدية بستات كثير، وإنه حاسس إنك هتكوني الأخيرة، وإنه خايف عليكي من نفسه، وإنك مش هتقدري على متطلباته، وده برضو تكتيك عظيم بيستفز بيه تعاطفك، أرجوكي اوعي تصدقيه، وإوعي تقربي من المنحدر أصلاً، هتقعي هتقعي.

وماتقوليش أنا قوية وفضل من بعيد لبعيد، وهساعده من غير ما أديله حاجة، فوق، إنتي مش دكتور، هو محتاج دكتور وخليني أصدملك وأقولك هو مش عايز يتعالج، ومش هيشوف دكتور ومش هيتغير.

امشي حالاً وفوراً، لفي وارجعي تاني، واوعي تقربي من أي منحدر، صدقيني هيبجي وقت وفراملك هتفلت منك وهيكون السقوط مربع، وعربيتك هتتشفش مليون حنة وقلبك كمان.

## أعمال حفروتكسير!

– أنا بحب صافي بس هي كل يوم بحالة، وساعات ف نفس اليوم مليون حالة، نفس اليوم إيه! ده في نفس الساعة مودها بيتغير مليون مرة؛ بتضحك وتعيط وتزعق، حاسس إن فيه حاجة غلط ف العلاقة أو فيها أو فيا، ما هو أكيد مش طبيعي أحس إنني خايف طول الوقت أقول كلمة أو أتصرف تصرف يغير موودها، وكأني ماشي على قشر بيض.

– طريقك كله حفروتكسيريا وليد، إنت قايل لي إن صافي بتشوف دكتور، وإنها قايلالك إنها متشخصة اضطراب الشخصية الحدية، فطبيعي تحس أنك ماشي على إزازمكسر.

– طب أنا مش فاهم إيه اضطراب الشخصية الحدية ده؟

– بص، الست المصابة بالاضطراب ده:

☞ عندها دايمًا إحساس بالخوف إنها تتساب، رعب من فكرة الهجر، سواء كان الهجر ده حقيقي أو من وجهة نظرها هي بس. الخوف ده بيخليها عايزة دايمًا تأكيد إن العلاقة لسه قائمة.

☞ لو فيه أي موقف استقبلته على أنه هجر بتلاقمها فجأة تحولت، ويبقى رد فعلها غير متوقع وعنيف تكسير وعياط وصرخ، وتقطع شرايين بجد.

☞ الشخصية الحدية عندها مشكلة في هويتها، صورتها عن نفسها بتتغير كل شوية ساعات تشوف نفسها حد ناجح جدًا وساعات شخص ملوش قيمة، ساعات كتير معظمهم يقول أنا مش عارف أنا مين، وكتير أوي منهم ساعات يغير اسمه أو شكله أو شغله.

﴿ الشخصيات الحديدية مشاعرهم قوية جدًا ومتغيرة جدًا وما يعرفون سيطروا عليها، موودهم بيتغير كثير أوي في وقت قصير جدًا، ومن غير أسباب، إنت نايم في حضنها عادي تصحى الصبح تلاقيها قلبت عليك، ردود أفعالهم دايمًا مبالغ فيها، وبعدين يتضايقوا من نفسهم على رد الفعل ده.

﴿ الشخصيات الحديدية يا يخبوك وتبقى ملاك في عيونهم وشخص كامل مفهوش غلطة يا يكرهوك ويشوفوك شيطان، كل حاجة في الحياة يا أبيض يا أسود، مفيش عندهم رمادي، علاقاتهم مع اللي حوالهم مضطربة.

﴿ عندهم احتياج ملح إنهم يحبوا ويتحبوا وعلاقاتهم العاطفية بتبدأ قوية وتتطور بسرعة، لكن كمان عندهم إحساس قوي إنهم فاضيين من جوا، كأن فيه ثقب جوا روحهم، وعندهم دايمًا محاولات يملو الثقب ده سواء بالشراء، بالأكل، بالصرف.

﴿ ساعات بيتصرفوا تصرفات متطرفة غير محسوبة؛ علاقات متعددة، يسوقوا بتهور، يعانوا من إدمان، يؤذوا نفسهم، ممكن تبقى فيه محاولات انتحار؛ هما في الحقيقة مش عايزين يموتوا لكن مابيقدرش يستحملوا الألم، بس حتى محاولاتهم دي لازم اللي حوالهم ياخدوها بكل جدية.

وعلى فكرة مايبجيش للستات بس، ممكن يبجي للرجال كمان لكن بنسب أقل بكثير.

طب ازاي أتعامل معاها؟ أنا تعبت.

لو ناوي تكمل لازم تبقى عارف إن العلاقة هتبقى صعبة جدًّا، أنت ماشي طريق كله إزاز مكسور، ولازم تبقى عارفة إنها محتاجة متابعة مع متخصص، وإن إنت كمان هتحتاج حد يرشدك إزاي تتعامل معاها.

### لكن دي شوية مفاتيح تساعدك:

☞ أفضل حاجة ممكن تعملها إنك تسمع، تسمعها في أوقاتها العادية وتسمعها أكثر وقت انفعالها، تقبل مشاعرها، وتتعاطف معاها، واتفقنا قبل كده إن تقبلها غير توافق عليها، تسألها وقتها بشكل مباشر وصرح هل فيه حاجة حصلت خلتك تتوتري؟

☞ وخليك صبور وما تأخذش كلامها بمحمل شخصي، فكر نفسك دايماً إنها بالأصل اتعرضت قبل كده لرفض وهجر مؤلمين، ماتلومش نفسك وما تدافعش عن نواياك، اسمعها من غير ما تحكم عليها وحاول تحتويها، تقولها إنك معاها دايماً وعمرك ما هتسيبها.

☞ لكن كمان مهم إنك ماتحكّمش على كل مشاعرها وتصرفاتها من منظور إنها شخصية حدية، فعشان كده بتعمل كذا، افهمها وتعامل معاها كإنسان عادي مش حد عنده خلل.

☞ لكن الأهم من كل ده إن يبقى عندك مساحة شخصية لنفسك؛ صحاب بتخرج معاها/ أهل بيدعموك/ رياضة تلعبها/ شغف تمارسه لوحدهك عشان تما لا خزان وقودك وتبقى قادر تحافظ على صحتك النفسية، طبعاً لما تيجي تعمل كده هتلاقها في الأول بتتوتر وبتتخانق وبتخاف وبتقاوم بس شوية بشوية هتتعود، مع الشخصيات دي لازم تحمي حدودك النفسية ومساحتك الشخصية.

مهم أوي تعرف إن الشخصية دي على أد ما أكيد هتبقى فيه أوقات صعبة ومجهدة هتعيشها معاها، لكن أحب أطمئنك إن معظم اللي ارتبطو بناس عندهم الاضطراب ده كانوا بيقولوا إنهم في أوقاتهم الطبيعية أشخاص مرحة وطيبة وبتعرف تستمتع بحياتها.

– طيب هما ممكن يخفوا؟

– بص يا وليد، الأمراض النفسية أو العقلية غير الأمراض الجسدية؛ كلمة تخف هنا لها معاني كتير أوي غير التعافي الكامل؛ تخف ممكن يبقى معناها إنها بقت تتحكم أكثر في نوبات غضبها، وإن رد فعلها بقى أقل عنفًا، أو إن نوبات غضبها بتحصل على فترات متباعدة أكثر، أو أنها تبطل تهددك أو تبطل تؤذي نفسها بجد.

## طريق موت!

– سامح، هو يعني إيه طريق موت دي؟ لسه شايفة حد من صحابي مصور فيديو لطريق في بوليفيا وناشره على صفحته على الفيس بوك وكاتب طريق الموت.

– بصي يا دكتور، طريق الموت في بوليفيا ده؛ طريق جبلي ضيق جدًا، كله منحدرات وصخور متكسرة، الرؤية عليه صعبة جدًا بسبب الضباب والأمطار، طريق مرعب بجد وفعلاً، من أخطر طرق العالم، لكن طريق موت هنا في بلدنا يعني طريق حصلت عليه حوادث كتير؛ معظمها انتهى بالموت، فالناس أطلقت عليه الاسم ده.

– فهمتك، ده زي السيكوباتي كده عندنا في الطب النفسي.

– هوالسيكوباتى ده غير النرجسي؟ أنا معرفش غير النرجسي الحقيقة.

– بص يا سامح، كل سيكوباتى هو فى الأصل نرجسي، لكن مش كل نرجسي هو سيكوباتى.

– لأ، بالراحة كده وفهميني.

– بص، النرجسي ممكن يحس بالخزي، بيهمه شكله قدام الناس بيبقى عاوز كل حاجة تمشي على مزاجه وتخضع لسيطرته آه، لكن يا ريت محدش يتأذى، لكن السيكوباتى هو نرجسي بس زود عليه بقى إن مفيش تعاطف، مفيش خزي، ومفيش خوف لا حد يتأذى، والسيكوباتى ده يندرج تحت قائمة اضطراب شخصية اسمه اضطراب الشخصية المعادية للمجتمع؛ هو وشخصية تانية اسمها المعتل.

– يعني السيكوباتى والمعتل دول شخصيات معادية للمجتمع، آه فهمتك، إنتي تقصدي بالسيكوباتى ده القتل المتسلسلين (Serial Killers) الأشرار اللي بيطلعوا فى الأفلام دول اللي معندهممش أخلاق ولا ضمير، وبيقتلوا الناس بدم بارد، مش الناس العادية العايشة وسطينا، ده أنا عندي زميل فى الشغل، طول الوقت بيتريق ع المدير بتاعنا ويقول عليه سيكوباتى.

– لأ طبعًا، مش بس الأشرار اللي بيطلعوا فى الأفلام، ده فيه ناس كتير منهم عايشين وسطينا عادي جدًا، اللي منهم أستاذ جامعة، واللي ممثل شهير، واللي دبلوماسي، بس مفيش اتنين عندهم نفس الاضطراب ده شبه بعض، فيه اختلافات كتير جدًا بينهم؛ اضطراب

الشخصية المعادية للمجتمع ده أصلاً مرض عقلي، والسيكوباتي ده بيتولد كده، ولو أخذنا صور للمخ بتاعه هتلاقيه مش زي بقية الناس العادية، والموضوع ببداً عند سن المراهقة تقريباً، عمرك شفت قبل كده طفل ماسك قطة بيحرقها أو بيدبحها بسكينة وهو بيضحك وبيتصور معاها؟

أهو ده هيكبر يبقى سيكوباتي أد الدنيا؛ عنده مشكلة في جهازه العصبي الذاتي - اللي بيخلي شخص عادي زيك يتوتر لو لقي عربية شرطة جاية وراه أو لو كسرت إشارة مثلاً فتلاقي ضربات قلبك سريعة وبتعرق وتتخض وتبص، تشوف فيه حد باصص عليك ولا لأ- عشان كده السيكوباتيين معندهمش أي إحساس لا بالخوف، ولا بالتوتر، وعشان كده بيسرقوا ويختلسوا ويقتلوا، ولو اتخطوا على جهاز كشف كذب مايتعرفوش، والسيكوباتي مايفضلش في شغلانة واحدة أبداً؛ لأنه غالباً بيتكشف، وده غير المعتل بيكون نشأ في بيئة بتعلمه يتجاوز القانون، من أب وأم علموه البلطجة والسرقة، بيسرق برضو ويعمل أعمال غير أخلاقية بس عنده ضمير بس ضعيف شويتين تلاتة.

## لكن الاتنين السيكوباتي والمعتل:

☞ ما عندهمش تعاطف.

☞ بيتلاعبوا بالناس ويستخدموهم لتحقيق أهدافهم.

☞ أذكاء وجذابين ومعظمهم مجتهد دراسياً جداً وعندهم حيل كثير.

☞ معندهمش مشاعر حقيقية لكن بيعرفوا يقلدوا المشاعر.

☞ متغيريين ومتلونيين حسب هما قاعدين مع مين.

☞ لازم يكسبوا في أي تحدي حتى لو بيلعبوا شطرنج ع القهوة.

☞ دائماً صح وما بيعتذروش.

– طب ودول نعرفهم ازاي؟

– بنعرفهم زي ما بنعرف النرجسي؛ صدق دائماً الصوت اللي جوا اللي بيقولك فيه حاجة غلط، الشخص الجذاب الذي الساحر اللي بيطلعك سابع سما وبعدين لو عملت حاجة مش على مزاجه يهدك للقاع، ده تقلق منه.

– طب لو إتأكدت فعلاً إن الشخص اللي قدامي سيكوباتي أتعامل معاه ازاي؟

– ماتعاملش، اجري بكل قوتك، اجري... لكن لو اكتشفت ده متأخر بعد ما بقى السيكوباتي شريكك يبقى:

☞ انفصل عنه روحياً وعاطفياً ومادياً وخلي بالك كل ما تحاول تبعد كل ما هيحاول يتلاعب بيك أكثر.

☞ وللازم تطلب مساعدة من طبيب نفسي أو إرشاد سلوكي؛ لأن غالباً المقربين اللي حواليك صعب يتخلوا إن الشخص الوسيم اللطيف الجذاب ده مش طبيعي.

☞ خليك قوي، ما تخافش، وما تستجيبش لأي محاولة منه إنه يجرك لجدال أو لدراما أو خناقة، بلاش تصدر أي رد فعل.

☞ أوارقك خلي بالك منها، والوثائق؛ خلي دائماً فيه وثائق وأدلة مادية على كل حاجة بتحصل، هتحتاجها بعدين.


﴿ وسامح نفسك على اختيارك، أهم حاجة إنك تسامح نفسك،  
إنت ماكنتش تعرف، وحتى أعتى المعالجين بيتخدعوا في السيكوباتي.

مش الهدف من الكلام المكتوب هنا إنك بعد ما تقراه تفتكر  
نفسك حد مؤهل تشخص نفسك أو غيرك، فتمشي تشاور على الناس  
في الشارع وتقول: «آه ده كده نرجسي، وإنتي كده حدية». لكن الهدف  
نشر الوعي، يعني لو حاسس إن فيه حاجة غلط في علاقتك أو في  
شخصك أو إن فيه نمط من السلوك المتكرر اللي إنت مش قادر تفهم  
سببه بيحصل معاك مخلي الحياة صعبة، وبدل ما تفضل قاعد تلوم  
نفسك، وبتعدي في الأيام وخلص وإننت بتتعذب، ومش فاهم هو فيه  
إيه! فالكلام هنا دوره يساعدك تدرك إن ده مش العادي، وإنك محتاج  
مساعدة طبيب أو متخصص.

### اللافتة الثامنة عشرة:

إذا وجدت نفسك مضطرا على الدوام  
أن تتحسس كلماتك وأن تبرر أفعالك؛  
فاعلم أنك مع الشخص الخطأ!

## تايه، اقفل الكاسيت



عمرك كنت سابق في طريق وتهت، ولقيت نفسك أول حاجة بتعملها، إنك تهدي صوت الكاست، أو تقفله خالص؟ طب عمرك سألت نفسك ليه بنعمل كده؟

إيه العلاقة بين الكاسيت اللي جوا العربية بالطريق؟ العلم بيقول إنك لما بيبقى عندك هدف بصري -بتدور على منزل كوبري، أو رقم عمارة- يعني محتاج تركب بحاسة البصر أوي، ساعتها استجابتك للمؤثرات السمعية بتقل، فيقوم عقلك يعمل إيه؟

يحاول يوطي هو حاسة السمع عندك: «يعني يقلل استجابتك للمؤثرات الصوتية» عشان ميحصلش تشويش على اللي إنت محتاج تشوفه، لكن لو اللي عقلك عمله ده طلع مش كفاية يساعدك تركب مع الطريق، فساعتها بتضطر إنت تهدي الكاسيت بإيدك.

كام مرة كنتي حاسة إنك مجروحة من حبيب وقررتي تبعدي وإنتي مقتنعة إن ده القرار الصح، فبتفتحي الكاست لقيتي الغنوة اللي شغالة شبه دي:

بمسح دموعي وبنسى ليه قللت مني  
وبقول ما فيش في الحب عيب  
بقليلي برضى  
وأستنى منك كلمة حلوة تقولها ليا  
بسمعها بهدى  
وأنسى إني عشت معك أقل من العادية  
وأصبر عليك  
من حيي فيك

هتجس امتي  
 إني مافيش في إيديا حاجة غير إني أحبك  
 وإن كنت ساكتة  
 فعشان ماتحرمينش في يوم من العيشة جنبك  
 ومأقدرش أعيش غير بين إيديك.

فتقومي مطلعة الموبايل تتصلي بالمدعو الحبيب تصالحيه أو  
 تبعتي ليه رسالة اعتذار، وإنتي أصلاً مش غلطانة، أصل: «مافيش في  
 ايديا حاجة غير إني أحبك وماتحرمينش م العيشة جنبك». ما هي  
 المطربة قالت كده لحبييها، وانتي بعد ما تقمصتي دورها، وحسيتي  
 بوجعها، قررتي تنهيه بس ف حدوتك إنتي.

كام مرة كنت في علاقة مع واحدة مبهلاك، ومش مبسوط وحاسس  
 بإهانة ولخبطة، فتلاقي سواق الميكروباص مشغل غنوة شبه أغنية  
 أستاذ صابر الرباعي:

خلص تارك، طفي نارك  
 من اللي شوفته قبل مني  
 من اللي شوفته قبل مني  
 سيب لي جرح ونار في قلبي  
 خالص تارك، طفي نارك  
 مش حقول إنك ظالمني  
 مش حقول إنك ظالمني  
 حتى لو ضيعت عمري

فتلاقي نفسك لغيت كل القرارات اللي عقلك كان واخدها، وحطيت  
 على جنب كل مشاعرك وكرامتك وصحتك النفسية وقررت تكمل في

العلاقة، ده النجوم مستحملين؛ يعني أنا هطلع أشجع من الأستاذ صابر ولا أستاذ محيي:

عذبني اتعبني غلبني بس ارجع  
اظلمني احرمني ائلمني بس ارجع  
دلوقتي شوف حالي اللي غيرته ف بعاذك  
وأنا حرصى بقساوتك لو تجرح  
أأأأأأأأأأه بس ارجع.

الطفل اللي دايمًا يتقال له ياتخين بيفضل دايمًا تخين، وإنك لما تفضل تسمع أو تقول على نفسك إنك فاشل وعمرك ما بتتختار صح، ودايمًا بتاخذ على دماغك هتفضل تاخذ القرارات الغلط وهتفضل تاخذ على دماغك، الشخص اللي دايمًا يقول على نفسه فقير، وعمره ما هيبقى معاه أو عنده بيفضل فعلاً فقير.

كل معلومة بنستقبلها سواء من نفسنا أو من الآخرين بتتخزن في عقلنا، ومع تكرارها بتتحول إلى يقين بنصدقه وبتتصرف على أساسه، الست اللي بتفضل تقول لجوزها إنت مابتحبنيش/ إنت عمرك ما حبتني/ إنت بطلت تحبني، بعد شوية بيصدق فعلاً كلامها وبيبتدي يتصرف معاه على إنه مابيحهاش.

الراجل اللي بيفضل يقول لمراته أكلك وحش، مابتعرفيش تطبخي، أكلها بعد شوية - حتى لو ماكنش وحش - هيبقى وحش.

الرسائل اللي بنستقبلها عن شكل العلاقة بين الرجل والست، ومفهوم الحب، والغيرة والتسامح من الأغاني والأفلام، بعد شوية بتبقى

هي أفكارنا ومعتقداتنا، وبعد كده تترجم المعتقدات دي لتصرفات وسلوك.

عشان كده فيه فرق كبير بين جيل كان بيسمع عبد الوهاب وأم كلثوم؛ الست العظيمة اللي لما نزار قباني قدملها: «قصيدة اغضب» عشان تغنيها بصوتها، كان ردها عليه أن القصيدة جميلة، لكنها مش هتقدر تغنيها لأن الأغنية تتعارض مع نظرتها للحب وقيمها والتقاليد اللي اتربت عليها...

اغضب كما تشاء  
واجرح أحاسيسي كما تشاء  
حطم أو اني الزهر والمرايا  
هدد بحب امرأة سوايا  
فكل ما تقوله سواء  
وكل ما تفعله سواء  
فأنت الأطفال يا حبيبي  
نحيم مهما لنا أساءوا  
اذهب، إذ أتعبك البقاء  
فالأرض فيها العطر، والنساء  
وعندما تحتاج إلى حناني  
فعد إلى قلبي متى تشاء

أم كلثوم قالتله: «أنا ما أقدرش أسمح لنفسي أقول لراجل امشي، واعرف ستات، وارجع وأنا قاعدة مستنياك عشان أسامحك».

أم كلثوم كانت عارفة إن تكرار سماع الكلمات دي بيأثر على فكر وقناعات جيل بحاله، عشان كده متستغريش لما تلاقي واحدة سايبة

---

حبيبا ينقي لها صاحباتها، ولبسها، والكتب اللي تقرأها؛ ما هي أصلها  
اتعودت تسمع:

مبقولش لأعلى حاجة بيعوزها  
وبقيت بشوف كل اللي بيشفه  
والتعليمات بالحرف أنفذها  
ما هو خلاص سيطر على حياتي  
ومفيش ولاد غيره بكلمهم  
لأوكمان بينقي صاحباتي  
طب أعمل إيه؟ مش عاجبه معظمهم

زمان لما عبد الغني السيد كان بيلوم حبيبته على الغياب كان  
بيقول لها:

ع الحلوة والمرة مش كنا متعاهدين  
ليه تنسي بالمرة عشره بقالها سنين  
ع الحلوة والمرة  
نسيت خلاص عهدنا ونسيت ليالينا  
ونسيت كمان ودنا ونسيت أمانينا  
كان أملي فيك غير كدة ليه تنسى ماضيينا

الراجل يفكر حبيبته بالعشرة اللي بينهم؛ بالود وبالأماني بيقول  
لها إنه متوسم فيها الخير: «كان أملي فيك غير كده» لغة راقية وأسلوب  
متحضر، درس عن فن العتاب ولينه، من غير ما يذل نفسه ولا يهين  
كرامته.

لكن لما تسمع أغنية زي دي مثلاً مرارًا وتكرارًا:  
 أشوف فيك يوم وألاقيك تعبان بجرحك  
 وبتشكي عشان أسامحك  
 تشكي لي وأنا أفضل أضحك و أفرح من قلبي فيك

متخيل قيمة التسامح عندك بقت فين؟ عرفت ليه فكرة التشفي  
 بقت مقبولة وعادية ومريحة في مجتمعنا؟

لما تسمع مطربك المفضل، اللي حواليه آلاف المعجبين  
 والمتابعين، واللي صورته بتتصدر كل المجالات، وأخباره مغرقة السوشيال  
 ميديا بيقول:

أنا اللي أقول عملي إيه  
 أنا اللي أقوله تمشي عليه  
 زي ما زمان كده يا حبيبتي تلبسي إيه وما تلبسيش إيه  
 صدقيني أي واحدة معاها مفتاح قلب حبيبها  
 ها تقدر فجأة تحوله من وحش لطفل ماسك إيدها  
 وخوفي عليك من حي ليكي مش زي ما بتقولي عليا  
 ده يا بخت من بكاني يا بنتي ولا ضحك الناس عليا  
 أه أنا سي السيد

فتلاقي الشاب ساعتها متخيل إنه هيقابل الجميلة اللي هتحوله  
 من وحش لإنسان راق، رقيق وقلبه حنين. وتلاقي البنت متخيلة أن قبلة  
 منها للضفدع هتحوله لأمير، ولو معرفتش فتبقى مسؤوليتها لوحدها،  
 وتفضل تقول لنفسها لو قدمت أكثر، واهتمت أكثر، وحبيت أكثر أكيد

---

الوحش هيبقى ملاك، ما هو المطرب هنا قالها صدقيني فصدقته  
طبعًا.

بس أحب أقولك إن الوحش بيفضل وحش، إلا لو هو قرر يبقى  
ملاك، وأحب أقولك إنه مفيش حد بيغير حد، وإن سي السيد ده راجل  
نرجسي خاين، اخلي منه.

اتعودت وأنا سايقة أسمع موسيقى تساعدني على الاسترخاء  
وتداعي الأفكار، أو الأغاني اللي تمثل قناعاتي؛ الأغاني اللي فيها حب  
سوي مش مريض، الأغاني المبهجة اللي مفهاش شحفة وعايط وحد  
بيتدلل وحد بيشمت.

ولو لقيت غنوة من الأغاني دي في الكاست بقفله:

عشان خاطر كبح حاجات ما حبتهاش..

أصل ليه تحبها عشان خاطره؟ ما تحبها عشان خاطر نفسك

إن إنت أغلى وأولى وكمان أولًا

بجبك سنين في السر وما حدش عرف

(مفيش حد قبل نفسك، وما فيش حد حقيقي شجاع بعيش في السر).

أحبك أكرهك أسيبك أندحك..

أعلق نفسي بيكي ولا أعمل فيكي إيه..

(ده كده اضطراب شخصية حدية مش حب).

ونشانك سهمه خايب يا ملطشة القلوب.. يا جلاب المصايب  
فُتْنَا الغرام ونصبنا العزا  
رجعت تاني ف عهدك ليه  
هي القلوب كيفية أذى!

(ده كده تحقير من شأن قلبه وتوقعه لعلاقات مسيئة جاية كتير:  
«جلاب المصايب»)، بالاضافة إنه بيتنكر من مسؤولية اختياراته،  
أصل قلبه العاشق الولهان هو اللي جايبه لورا.


فيك حتة غرور هكسرهما فيك علشان أحبك  
أيوا عامللي مشكلة بجد مش عارفة أحبك.  
(طب وضاغطة على نفسك ليه؟ ما هو لو عاجبك خديه زي ما هو،  
مش عاجبك سيبه لواحدة غيرك يعجبها غروره ده).

وان جيت أطلبها أنا مقدرش  
ولو إنت عملتها بعد ما أنا أطلبها يبقى مينفعش  
مقدرش أقولك شكل حياتنا اللي أنا عيذاها  
اعرف لوحدك شكل حياتنا اللي أنا عيذاها  
ده ايه التوقعات غير المنطقية دي، وبعدين فين المشكلة إنه  
يعملها بعد ما تطلبها، إيه العلاقة اللي ماشية بطريقة شم على ظهر  
إيدك دي.


أنا المهتمة بالتفاصيل  
وبخترلك كمان لبسك  
أنا اللي كمان تقول عنها تقول عنها إنها خانقك  
في كل مكان تلاقيها كأنها ضل ماشي وراك  
(أكيد الأغنية دي معمولة لطفل لسه بادي يتعلم المشي فهي ماشية  
وراه عشان مايقعش على دماغه حبيب قلب أمه).

ساعات بنبقى فاكرين إننا مش بنتأثر باللي بنسمعه، بس راجع  
كده شريط الكاسيت اللي اتعودت تشغله في عربيتك طول ما أنت ماشي  
في رحلتك؛ هتلاقي كل اللي حبيته وصدفته وتفاعلت معاه في الكاسيت يا  
ساعدك توصل بر الأمان، يا توهك، فلو لقيت نفسك تايه من فضلك  
اقفل الكاسيت.

### اللافتة التاسعة عشرة:



## أصلحها ولا أبيعها



---

## أبيعها وأحب جديدة بقي؛ موتور، تربو، وشاشة عرض، وحركات!

من كام يوم وأنا قاعدة في كافيه بقرأ كتاب عن احتياجات الإنسان العاطفية الأساسية، وإذ فجأة لقيت حد بينده اسمي بعلو صوته في المول، ببص لقيت أخت صاحبي اللي ماشفتهاش من سنين بتجري ورا عقله صباع في الممول... وبعد السلام والملام دار بيننا الحوار التالي:  
نورهان: أنا مش مبسوفة في جوازي بس مكملة عشان ولادي.

– طب ليه مش مبسوفة؟

نورهان: مش بيعمل أي حاجة عشان يسعدني، ضحكتي عنده مش أهم حاجة في الدنيا ولا ممكن يعمل المستحيل عشان أضحك، مش إنتي دايمًا تقولي أهم حاجة في العلاقات الإنسانية إن البني آدم يكون مرتاح ومبسوط.

– بالراحة عليا يا بنتي الله يكرمك، إنتي مش مرتاحة ولا مش مبسوفة؟

نورهان: هتفرق في إيه؟ ما الاتنين زي بعض؟

– كلا، البتة والله، مش مبسوفة حاجة، ومش مرتاحة حاجة تانية خالص، مش مرتاحة؛ يعني مش عارفة أبقى نفسي، يعني فيه حد منغص عليا عيشتي، يعني فارض عليا طريقة حياة مش بتاعتي، مش مرتاحة؛ يعني شريكي عايزني أبقى حد ثاني غير نفسي، عاوزني أتكلم وألبس وأصاحب على مزاجه هو. مش مرتاحة يعني مش عارفة أعيش، وجوده طابق على نفسي، مش عارفة أعمل الحاجة اللي

بحيها، مانعني أشتغل، مش مخليني أتواصل مع أهلي ولا صحايي. مش مرتاحة يعني شريكي دايمًا ينتقدني، متأفف على طول، متحكم في كل حاجة، مؤذي بيهين بقى أو بيدشتم، بيضرب، أو بيخون أو مدمن أو مش بيصرف بما يرضي الله، إنما مش بيصدقني اللي قولتها دي معناها إنك متخيلة إن دور شريكك في الحياة إنه يعمل كل حاجة في الدنيا عشان يشوف ضحكك والحقيقة إن الكلام ده بيقول لنا إننا مش بنحب نفسنا كفاية، فمش عارفين نبسطها ولا ندلعها، فبندور على حد تاني يحبنا بدلنا، ونسميه الحبيب ونسي اللي بيننا حب، حب بعتمد فيه على حد غيري عشان يبسطني، يقول لي إني حلوة، يصقفلني على كل حاجة بعملها، لأن معظم الستات في مجتمعاتنا العربية اتربت على إنها تستنى استحسان من اللي حوالها...

مش بس الستات الحقيقية، كلنا اتربينا كده، نستنى حد غيرنا يصقفلنا، فلو حضرتك هتتلقني عشان جوزك مش بيعمل المستحيل عشان يشوف ضحكك ف ده معناه أن عندك توقعات غير منطقية من الشريك محتاجة تشتغلي عليها، ولو بتتلقني عشان العلاقة بقى فيها ملل وخرس زوجي، ومش عارفين تحسو ببعض زي زمان، فبرضوا لازم تعرفي إن شغف البدايات لا يدوم وإن الحب مش هو ضربات القلب الزيادة ولا رفرفة الفراشات اللي بتحصل جواكي أول ما تشوفيه أو تسمعي رنة موبايله وإن كل اللي إنت محتاجه شوية تجديد لازم تشيلي التراب عن عربيتك وترجعي للعلاقة وهجها، ولازم تبقى عارفة إن الموضوع مجهد ومحتاج منك قناعة وإيمان جوه قلبك إن علاقتكم تستاهل، ومحتاج عزيمة ومثابرة، ولو بتتلقني عشان كنتي فاكرة إن دور حبيبك إنه يكملك ويبقى عندك إحساس

بالامتلاء طول الوقت ومش عايضة حاجة من الدنيا غيره، فأحب أقولك إن عمرك ما هتلاقي حد كده، وإن ده معناه إنك محتاجة تتواصل مع نفسك.

### مصارييف صيانتها أقل بكتير من تكلفة واحدة جديدة!

– طب إنتي ليه بتعملي كده ف نفسك؟

ريم: بعمل كده عشان حياة ولادي، ومستوى تعليمهم.

– طبعا كتر خيرك يا ريم، بس تفتكري هو في شرع ربنا مين مسؤول

عن مستوى الحياة وتعليم الولاد؟

ريم: بصي، أنا تعبت، تعبت منه، تعبت من إنه مش بيعمل أي حاجة، ومعدوش أي طموح، قاعد في البيت نايم طول النهار، وقدام اللاب توب طول الليل، أنا تعبت من أني أنا الراجل اللي بيشتغل ليل نهار، وتعبت من تربية العيال، وتعبت من الحياة كلها، أنا أصلاً ست عايضة تقعد في البيت أطبخ وأدلع نفسي وعيالي ماليش في الههدة!

– بالراحة ونفكر واحدة واحدة، هو إنتي لو قررتي تشتغلي بس

شغلك الحكومي الصبح أو تنزلي العيادة بالليل بس؛ يعني تستغني عن حاجة فيهم مع دخل إيجار المحل بتاع أبوه هيحصل إيه؟

ريم: ساعتها يبقى إنسي المدارس دي، لازم أدور على مدارس

مصارييفها أقل، وإنسي دروس البيانو ومفيش مصيف، وحاجات تانية كتير.

– طب ماشي، إيه المشكلة؟ ما تعملي كده.

ريم: يعني أسيب ولادي يدخلوا مدارس أقل من اللي اتعودوا عليها.

– طب إيه المشكلة إنهم يدخلو مدارس أقل؟ ما هو ده المستوى التعليمي اللي أبوهم يقدر يقدمه لهم، وإنتي ساعتها هتبقى شايلة معاه برضو، بس شايلة شيلة تقدري عليها، مش شيلة توقعك، أنا عارفة إن اللي بقوله صعب في الزمن ده، في ظل الجري والتوتر والمسؤوليات والتنافس، بس متنسش إننا كستات دورنا نبقى سكن وونس ورحمة مش سوبر وومان تهد جبال.  
ريم: ما أقدرش أعمل كده في ولادي.

– ريم، فوقي، إنتي عارفة إنتي بتعملي إيه في ولادك بالوضع اللي إنتي فيه ده؟ الولدين هيبقو متخايلين زي أبوهم، هيطلعو متوقعين من زوجاتهم ببقوزيك، هيستنوستاتهم هما اللي يصرفوا ع البيت، ولو زوجاتهم ماعملوش زيك هيلوموا عليهم جدًّا، أما بقى بنت حضرتك المسكينة هتكبروهي فاهمة إن ده دورها، اللي إنتي بتعملية ده، بالظبط كده، هتموت نفسها وتنسى أنوثتها. يعني عيال متلخبطة وهو ده بقى اللي هتسأل عليه يوم الدين بجد كأم؛ أولادك طلعتهم أسوياء ولا مشوهين؟ كنتي قدوة ازاي؟ ولادنا بيتعلموا من البيت اللي اتربو فيه؛ إيه دور كل واحد مننا – راجل أو ست – في العلاقة، عشان البيت هو الماكيث الصغير للحياة، وخلي بالك مع كل اللي إنتي بتعملية لهم ده وكل الرفاهية اللي بتقدميها لهم دي إنتي مقصرة في حقهم برضو، وفي حق نفسك وده الأهم، لأنه قدام إنك تقومي بدور الراجل اللي مسؤوليته يشقى طول النهار والليل عشان يصرف ع البيت والعيال و ف النص بتقومي بدور الست اللي بتربي وتأكّل العيال وتعمل الهوم وورك مش هتقدري كأم تدي حب وقبول وحنان وسلام، هتبقى مستنزفة ومتعصبة طول الوقت ومش مستحيلة منهم

غلطة ومعندكيش طاقة ولا وقت لهم، ف إنتي كسيت هتقعي، كإنسان هتتهاري، ولو إنتي انهارتي البيت كله هينهاري، عارفة الأخطر إيه بقى؟ إن جوزك ده عمره ما هيشوفك ست سوبر ومضحكية وعظيمة لكن هيروح يدور على واحدة تشوفه راجل مالي عينها؛ لأنك زي ما لسه بتحكلي لي دلوقتي مابقيتيش شايفاه راجل ومش طايقاه يلمسك.

ريم: هو مش راجل مؤذي، هو بس كسلان أوي، وساعات كتير أقول هو يعني بيعمل لي إيه، ما أتطلق وأرتاح من مسؤوليته، وأرجع تاني أقول لنفسي بس أنا لو اتطلقت مش هقدر أعيش من غير راجل، يبقى اللي أعرفه أحسن م اللي ما أعرفوش، ولا رأيك أتطلق؟

– حبيبتي هو مفيش وسط، يا تفني نفسك وتموتها عشان تجيبي فلوس يا تتطلقي، ارجعي تاني لدورك الأساسي شوية بشوية واديله هو كمان فرصة يقوم بدوره، وبعدين شوفي وقرري.

ريم: دوري اللي هو إيه؟

– اللي هو زوجة وأم ياريم؛ زوجة حنينة بتطبطب من غير ما تحمل نفسها فوق طاقتها، وأم بترعى أولادها، قومي بدورك وماتشيليش شيلة مش بتاعتك.

## هشترى عربية جديدة وبرضوا يحافظ ع القديمة!

صاحبتي رضوى وجوزها مش شبه بعض من زمان، من يوم ما عرفتها وبينهم مشاكل كتير، جه جوزها في يوم قالها: «بصي أنا عندي احتياجات عاطفية وجسدية إنتي مش مغطياها، وأنا طلبت منك ده

كثير، وكل مرة ردك سيكون روح اتجوز، بس أنا دلوقتي فعلاً محتاج أتجوز تاني، وليكي مطلق الحرية نكمل أو تنفصلي وأديكي حقوقك وزيادة».

طبعاً كل الصديقات والقريبات والعزيزات نصحوها وقتها تتطلق وتنتقم وتكره عياله فيه، لكن هي بعد الزوبعة ما خلصت خدت القرار – اللي الكل وقتها شافه مهين لدرجة ناس قاطعوها بعده – قررت تكمل.

بعد كام سنة قابلتها في قعدة والموضوع اتفتح قالتلي ساعتها بالحرف: «أنا بصراحة على أد ما كرامتي كانت بتنقح عليا وقتها، على أد ما حسيت أنه كان عبء وارتحت من مسؤولية توفير احتياجاته الصعبة عليا وبقي فيه واحدة تانية هي اللي شايلة ليلته، وأنا في نفس الوقت لسه مراته اللي بيصرف عليها، ويحاول طول الوقت يرضيها، عشان حاسس بالذنب ناحيتها، ومش مقصر مع عياله؛ بالعكس ده الولاد دلوقتي نفسيتهم أهدي لأننا بطلنا نتخانق ونتجادل وبقي حوارنا أرقى، وأنا ست مش عاطفية أوي وإحساسي بالغيرة مش مدمر يعني».

قلت لها: «إنتي صح، مش دايمًا نصيحة اللي حواليك بتبقى هي الصح، يا ناخذ برأي متخصص يا بلاش، لأن محدش هيعرفك أكثر منك، وحتى المختص مش دوره ينصحك، ولا يحل مشاكلك؛ لكن دوره يساعدك تعرف نفسك وتختار الأنسب لك».

## أبيعها ولا أصبر عليها؟!

– مراتي خانتني، تعرفي تقولي لي له؟ خانتني؟ (بيبي بمرارة وبصوت مسموع).

– أنا آسفة أن ده حصل معاك، ومقدرة حجم وجعك، لكن كل حاجة ليها حل بإذن الله.

– حل؟ بقولك خانتني، كله إلا الخيانة، أنا شفت رسائل، قربتها بعيوني من على اللاب توب بتاعها، وبعدها بيومين لقيت الرسائل اتمسحت، وده معناه إن إحساسي في محله؛ فيه حاجة بينهم.

– طيب اهدى يا يحيى وأنا معاك فهمني بالراحة، الرسائل كان فيها حاجة غريبة يعني؟

– بتقوله وحشتني وبيقولها صورتك الأخيرة تجنن، كلام شبه كده، لكن فكرة إنها تمسح الكلام ده اللي مش طبيعي.

– طيب إنت عملت إيه؟ واجهتها؟

– أنا لسه ما عملتش حاجة، ومش عارف أعمل إيه وبكلمك عشان كده، أنا سافرت إسكندرية يومين وبعتلها رسالة أقولها سفرية شغل، لحد ما أعرف أعمل إيه؛ أطلقها وأسيبها للحيوان ده بعد ما كبرت على إيدي، ولا أواجهها وأخذ منها تليفونها واللاب توب والعربية، ولا أعمل إيه قولي لي أبوس إيدك.

– بالراحة على نفسك يا يحيى، إنت عارف إن الموضوع عمره ما هيكون أبعد من الكلام.

– أيوا عارف بس ده لوحده مصيبة، أنا عرفت أدخل على حسابها

الشخصي من تليفوني وطول الوقت فاتح على الرسائل بينهم مستني أي جديد.

— لأ يا يحيى إنت كده بتؤذى نفسك، حرام عليك. اللي بتعمله ده مدمر ليك.

— طب أعمل إيه؟ قوليلي إنتي العاقلة أتصرف ازاي؟ إنتي تصدقي أصلاً إن إسراء تعمل فيا أنا كده، بتردها لي يعني!

— بص أنا حاسة بيك وعارفة إنه موقف صعب، أنا ماشفتش الكلام اللي بينهم لكن فاهمة قلقك إن الرسائل اتمسحت، لكن أرجوك جو المراقبة ده غلط، هيموتك بالبطيء، ومش هياخد العلاقة بينكم لأي حته. الحل تواجهها، قول لها على اللي حصل واسمع منها، وشوف الكلام هيمشي ازاي، بس من غير اتهامات؛ اسألها وإنت بتستفسر مش بتهاجم، اسألها وإنت متأكد إن أيًا كان اللي حصل فهو مش غلطتك، آه صحيح الخيانة—لو ده حقيقي فعلاً اللي عملته إسراء—لها أسباب، لكن أبداً مش مسؤوليتك، ممكن تكون مسحت الحوار بينهم عشان خافت إنت تشوفه فتتضايق، أو تفهمه غلط أو أي سبب تاني، ف أول حاجة مفروض تعملها دلوقتي إنك تقفل صفحتها، ماتتجسس عليها يا يحيى، عشان إنت أرقى من كده، وعشان ده مش حل.

— طب ولو أنكرت؟

— إيه اللي بيخليك تقول أنكرت؟ إيه اللي هيعرفك ساعتها إنها بتنكر مش بتقول الحقيقة؟

— أنا معرفش؟

– إنت اللي تقول، ده قرارك، إنت عاوز تصدق إنها خاينة ولا عاوز تصدق الكلام اللي هي هتقولها، ولو طلع حقيقي إنها منجذبة لواحد تاني عاطفيًا واعترفت وندمت، إنت برضه اللي تقول، عايز تسيبها ولا تديها فرصة ثانية؟

– هي الخيانة ينفع فيها فرصة ثانية؟

– كل حاجة في الدنيا ينفع فيها فرصة ثانية، لكن أكيد فيه حاجات هتحتاجوا تتفقوا عليها.

– وياه الضمانات إنها مش هتعمل كده تاني؟

– مفيش ضمانات، إنت لما اتجوزتها كان فيه أي ضمانات إنها ماتعملش كده أولاني؟

– لأ، بس كان فيه ثقة.

– أكيد طبعًا دلوقتي الثقة اتهزت، وأكيد فيه حاجات كتير لازم تشتغلوا عليها في علاقتكم، أصل الخيانة عرض أكثر منها مرض.

– تفتكري هقدر أسامح؟

– إنت اللي تعرف، وماتستعجلش على نفسك.

– طب لو سامحتها هبقى راجل مهزأ؟

– تفتكر هي لما سامحت خيانتك لهما من سنة كانت مهزأة؟

– لأ، طب لو ماقدرتش؟

– يبقى دي قدرتك، محدش يجرؤ يلومك، وماينفعش تغصب نفسك عليها.

## جابت وش سلندر:

أي عربية في الدنيا لازم لها صيانة كل ما تمشي عدد معين من الكيلومترات، والصيانة دي لازم تتعمل بشكل دوري، لازم تطمئن على وسائل الأمان فيها، تتأكد إن الفرامل شغالة، وإن إطاراتها سليمة، تغير لها زيت، زيها زي أي حاجة في الدنيا لازم لها صيانة؛ جسمك، نفسيتك، شغلك، علاقاتك.

ولو إنت مش بتواظب على الاهتمام بيها ومتابعة والتعامل مع أي مشكلة بتظهر فيها أول بأول، فأنت كده في خطر.

وزي ما فيه علامات بتقولك إن العربية دي كده جابت وش سلندر، ولازم يتعملها لها عمرة، فيه كمان علامات بتقول إن علاقتكم في خطر، ولازم تبدأ تتحرك بشكل جدي عشان تمنع انهيارها.

## العلامات الأربعون اللي بتقول إنها كده جابت وش سلندر:

- 1- بتمسح رسايل تليفونك وسجل مكالماتك قبل ما تشوفه.
- 2- الخناق بقى كله تجريح وإهانات مابتتنسيش.
- 3- بتفكر في الانفصال كتير.
- 4- بتلاقي نفسك بتتعاقب بالهجر، بالخصام، المهمم بتتعاقب.
- 5- وقت الزعل محدش يبىادر بالصلح لكن في حد يبىادر بالهجوم.
- 6- مابتسمعش كلمة أنا آسف أبدًا.
- 7- بتنزّل تشتري حاجتك من وراه عشان تريح دماغك.
- 8- طرف واحد هو اللي بيطلع على طول الخط الغلطان.

- 
- 9- طول الوقت بتعمل نفسك عيان أو مجهد عشان مايطلبش منك حاجة.
- 10- بتمسح رسايل تليفونك وسجل المكالمات قبل ماتشوفه.
- 11- مبقاش فيه حاجة مشتركة تجمعكم لا هواية ولا فيلم ولا صحاب ولا حتى أمنية.
- 12- كل أحلامك للمستقبل هو مش جزء منها.
- 13- عينك ابتدت تزوغ على غيره.
- 14- وجوده حواليك بقي موتر أو على الأقل غير مرغوب فيه.
- 15- تواريخكم المميزة لا بقيت تفتكرها ولا تهتم تحتفل بيها.
- 16- بقيت تشك فيه، قلقان إنه يكون بيخونك.
- 17- بيمد إيده أو بيشتم أو بيعمل لك (Mind Gaming).
- 18- فاكر له وبتشوف مواقفه الوحشة قدام عينك طول الوقت.
- 19- مابقاش شعورك ناحيته الغضب، بقي اللامبالاة.
- 20- بتمسح رسايل تليفونك وسجل المكالمات قبل ما تشوفه.
- 21- بتلاقي نفسك مضطر تمدحه وتمجد فيه عشان تنول الرضا مش عشان إنت شايفه يستحق.
- 22- بتعمل حاجات مش عايز تعملها/ بتخاف تقوله لأ.
- 23- بتكتشف عن شغله، عن صحابه، عن خططه حاجات بالصدفة مش هو اللي بيقولها لك.

- 24- بطلتو تشكروا بعض، تثنوا على بعض، توروا بعض تقديركم.
- 25- لما بتكونو سوا مابتبصوش في وش بعض ولو لدقايق.
- 26- الناس ابتدت تسألکم مالکم شکلکم مش طبيعيين.
- 27- بقى ينتقدك وتنتقده بشكل كبير.
- 28- لما بتسأل نفسك مكمل ليه بتقول لنفسك إجابات كتير أوي  
مش من ضمنها عشان بحبه.
- 29- الخناق بقى فيه طرف بينسحب ويرفض يتناقش أصلاً.
- 30- بتمسح رسايل تليفونك وسجل المكالمات قبل ما تشوفه.
- 31- تختار تقضي وقتك مع أي حد ولو حكمت لوحدك ولا إنك  
تقضيه معاه.
- 32- التواصل الجسدي قل، أو مبقاش موجود، ولو حصل في  
طرف بيبقى بينجز ومن غير روح.
- 33- حاسس نفسك ماشي على قشر بيض، بتتجنب أي حاجة  
ممکن تعمل مشكلة.
- 34- واحد فيكم بينضح والتاني متضرر وببشتكي وبيقول: «إنت  
انغيرت». لكن هو بيكبر، مش بيتغير.
- 35- إنت مش إنت، مش على طبيعتك معاه.
- 36- رحى لدكاترة نفسيين أو معالجين أو بتفكر تروح وهو رافض.

37- بقي لما تتخاصموا بيتشال من على كتفك حمل، وبطلت  
تصالح زي زمان عشان إنت في البعد مرتاح.

38- مابقيتش تفتكره في دعاءك.

39- بقي لما حد يسألك عليه أو يجيب سيرته قدامك تحس  
بقلبك بينقبض.

40- نقول كمان بتمسح رسايل تليفونك وسجل المكالمات قبل  
ما تشوفه.

## أطلق ولا ما أطلقش؟

لما أي حد بيسألني السؤال ده بقول:


لا ماتتطلقيش؛ لأن طول ما انتي بتسألني وعايضة حد ياخذ لك القرار  
يبقى أنتي ماوصلتليش للآخر، لسه فيه حاجات تقدري تشتغلي عليها  
وتغيريها فيكي مش في شريكك، في تصرفاتك، في ثقتك، في توازنك، تغير  
فيكي إنت مش هو.

وأول ما تبقي شخص متوازن، معندوش مشاكل نفسية هتلاقي  
القرار إتاخذ لوحده سواء بإنك تكلمي أو تمثي، تخيلي ده ساعات كمان  
بعد ما تعرفي مشاكلك وتعالجها الراجل هو اللي بياخذ القرار وبينهي هو  
العلاقة عشان بتكوني خلاص مابقيتيش الضحية اللي تنفعه، ومحدث  
في الدنيا ينفع يقولك تصلحها ولا تبيعها غيرك إنت. تكمل في العلاقة ولا  
تهمها غيرك إنت. حتى الأطباء والمعالجين النفسيين وأخصائيين التنمية  
البشرية مش دورهم يخدولك القرار أبدًا، هما ممكن يساعدوك تفهم

نفسك وتعرف تتعامل ازاى مع شريكك؛ يوروك لو عايز تكمل ممكن يحصل إيه، ولو مقرر تنفصل تستعد لإيه، يدوك أدوات يعني، لكن قرار الانفصال بتاعك لوحدهك.

لكن الطلاق اتعمل لما نبقى استنفدنا كل الحلول وسعينا في كل الاتجاهات وعملنا اللي علينا قدام ربنا عشان نحوش عن نفسنا أذي وللأسف معرفناش. الطلاق اتعمل كآخر حل مش أول حاجة نفكر فيها لما نختلف.

### اللافتة العشرون



إذا كان بقاؤك  
من أجل الحب الذي كان،  
لا من أجل الحبيب الذي هو كائن،  
فاعلم أن الحب والحبيب في خطر!



## كلمة أخيرة

لو إنت كل شوية بتخرج من علاقة حب تعيسة تدخل في علاقة تانية فيها خلل برضوا، أو لو إنت في علاقة مضطربة من وقت طويل، فده معناه إنك متبني أسلوب حياة يسمح بالتعاسة والخلل والاضطراب. ولو علاقتك بشريكك فيها توتر وضغوط وكذب وسخط، فده معناه أن علاقتك بنفسك فيها كل ما سبق.

السعداء في الحب، المتواصلين بصدق مع حبايبهم هما اللي في الأصل سعداء بأنفسهم ومتصلين بصدق مع ذواتهم.

مش اللي بيقتل الحب إننا نكتشف إننا اختارنا الشخص الغلط، أو إننا فينا عيوب، أصل كلنا بنغلط وكلنا فينا عيوب، اللي بيقتل الحب هو طريقة معالجتنا للاختيار الغلط وتجاهلنا للعيوب.

---

## محبة وامتنان

إلى روح جدي لأبي.

إلى العفريتين: «أدهم وريماس»

إلى إيمان درويش، ومروة النجار.

إلى رفيقة الدرب حتى تحترق النجوم: «سارة فكري».

إلى قطعتي السكر: «هنا، وحلا ياسر كامل».

إلى الصديقات الداعمات:

«مشيرة عبد الونيس، أميرة حمدي، رشاطه، أميرة فاروق،

مروة شاهين، ماجي، مروة محمود، عبير عبد السلام،

داليا، شيرين حسن، ميادة وهبة، نرمين عمر، أماني عمر،

نهلة الطنطاوي، ياسمين حمودي، سارة أحمد، منى زكريا».

إلى عائلة الروبي، وعائلة عامر.



## شكر

إلى قارئتي الأولى، وناقدي الشرير

إلى الكاتب الذي لم يعلن عن نفسه بعد

إلى الصديق الذي لم يغب يوماً


د/ علي الحبيبي.

## فهرس الكتاب

5	إهداء.....
7	الحب زي السوافة.....
11	اللافتة 01   قدامك سكة سفر.....
19	اللافتة 02   رخصتك للوقوع في الحب.....
29	اللافتة 03   هو مين اللي سايق؟.....
37	اللافتة 04   مسكينة، القطر فاتها.....
43	اللافتة 05   البطارية نايمة.....
51	اللافتة 06   يا بوليس، يا شاويش.....
57	اللافتة 07   أنا ألف الكرة الأرضية ولا إني أنزل النفق.....
65	اللافتة 08   هاتشباك ولا 7 راكب.....
	اللافتة 09   إذا كانت سيارتك فرنسية فلا يجب أن تتحدث معها
73	بالألمانية!.....
91	اللافتة 10   بنزين 95.....
99	اللافتة 11   العربية غرزت.....
109	اللافتة 12   الطريق قبل الرفيق.....
115	اللافتة 13   عيوب تصنيع.....
137	اللافتة 14   فداكي ألف عربية.....
145	اللافتة 15   استقالة شرطي مرور.....
153	اللافتة 16   بيز لاین، وهاي لاین، وبينهما متشابهات.....
163	اللافتة 17   الطريق ده مش غريب عليا.....
171	اللافتة 18   لافتات تحذيرية.....
193	اللافتة 19   تايه، اقل الكاسيت.....
203	اللافتة 20   أصلحها ولا أبيعها.....
219	كلمة أخيرة.....



كما نثق بكتابنا نثق بصوتك / هنا نصغي إليك!



الحالة للنشر والتوزيع

AL HALA PUBLISHING & DISTRIBUTION



تواصل معنا، ونحن نسمعك!

<https://www.facebook.com/alhalapublishing>

[info@alhalapublishing.com](mailto:info@alhalapublishing.com)